

续吴先贤赞 （明）刘凤 撰

续吴先贤赞序

续吴先贤赞卷之一

续吴先贤赞卷之二

续吴先贤赞卷之三

续吴先贤赞卷之四

续吴先贤赞卷之五

续吴先贤赞卷之六

续吴先贤赞卷之七

续吴先贤赞卷之八

续吴先贤赞卷之九

续吴先贤赞卷之十一

续吴先贤赞卷之十二

续吴先贤赞卷之十三

续吴先贤赞卷之十四

续吴先贤赞卷之十五

续吴先贤赞后序

●续吴先贤赞序

刘凤

古贤人之修于乡是其贵德乎若出而定国家功伐在天下则太史氏存焉无不书者其乡之行则惟闾里族党详之岂无遗者是以在周游宗党正各使?书有以也夫吴在昔?奥区贤人产焉者众泰伯潜焉子游澹台各标其闾然不附青云之士则湮灭无闻者可胜数哉昔有娄地记诸书及吴先贤赞多不传余重慨夫贤哲立身修行莫不始于家是故古者正月朝于乡而复事遂定其论及有所选也亦自其乡登之则虽出之四方有功烈着于内外何不记于乡哉顾今之为书者多缪妄窃操弄颠倒之其所褒进非阴有所附离则顾望且自?地所刺非不于其媚嫉则以无所于藉忽遗之是胡所征信与往志作于文定公诸贤又有别载者则杨循吉阎秀卿徐祯卿祝允明其着也余私其绪有所述明若其义则窃取之矣且不能远及古始者何夫前之作者既藐世与人易不能有所夺予故断自今则论其行事迹其始终之槩若功施于民蒸蒸遂遂者以劳定国赫有显名者翔序卿列蔼蔼济济者历践机要善保无咎者积资赖宠淳然肤逊者躬勤砥淬宣翊庶猷者董正弹压望实克副者艰棘危栗蹇蹇弼直者辟造土强桓桓师武者智畧辐辏镇安宗社者仗节引义矫矫烈烈者介厉严公侃侃諄諄者廉清洁贞操行绝俗者高邈不污违世独立者好博研思闲雅知物者敏贍辞致蔚有藻章者淹该艺事综毫翰与绘素者精理微解善为方论砭石者雕文刻镂巧擅倕尔者诞恠匪隐游意变幻者至于

妇人之节抑或有女教焉然无得而纪者以贞一自其恒范自非有姜嫄太任之德庆流无穷则虽梁高鲁寡亦所不列自节义以上不为题目者所以效于用亦各因时或未可以槩之也彼君子者其虚其徐威仪王国是我吴之盛也出处异道庸无得而讥焉

●续吴先贤赞卷之一

刘凤

高启

卢熊 卢熙

杨基

姚广孝

滕德茂 王逊

郁新 余燠

卫浩

钱芹 俞贞水

王英

金问

杨翥

王璲 王璠

吴讷

陈祚

尤安礼 虞祥

施显 张洪

何源 张勛

曾燿 平思忠

刘璉

李蕢

施盘

○高启

高启者长洲人少时以诗为饶介所称介在伪吴间喜文学垂意启良厚乃去之隐青丘洪武初以史事召预执简已乃命教胄子 上忽令与谢徽同对时已暮面授侍郎户部以不经为吏且金谷重孤远骤当寄任力辞得罢仍 赐金遣归属魏观为守故与相优礼遇之魏得罪遂并坐年三十有九所著书曰为鸣鳧藻学者多有之

赞曰国家肇基威武出三代上其始开以文则季廸有力焉为诗沈淡以桥举精理间发加藻采焉弘于前之勩矣观亦宗臣安集吴勳攘时以飞语中良惜人谓贾生以绛灌斥外若启遂文致之悲夫

○卢熊 卢熙

卢熊字公武本武宁人家昆山父观好读书熊在元为掌故洪武初起守兖州时兵革后未安集重以大役熊所为画善分别不待令趋事后竟坐法人伤之初游于杨维禎覃思义喜博绝伟异之观而尤工小辩多所正之为书甚众子彭祖被荐为礼官亦善着文孙瑛以进士起能世其家

弟熙以荐起同知睢州明年行州事使者逮民而伍之取必盈无问所从留令者以不如诏论熙不为动上更戍者数人使者虽怒不能夺后卒官贫不能殓吏民为归其丧送者塞途遇大雨无一人避去者熙既雅慈仁又涉学与兄名相亚子充赖以善书召孙儒亦有文守中书

赞曰熊为吏廉公其惠足以使人殆以儒徒守文耳法理乃非所长耶然口之亦不显其过公暨愈愈而能脱士藉干爱结于人矣其子孙咸简简有兴者称不堕其风茂矣夫

○杨基

杨基者本蜀人自其王父官于吴基生焉幼则警敏日诵千言已有论著欲自试不果乃隐吴赤山伪吴辟致之即辞去又客饶介皆未及有所见 王师平吴藉置临濠又迁之豫后起令荣阳复从坐徙用荐为从史又以罪斥也再起奉使还授员外出按察山西竟以谗逮役锺官卒其往来数数是时法初行少有过则从吏议且以自士诚所虽见宽犹不能善也欲以庸庸免又不可得基工于诗与季迪张羽徐贲同著名四杰初杨维禎来吴一见惊焉谓已不逮今其诗实传也

赞曰汉定功以从起丰沛?上有以哉有以哉其次虽自归者犹时见疑而况以收藉得免幸矣孟载特以儒亮得复用然既无他才能斥乃其分好进矜名竟于作所歿与公干役上方异矣若吴之诗盛于今基并有力哉

○姚广孝

姚广孝苏之相城人初为浮屠学通占筮兼综兵家书王止仲知其有当世才虽自匿欲有所用之会有以道高荐者令侍 文皇于燕一见以为天授即深相纳数以奇谋进起兵时多其画也迄成功所筹皆闕密人不得闻或以为通于数迹甚幻盖天造 皇始特神之耳坚不受封且不置家上亲爱之呼少师而不名竟徒步归出入里中不改初服逮卒 上又亲幸其第问所言终不对乃官其养子焉

赞曰时运方遘则异才出焉固不一途哉当 高皇时固疑 文皇之受命也几道衍而仁慈佐之而首定大计开万世洪业及成功谢不居则又加于人一等矣子房学黄老谓有托此其游于方之外自性然岂为富贵哉所著书多不传若其深诋宋儒必有见焉张洪何者辄焚灭之惜矣

○滕德茂 王逊

滕德茂者仕元为江浙行省官从讨方国珍浮海风大作?舟?石?徂多欲崩众无人

色德茂喻以无恐赖之济留抚台人甚德之 国 初 征为丞相掾已乃令与王溥同守建昌溥多自恣德茂持之力自湖广行省召拜夏官尚书以事见法其才长于绥集又工为奏论事爽激故见拔擢子枋与从弟权皆有职用

王逊字谦伯昆山人以进士选自御史丞上高寻以功复召性刚廉峭刻所治以鹰击毛鹗为能人或规之君不虞后患耶曰虞患思避隐忠不竭其又得全哉竟坐法子复亦以进士任御史然直气少折矣复子敏能不坠其业

赞曰司马以故元臣进用其初岂有所不得已者彼其操尺寸思欲用所未尽既遭值不世由郡邑附风云遂秉统枢机适不当意以嫌逮非以不从始起疑易构耶逊疆直少戇然守职不回虑使挠而从之曷称死官下哉时以刑乱国用典无所贷要之终见察其子孙皆显用岂不至明矣哉

○郁新 余燠

郁新者家本吴人其父避之临淮以贾致饶新伉爽结少年负奇气洪武间征主度支事 赐今名已而更定制为郎中进侍郎数对称 旨问天下户口钱谷转输占对无遗大被眷拜尚书卒永乐中

余燠字茂本昆山人家故镊工少僇慧喜学问?儒有意当时洪武初选造于 廷无何遂拜尚书吏部掌铨称平迄无悔咎燠为人长者未尝譖毁人其以事见疑者每进微喻有所宽释居家尤恭谨望里门辄下见故时所往来必自名若未尝贵者

赞曰郁新方缔造时主大计非其才长于应变善心计无所漏失乌能免哉及壬午之际委仕无改信乎其工为自谋也燠虽蹢躅然畏慎不被嫌猜其事乃不能详既总百官备宰阿盖亦有足称矣

○卫浩

卫浩字季洪常熟人永乐时任御史未尝深文诋人罪见酷急吏辄论罢之 仁宗为太子八?田守殊被知遇讯狱多乞付卫御史奏上辄报可尝有大将收其偏裨上之请论死浩议令以功赎后迁按察江西归年至九十余

赞曰浩诚宽仁未尝足已自负所守官不察察任威似质谨无异能然其治多得全卒以此蒙福虽忤时见原将在外始不敢专杀归之 上自治乃获释自此疾力战者寡矣

○钱芹 俞贞木

钱芹者吴县人幼自修立厉志介廉初不龊龊欲以奇节见尝从大将军辟绝塞宿留既罢府居贫漠无所营意良苦守姚善爱士赋米俞贞木误致之芹所芹以守贤也不逆他日贞木见守乃知之因欲见焉不可期于庠序展礼宾之继忠出一书遗守遽退善乃荐之朝从征虜将军咨议令请事司马门未至卒遗奏言边事 上善之赐归葬

俞贞木者琰之孙琰有名前代贞木颇好学问善著书洪武初荐为乐昌令又为都昌以亲故累罢免太守善方向文学尊礼有道以风民俗极重之数延致于庠行乞言礼

多荐达贫士因以进者往往而是然糠核不继空匱愈甚不以于意靖难时劝守举兵因逮赴司空论

赞曰继忠虽高行然本负气欲有所出之两在行间其奇谋秘计亦将有所效之乎贞木敦行尤以节着其居平洁清重一介取予虽尝仕或以逸疑之岂遯世不顾者哉方其为守决策要与俱死志义皎如日有夷之清称贞隐何也

○王英

王英者昆山人也始约时诸父老会里中尝为传食无不贍即他时传食者多不以时咸曰无伤也王孺子性谨厚廉仁时为博士弟子者多避不肯就独慨然应之数岁升于国学选授御史以能举其职闻命摄都御史事上手翰宠之又以为刑曹出为邑永乐初召还继迁按察陕西得代归卒泗州英始终以宪法赋于政刚果善断临事毅不可夺有所论说人问之不对及已行下犹未知为英所上者常曰既已出身奉职当死官下宁复顾哉然其中纯质居乡时时过所善者弊衣冠行道上人不谓尝贵也喟然思往传食时曰吾素事诸长者未尝少失意异时吾且得相从游岂非幸哉王公驥性严峻尝与公为寮深念之数问遗其妻子所以恤之良至时亦为其厚重不泄类周仁张毆也

赞曰俊伯未有赫赫可纪然在朝不能久居其位良由伉直少所容贷不假颜色于人故恒不堪之然为吏宁当游意于法之外市恩哉得不黜辱幸矣迄善罢能保其终则又可谓不谄曲之效乎

○金问

金问吴县人其父道玄为元将陈养子陈战而败道玄自投海中义不为贼得若有济之者流不知昼夜忽在石上竟得免人荐之伪吴逃焉以终问既贫家无书寓读于人学于俞贞木永乐初荐起官正字授太子经会有忤与黄淮杨溥系请室三人深相得也各以经义讲诵不辍洪熙间待诏时引对有所匡益累进二秩宗卒英宗时更历四世皆在肘掖参预时政每有譔述未尝不在其学长于训诂勒成一代典藏之太府与诵习之博士弟子者皆有力焉尤工书解星历兄声亦嗜学问事之甚恭尝病禁寒时欲羸蚌即解衣觅进之其友爱如此

赞曰兢兢公素修闻?姁厉行自家平我王路悴惟诱任印恤蹶踣巢?虎巢?虎陆危居之若裕恒预帷幄通塞异趣优游著作匪宠能耽贞行之以岂徒艺翰平允兹执心庶哉忠贯平

○杨翥

杨翥字仲举系本宋高宗将沂中后家于吴翥少与兄戍武昌为人讲说时文贞公士奇亦寓焉见即欢相得文贞方困乃令诸弟子从之受业而自之他所日往返余十里与文贞期会未尝失也由是德之甚当仁宗时荐之召主注记从史氏撰三朝事迁传郕王谢罢及景泰间朝焉竟不仕归二年又以虏保塞赴上贺所以宠之良厚公因疏乞时朝太上皇帝进位秩宗俾食其禄年几耄乃卒素敦行以德重称其处

人所不能堪无几微介于意纯心为质君子哉可以厉世表俗也

赞曰常伯亹亹笃哉有槩方其困时两贤同厄言议甚伟卒建忠策序功 当宸曷恭之敦而靖以无侮曷仁让以恢而粲粲其庸愈几而能舍不弘于进以取悔 【 火五】 谦恭是则三命而伋寿俊如何实里我土 【 公之故居相去余甚近】

○王璉 王璉

王璉者其先蜀遂宁人也自其祖父仕元宋时家吴璉有异资幼则善属文名籍甚因得备侍从与王洪孟杨达善并以才闻璉等既后进文独工诸在位者雅不能善又自相矜许遂被以轻薄名 仁庙在东宫试神龟赋极称善语解缙顿首谢不能及后语黄淮淮因譖之遂与孟僴先后论死

璉璉弟也先在谪遣中以明经举?掌故以著作召与杨溥等入直 内庭璉稍醇谨文亦不逮璉故得优游免兄璉少有逸才先被遇命从宋濂学以早卒名乃出二弟下璉为文能立就虽数篇并作受命即奏不淹刻咸以为神而性又无所推让故不免于忌然其书未久遽无传者

赞曰吴称文学自言游始后乃盛海内然初之能绍者汝玉兄弟寔先之虽不善终亦由传会能以其文进用被眷良厚有名称于时顾不为资适逢世得当哉逮其及也一由于文文适庸乎竟以名败故亦安贵名也

○吴讷

吴讷常熟人幼有成人度能遍诵五经父为沅陵簿被逮讷请代未得而歿丧之哀时称有礼乃用善医起 仁宗素贤之授以御史其所莅必兴立教化奖进贞义黜奸邪除暴戾之意表闾里修忠臣墓时稍敦质法无抵严历官都御史皆以仁厚称致仕归卒年八十六谥文恪所著书多行于世

赞曰讷岂不诚贤哉躬行孝悌务在沉至感切于人与彼华而不敦异矣至晚节益恂恂恭谨虽履贵盛谦已有逾未尝作重劾按人亦时初解网密用忠质?化数贤者风厉以节槩敦俭用追隆于古自今谈者罔不嘉其遇若其老而劬劳勤于著作故亦颇着文焉

○陈祚

陈御史祚者吴县人字永锡自庶吉士参议河南以言事黜均州力田宣德初召为御史复疏言帝王之要载在典籍具以质言儒者所为明兴坏之端在薄嗜欲谨游幸审忠邪之辨若此之不慎徒文法为何以制义宪为之建利去害错世于安而不倾 上疑其言游幸佞邪有所褒毁刺非抑损当世之意遂逮治请室且籍其家禁五年乃得释复其官则亲已前死狱中乞行服不听又乞归葬乃听后按闽击去方岳而下甚众代还视河渠重劾将漕者虽蒙宥令惶恐谢又按楚言 辽王事 上怒械治论死寻赦出之侍郎吴云者荐其属吴悦悦坐死而文法吏因文致其罪云以释憾悦自刭祚上言?理者用法不平以私上下其手乱旧章应死 上是之因着为令迁按察僉事福建得谢归卒年

七十五祚性刻廉有所为奋不图难操裁太过不无逆戾人情然能苦体蹈危险若甘之人亦矜其壮气尤怨亦复少损焉其后世官亦有显者乃多智计用和谨贵矣

赞曰古伉暴?懞者暴公子之属史犹称之岂非以朴击凌挫良难矣哉至引是非争事之曲直剗切人以所不能在下尤患之而况以事上乎祚数跌不悔倏兴倏废至陷其亲于囹圄以死不为服虽成直臣名然以此易彼吾闻之中大夫美中云是岂有不得已者且其所激愤果天下大体奚不可者当是时故无失德徒以口语屡至谗忌惜夫

○尤安礼 虞祥

尤安礼字文度父从道前元时辟从事后避去至洪武初以才荐官楚当草昧际务晦慎自全安礼生而淳谨无伤也寓楚时与杨文贞及尚书翥相善履方挈规行不径人笑为迂有欲试媒污之变色走匿其同门生当远徙妻子稚弱安礼谓之曰第行我在何患已而女长为子娶之子故所后弟之子也弟以女疾难之曰吾以心许吾友可食言仕为掌故进司马属同列面骂之安礼不为动既病免几不能给朝夕况守锺入 朝文贞公问焉不能对归而得之隘巷居甚卑陋请更之不可其介有足称者

虞祥者昆山人也以掌故擢给事礼科顾能谨默不妄诋见人有过务覆匿之虽容容随世然赖以全者多历官侍郎巡畿内为政大率以清静不事纷更有所论 上终夕不能寐报可乃已其慎如此子震以力学闻孙臣为司马属参议益部所至清谨归不持蜀货人问其橐装曰吾以市德于民重不任载也盖亦祥善为貽谋矣

赞曰余观谨愿者事未尝不为动容也曰羔羊之诗见之矣伯有佚奢而子产嘻晏不敢盈礼焉匡齐道缺树德务滋岂厚封之谓邪仲祜用诚长者处官虽畏慎庸不乃愈教子孙不失秩可谓能遵业哉子礼不欺其友贫约没齿无憾岂有所要固自其志绝人矣夫

○施显 张洪

施显者以进士第一人官都督断事已复行按察事北平坐谪久之乞自劾授御史有所谏诤皆大事疏未上而卒与张洪为同邑人相善也洪被遣显适在廷欲言洪目止之得薄谪既洪以明经起永乐初授行人使日本馈赆一无所受又以茶易马于番冬而往逮夏归裘葛不更人称其介缅人入孟养地又命谕责之还所侵方阻兵不服六返乃听洪所著书多于显年亦高其为经解皆徧不专名一经也

赞曰张洪之夷狄开说令服从无所为屈其诚仁有以动之虽凶狡且偃息国家威命四畅非播宣者有人曷以哉显虽欲效而忠不能遂固亦有未易者当是时法峻独无可瑕疵谪而旋复足谓善保终始矣

○何源 张勛

何源者吴江人也洪武间以博士弟子试为吏德州山东蝗大起独不入州境岁饥极于病能绥靖之以功迁守梧州梧蛮夷地且患裁相仍议上所以賑之曰俟得报民不其馁而吾宁以擅发罪耳遂开仓廩多设方畧拯之已而坐事谪英公张辅辟教士交州

复后召为宰士历岳牧源在事久屡斥屡起仁厚温借故能免年八十六时谓宽厚之効也

张勛永乐中以掌故为御史侃侃有直臣风出按山西封上有所言譖者以几事不当露泄必欲文致之不能得迁参政以卒勛气厉急少所容然于守官亦质有文武焉

赞曰源用宽济斥虽屡竟跻通显以考终观其所设施无异能碌碌不与物忤故自行间起得晋用非有所附丽然哉勛之刚急可谓能称其职虽以早世不竟其用盖亦无复之矣

○曾燿 平思忠

曾燿者其先钱塘人由其父徙吴江燿少学春秋于鲁道源洪武间选于乡令黄陂召侍读 禁中修典令使交南还陈黎氏所以当讨赞师有功既平之复使往卒于富良江子坚亦春秋起官蜀藩

平思忠吴江人以功曹进永乐中官主客时方国来同忠竭力能节承时序无失秩官尚书吕震才之以事被逮值虏使至震为言立出之后任杨弘关中以思忠参其事复被谴会市马西域以思忠能货令随宦者使吐蕃还卒初太守况锺尝同推择故礼之厚且使其二子事焉曰此吾故人尔无宁骄失长者意忠亦视之自若也

赞曰语称使于四方宣其辞命招携贰绥服之岂易能乎燿再使交人其勤足纪思忠怀远人致饗饩其逆也以班有加等益虔使小大莫不得其所再絀终以复用自非其才不可弃耶方是时综核详上下不敢苟若忠之进退亦文法所不得而裁之矣岂徒无害哉

○刘琯

刘琯自永乐间仕御史历侍郎守边几三十年当 英宗时虏数入琯能持重少失亡其以首功上者必审喻之云有如不中率令尔对簿书尔果阵而获于何所遇敌疾力战胜耶故终不敢冒赏嗣后未久辄累功徼求过当矣琯之不矜岂非人所难哉致仕归卒于通州贫无以返葬逮叶公盛疏上其功状请加恩乃得追恤旋先人冢昆山

赞曰士谈说就功何易也使乘一障能令虏无入乎琯在已巳与郭登守宣府为城下盟计欲诡夺虏虽不克然使知有备不敢犯又数侦虏虚实竟使款塞和未必不能逆策其然也功皆抑不闻至歿而不能返其丘墓身久为将故犹窳甚何论请美田宅多从宾客车乘哉且戒妄杀不敢徼功畏谨矣或责之死封疆之义不能出骁锐鏖土木下济师事诚有之则所传闻异辞未可蔽其罚一人也

○李蕡

李蕡者长洲人以进士任司马属尚书方宾器遇之进佐太仆从靖远伯征麓川父卒不听归以墨衰从迄驥以功疏爵而蕡亦迁二司空乃乞持服后以司马邝埜荐令佐已先已巳之变卒蕡事无所见雅善为兵其从征也由其计划得全故以文臣封者惟麓川之役在兵间久知边郡地图阨险远近埜深以此倚之为人长者居乡甚着行义时有

赞曰闻之长老云当英宗时朝桡方以虏事桡实谋之蕢蕢为具言所以戒慎而中官振务徼一时调纳偏说不参稽且席中国累叶盛强气奋决策于内茂实言不用亦前死故得不被书云无侮老成人则计之生熟于得失可知矣

施盘者吴县人少落拓宽博衣冠游里中人多谓之狂生从博士弟子诵学而亦好为诗故时诗近俚犹有闺门衽席意盘既雅自负选造对策于 廷第一年纔二十余皆以洛阳年少遇之公卿争前席亡何遽卒

刘公讳铉余从祖永乐中以善书征预修史进侍讲 英皇帝深所眷知 天语褒之云铉开说简质大有裨益已而 景皇帝称摄诸司劝进独不预名及易储事起时为祭酒又不肯表贺屹然中立在 廷倚以为重杨翥荐公及吕原可相而公竟不肯一见贵幸遂累考始进詹事归方在翰林时王汝玉辈为文若宿成公必淹时乃就然沈至深切于经国匡导纳于善为多不与轻薄体同也所著盖多藏之不出久乃散佚惟诗二卷传尤工于书楷法温媚极为时所重不肯为人题故益少存者与人虽造次未尝不厚念若同官者子弟见焉拜起必令如礼而恤所乏及问遗其孤无不至不好立名称而咸谓

长者敬之性廉厉不治家产故狭小耳卒赠少宗伯谥文恭子瀚官副使尤严毅能伉其法于宗蔚有礼教孙桢以公任为郎至太常阶一品实异数也

赞曰昔汲黯在九卿中谓能立懦非徒言论无所避也即闻其风惮之所操裁异矣若吾公在当时以文学侍从无所主守何以见谓刚特当其有所发使人不寒而栗至举动虽小必慎行已皆有尺寸宁迟毋速利害藐不能易不可谓诚直臣哉以所后死靖难时故终其身不得追恤而刘氏自是遂以忠义世其家虽稍陵迟子孙咸依以为重实有所始之矣

○仰瞻

仰瞻者长洲人为大理丞以持法称当宦者振擅命人争附之朝夕走其门惟瞻与薛瑄及少卿顾惟敬不肯往振尝怒瑄不谒因卒沈荣事遂坐瞻谪乘障已而尚书俞士悦等言瞻抗直且据法不敢阿不宜斥弃者乃使复理其操裁益峻竟以不能骫曲失当路意谢归卒瞻少尝师夏时及贵事之尤谨经其里必式过门则下而趋敦行自其性然

顾惟敬者吴县人与瞻同为理瞻事起并及瑄独不逮敬敬自请系乃出之吏蜀未久罢敬尤畏慎居平不妄出一语得年八十余

赞曰李离为吏以死守法张释之当犯辚以金不敢动摇彼其为法吏宁当有所阿哉若其不谒贵势无所陵折可谓刚矣时皆喜趋和承意不敢引当否至疑瞻卞急惟敬素长者乃能与之进退亦贤矣乎然皆由于瑄有所式化语云义不虚出乃誉不独生瞻等之谓耶

○陈镒

陈镒字戒永乐间任御史进御史中丞抚陝以西被边郡善于绥柔故虏亦不敢犯尤得人心荐达人才惟恐后尝举王钺自代及召入行御史大夫事诸御史咸重之不专厉威严而自惕若敛服不暇王钺继亦得入欲排镒出之会陝旱甚吏民诣公交车上章乞镒乃复令往抚至则祷而雨西人大悦又大兴发赈恤之躬行田野察幽隐理沉滞导疏川泽丰殖薮壤佐宽民力其精勤不舍昼夜盖安集陝者十余年上所以加惠饬赉宁镒者亦岁至虽召公之在西土无过也民人私相与尸祝之至有疾痛号于镒若响应者遂神明之纔六十余乞归卒谥僖敏而其弟子僎仕御史能析疑狱覆脱从轻典理盐筴除其奸乱以不贿闻僉事蜀值寇作率众二千直抵其地贼方数万据险待我乃请济师及督将贵至僎遂前驱入破其寨四十余不解甲两月又为画所以靖之策上幕府明年贼再发夹江之花溪又檄僎讨平之虽以书生冒矢石出入行间介胄士所难使者方上其功当趋贵州溺于叙之江中

赞曰国家初兴其定功基造者皆佐命二三臣至绥固和之丕克保乂非老谋长虑忠笃之老则曷以哉若镒之分陝陈常布艺树之经法而民知有恃至窃窃然俎豆之不能使人无保已惠之入人深矣夫若僎以死勤事其功乃不显人臣之义惟其所在庸有猜乎

○俞士悦

俞士悦者长洲人幼敏慧能诵学 永乐间授御史以肃敬任职称选按察楚是时法尚峻上下皆不敢苟而悦所莅更称宽惟吏坐奸利事者与重劾属所部裁荐及署吏皆走匿悦?具器备巡屏摄行火所及衣冠礼于向风?返灭火焉进参政淞淞多名祸吏悦佯若不问者已而尽得其奸状穷治之政为清倭人入寇自悦设诈激二戍至今赖之召入为大理当己巳虏在城下以悦为都御史与卫颖帅师门焉昼夜不释甲迄平进尚书刑部天顺初六卿皆例谪成化时赦还复官卒八十余悦与镒同时无赫赫誉然能荐达士其被谴怒者多为开解不避虽无犯颜争盖柔而能立有足称矣

赞曰人臣卫社稷死生以之春秋之义不有居者其谁与守叔武之复卫国盖权之有焉功虽能定所以忠上者则无方与悦值劬攘因时传会致位公卿其忠计或有所效之矣至同之一时用事者谓不能廷争庸庸随世寔亦有之若彼持构则有人矣哉悦无预也

○徐有贞

徐有贞初名理其先以豪右徙有贞生而短小精悍目光映人烂烂慷慨有当世志始从吴公讷游讷奇其材祭酒胡俨有人伦鉴讷进之俨所适俨病卧见之令为诗不觉跃起绕床曰此为日灭铉器也何意得之以进士读书中秘时杨文贞诸公在内每都郎得其试文辄叹息有贞以士所以谋议济万世业乃独以文焉尔乎肆其力于学无不究通资故绝人非有从授若星历运度纬候数象禁方既所该综而智计权畧意算又非书所尽也当正统间仕侍讲时方以虏?事乃 上言戎谋便计及讨伐利害若言不当出击者上为嘉纳至事变作中外戒严以有贞素善言兵令之河南起兵以为声援行御史事守便宜不待报使恣所为贞直驰至邳民已匿山谷不出应为谕以无恐命善吏能得民者四出招之遂大集因申约束教之司马法修器甲什伍之特不置尺藉谓事宁当任所之故士争愿効行间皆太行骁勇可用惟得当为快会虏退召还以旧学侍帷幄

先是河决张秋治者徒筑塞之乃益溃不能绝资费无算漕渠梗饷卒弊不胜事下司空集群议求善洒水道者贞自请行时欲以兴发大征役贞言不当先自扰俟驰诣彼相度遂乘遽发始渠涸冬月渐为陵陆行者道绝贞至之夕水忽骤发咸惊以为神因召所司语以工非朝夕计设徒惫益患苦之耳吾当别?方姑悉遣归又量远近为部伍先后发众得无窘聚躬履行循水所由踰济汶道泗沂沂卫涉沁沿河下濮范极水势所底图地形高下前所遣度已集乃上言水之澹违虽天时地利有适然者而人事纬经乃由作治昔禹之治水岂有他术能逆水之性哉今臣验河流自雍之豫出险阨就沉升固已汨荡又自豫之兗土盖疏恶其冲河曲为大泽夺济汶入海之道而去众流从之徙而北则北溢南则南垫而漕渠淤潦则穿溢溃防旱则舄卤千里又不可耕而食今治者欲塞之毋溃而溃愈不可止者可谓失策矣臣请疏导水所趋平之乃治其决决已治乃浚其淤因为溉濯宣节俾安流当可诏从之

惟所辟置兴立无得从旁挠者贞乃作卷埽法至今遵之纬竹大?编薄实之土石视其溃数十人推而湮之既使不旁溢又深为渠引水入之度势疏近置闸隐以金??是张秋之首?大渚之野越范暨濮又上接澶渊以达卫沁用杀其怒流随平命渠曰广济渠则异流同委闸乃上下栉比以次闭启流之滥溢不顺者堰之堰有九长袤皆万丈于是水不得东益薄济北出利漕治既底绩又大作堰其上榿以水门缀之??是堰之崇三十有六尺又十分其长以?之厚门之广视堰之崇而厚二十之??是厚视门崇视堰而长百之其疏凿视水之性而渠闸乃少引之北复作闸龙湾魏湾积水过丈则泄之由直沽以入于海又以蛟螭溃??是置金铁焉且与水相顾凡沉之数万斤盖作治三年始者议大兴役贞请蠲河漕牧马庸专事河省费不啻十之有以役久聚沮议者上下之贞贞守便宜言河薄洛之水为赵魏患者自古记之矣臣非敢必有功顾奉上所指措不敢不力上悟数劳问倚之专故迄就者由信任也归擢贞副御史大夫

至景皇帝弥留际众方危栗不知为计戚属张輓张軹候石亨寺人曹吉祥谋之学士彬彬曰此社稷功也顾彬老无能为在今惟贞经济才往图焉其可亨雅知贞遂以二月己卯夜就贞言之贞曰 太上皇非以佃游出天命未改归而揖让人尤属心今奉以复辟天人同符因为陈计亨等去二日辛巳夜复造贞贞乃升屋步览天象亟下谓亨事在今夕不可失密为画所以发状亨輓小语云今虏薄城事危且奈家族何贞请因声言纳兵备非常谁当疑者遂仓遑起贞与家诀曰事若成宗社福余无复顾矣独驰去与亨輓及太鸿胥杨善收诸门钥夜中纳外兵卫士愕不知所为禁无得出声既已尽入取钥匿窦中鼓进之响振远近夜色犹晦众惑所向贞曰时至矣不可后亟叩南宫门辄不可启撞之俄闻开阖声隐隐内中无烛亨等入 太上独出问谁耶众皆俯对请登极挥士以辇进贞翼 上升遂及 皇后同行天忽开朗日月皦然 上顾问贞谁对以都御史徐有贞 上又曰此事出卿耶朕失遇卿矣盖贞尝侍 上讲登殿始辨色钟鼓鸣群臣入犹惶惶已乃知 太上复立喜甚中外谧宁事俄倾定景皇帝闻钟声知为 上曰兄好

癸未进贞司马又论定策功封武功伯赐之诰以升华宥密谟猷尽善爵三世又赐章服一日三接顾遇甚隆使命相继 上不时召对或已出复入万务庶几皆与畴咨虚已倚任贞亦以不世遇慨然思所以致治为万世利极虑安危有所创裁厘择时进密议人不得闻始渐侧目不便诸贵近矣且语曹石等遇遘会成功当思抑损以示人臣义无顾私岂其一有所出敢徼 上宠哉遂愈嗾贞每有陈请或不得则怗谓贞所沮恚不已会 上有所赐王带先以许钦已又与贞益恨之御史杨瑄论亨吉祥侵夺民事 上又善之谓敢言乃同潜愬贞嗾御史将图害之者 上为解慰不能释阴使人伺贞对承上语以机要不当泄者以质之 上乃惊谓此密与贞言汝安从得之以贞所宣示告遂疑之眷渐衰益进谗诬毁之造危恶语诽时政托给事李秉彝名上之时秉彝以服去久逮下请室论不胜楚毒死曹石又言此贞客马权以贞意为此李死灭口贞宜知之者

上虽怒犹念其功姑贬斥之又上急变激以异谋乃复追贞理之适风菑作贞已入亨等遂将死之上见遽令出就外厅乃得全掠治权尤惨令承状终无验权请至廷当有所言乃获对大呼贞冤听者愕不敢诘遽引退适门复裁焉上颇感悟宥出贞犹用前诰有纘禹功语为不臣者谪徙之绝徼贞自以负于时独思咎戾无几微介时有守臣诋罪或迎奄意辞连逮贞上释不问后数思之欲召辄为相贤沮止居久之上益念不置特诏使归田里贞既得返屏居一室谢绝知友宾客自以于易有所诣愈益玩之其有会亦不以语人既精占候一旦观天文云曹石当败其被祸乃不但若所中我者已果相继即其罪至宪皇帝初赐之章服晚始纵寻山壑随所之流连不舍俛仰慷慨时游于酒人中酣歌狼籍酒数行已往起舞相属虽寓之宵冥恍惚而忠国益主之念惓惓不忘若所赋咏迭宕无所之而奇致可想书散在人间得者辄藏之贵甚亦习黄老言有神仙想惜未能升陵喜夜与客语或遂彻曙兴至孤往冀有遇之又或谓其有异术能变幻者至其雄沉有深槩卓犖精识善谋能断为一代宗臣岂虚乎哉

赞曰士当无事时雍容济盛治然犹称焉及制变图难定倾扶危决策无濡忍之意存亡以之此其谋烈顾不丈夫哉且其身尝贵为彻侯受辱狱吏不耻谓不能裁耶人臣义不当贰一旦被污恶言不以死明责谁当知者若有贞事无可疑何至今论未定也或以于司马死罪之夫于诚有功于守若城下之役与乘輿南旋信预有力焉至南城易储二者谦既股肱大臣且独亲信何无一言争而谓其犹有翊戴之意者将谁欺哉不有所废其何以兴谦与贞本无怨而势适然尚何云贞之卒废由南阳之媚功乃谓迎卫之举无事者又何其重诬也传有之使好我者劝恶我者惧乃易之矣惜夫若士权忍死以明有贞虽任安田叔之义又何以加焉

○叶盛

叶盛者昆山人官给事中当已巳师溃盛廷劾将帅失律亏损国威请置之法然后饬师徒励神武为必报之意时咸壮之命守主兵兴事中外方严疏六七上皆几重最者既事渐宁封赏未行又疏上死事通政谢泽等宜蒙钖赉以劝封疆之臣其失守分地不赴难者久未正军法则何以惩不恪宜论之如律时有议留重兵屯卫疏言守当在四封今日之事阨关要远侦候而已向使独石诸营不弃则土木何以中寇紫荆白羊能守虏岂得阑入哉若聚兵内地示之以弱如远近之望何迄虏既慑威輿驾且旋有龚遂荣书上公交车言迎奉当如礼用事者意难之不敢以闻盛谓此群情所向岂不可因以动上哉遽白之有诏令进虽未施用而盛所持论一时为倾迁参政山西都御史李秉言其知兵便有意谋俾乘障独石时新中虏城砦多废所以绥缉安之缮治垒壁使急则入保亭障相望为棊置连络势又以边人不知礼义设学教之辟致有儒行者数人为之师遂兴于文学与中土埒初鵬鹗灵州诸属城相去远并沙汭无休舍行旅患之既为之置邮又十里辄亭焉具刍藁糒粮烽燧相接以备非常商贾遂集渐充实矣地多斥弃且为豪右据田牧之军兴役无所藉不浚削之下则移大农请而调度恒患不给乃

悉汰出之并教以垦土树艺法使无所出再岁始薄入之为调而自将率以下占地有差由是土益辟治公私皆赡以持服归

天顺初二广以各置率不相统军役无时兴期又不如所克辄无功乃以盛节制始开府梧州与征蛮将军同镇之及驻兵据要害设戍守又以塩筴赋于为置关焉榷之塩实夷蛮所急私贾不能禁为薄其征而听之出贸易故公有羨利而筴亦流通不壅法至今赖之然竟以被谮召还改守宣府以堡壁隳毁至则力兴复聚徒作治边人纵逸久始役颇患之乃坚持之不为恤数月计筑七百垒自是畜牧被野无寇扰

成化间进二秩宗复进少宰受命视虏河上疏言穷讨非计宜益斥地筑垒募士侨土相杂教之使服习为便卒于位 诏追恤甚隆谥文庄盛虽官于外以善着文名时南阳李相实忌前恶盛者累谮之不行乃云盛尝非薄其文者始銜之故其罢岭外也 敕谕代盛者有无若盛杀降之语然卒不能退为公论绌若他时使者在外一言忤祸且不测矣故时谓李无休休度然未为甚也盛所著书惟水东记存

赞曰盛为谏官屡廷争引是非指用事者数忤不顾其诚直哉然才实能经变图虑缓急可仗当夷虏并兴折冲之任恒交揆之作镇方陞遂乘胜千里边侯不竦其所规置鳩繕用恢崇我王略迄于今是赖可谓重臣矣哉尝有所保任吴祜以事败遂终其身无所荐初以人伦鉴士归向之卒乃谓以虚辞借故谤议及之若其恬于荣利每进皆以危殆委之忘身殉节官下岂易能乎

○徐 徐 蔡 蒋 刘
徐 徐 蔡 蒋 刘

徐 徐者长洲人始选于乡为文学掌故擢给事侃侃激直言论无所假出僉事楚其劾治乃尝依仁厚与为文恶者异矣介廉甚行不赍装尝蔬食布衣或以既有禄秩何用为尔 徐故自其性无所改

蔡 蒙者其先在宋直焕章阁世洪始随而南徙因家具区山中蒙甫年十一县道举充弟子守况公鍾北其气貌抚之曰此子他日当如我者诵业春秋时临川聂大年教晋陵从之游累试诵通升于国学尚书马公昂才之以剧曹章疏俾之主守无不当意数月遂授以官都尉处州括为浙重地都尉佐守为理乃推行义惠吏民戴之山出银聚滑祸少年骚动郡邑命宦者来视贼将断道邀之夜半候者以告蒙遽驰援出之然势已张方欲发兵讨蒙请无烦当计取之遂以一骑入众愕不敢动不戮一人止取其倡乱者俄倾定以功迁守南宁尤在蛮夷中蒙疆力能行其政下皆畏之田岑氏与其族争?理之岑氏德焉故其归送之数千里外

蒋 廷贵者宋侍郎堂之后也堂守苏卒遂家焉廷贵少时业博士有敏思以进士知乐亭惠爱行焉岁侵役繁为之请宽其赋六七建州役兴守以贵才委之督诸县调轻重得其衷事无不举者县故僻前令多苟而苛贵能以身劳焉悴之不恤卒以死官下其少时入都尝为诸姬拥之遑遽绝袂去故见谓介

刘 竑者其先在汴徙家常熟知浙之缙云民素剽诡称难治尤勇于私鬪致杀伤遂

逸不肯就吏竝故缓之使出轻重论无脱者有妇戕其夫不承为默念之若有告者一讯而得惊谓神焉版所载田上下胥舞文乱之竝奋为稽考正其籍众称核无不服赋因以定穴产银争所由兴而吏因以为又为请罢其课而禁凿者使者行境内皆以贤书上考移知定州俗劲悍能柔之以文教武吏恣横夺之治竝取其卒绳之法缉不敢动

赞曰良吏之于民若苗之植而善耨之又从而壅之日益而不知其徒文法教导为乎故有身亲隐之谤讟之不恤而其要归使卒就功为利无穷若哺之长者论议常依正直用法能流其惠蒙虽其廉不如然当渫恶民倡乱不烦兵服之所全活者众矣廷贵勤其官而瘁死竝之治剧县皆有迹可纪亦贤乎哉

○陈鉴

陈鉴字缉熙正统间任史官以法从讲诵 禁中奉使朝鲜不辱命为祭酒国子时有以饗殄弟子赢钱为不快于前祭酒邢让者因及鉴鉴以身为师儒宁当对刀笔吏辨遂默不语用事者怒皆罢之未久卒鉴操行无所污特好古嗜书多蓄之或为累且为居室侈之未及献焉而吊者在门迄不能定也至今甌皆流入他室人又言其父谪戍辽碣母更适人鉴少则依黄冠既贵因奉使求得之与父丧同归亦为孝矣

赞曰陈鉴之始本由贫贱尝依父友野夫黄冠而卒覩会有以自见奋其智能才多所善出入周卫时亦被眷逮其结鞅东驰箕子之国奉使称旨不失秩官国之壶士岂为素餐虽赢一钱苟以优之胡为生患 【叶胡官】

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之三

刘凤

韩雍

练纲

吴惠

盛昶

刘昌

刘珏

吴凯

孙琼 张和

祝顥

陆昶 顾昌

徐瑄

顾目?? 夏玘

陆容

○韩雍

韩雍者长洲人甫弱冠?御史果敢善击断气直陵诸御史出其上数疏发奸利事在廷股栗出按郊甸有掌故为其下所持急雍一讯遂缚得之即其罪又按豫章闽贼大作檄征兵雍誓于众为将赴者会复得檄以贼降谓虽听且变未可知往而即解何害而他使者已承檄罢散贼果未下则委其罪按闽者抵死人咸称雍善策事知兵矣已乃迁副使岭南相陈循才之擢都御史复抚豫章乃廉得俗多鬻尽知其豪奸之家捕治之吏民重足一迹天顺初有所改革仍副使山西逮系之无所坐授少卿大理寻复为都御史谏狱多所平反学士倪谦为仇诋以重劾力争释之石亨败株逮者众为上下其罪得无滥方拟以党雍谓此前代事可鉴今奈何立此名也出抚被边郡国云中简汰师徒有所黜进益固完险塞正尺籍逐逋逃者实其伍虏尝一入独石击走之召为少司马又以事出参政浙适二广寇屡不靖役无功太宰王竑奏非雍不能定者即以都御史召令往抚且重委之得专征伐自偏裨以下行军法不必请 旨

别令督将赵辅和勇乘遽至境上议兵所从入时谍者云全州之兴安有苗出劫伤败王旅断道路又新会阳江有徭横溃杀掠而大藤荔浦修仁为宿寇逋焉者众请先以兵援广以东且断其归雍谓全州兴安?广之东北喉襟新会等?广之西南藩篱荔浦修仁羽翼峡贼而峡则其根蒂窟穴也不剪其羽翼则且左右掎我而本根未除为我腹心害乃先遣邹宏廉忠等将而前合新会兵讨贼之直东方者亲率大军至兴安分出西延融江败贼灌峒斩获甚伙追之入崖菁悬峻匿又兵已压南韶清远及楚桂阳势大振遂乘胜席卷千里贼皆夺气窜乃移攻荔浦修仁分五道入以和勇高端将左孙骥将右彭伦葛宗荫将前雍自与永瑄赵辅按中道欧信将后而侍郎远主馈饷及监军御史霖等同进贼陵高阻隘发石下礮人传毒矢拒我发骁纵鏖之战每合贼辄奔益深入崖壑不可仰攻虚鼓之屡诱其投乘夜间道攀缘上贼犹以死捍既不支乃弃兵溃卤获斩级无算破峒塞五百余取其蓄聚及械器而险阨楼疏梁欂皆隳刊燔荡夷其址乃休士止舍大校阅行诛赏激励之而前所遣竑等又于新会之牛栏与贼遇疾力战败之以首功来上

雍即日之浔之武宣营焉将攻大藤询于知地利者咸谓天险不可乘且瘴疠时作虽入不能留往者讨伐终未能穷所至今贼摄兵威?守益固必设长围困之可耳雍谓兵贵速役不可淹令计不时决是遗不可为之疾腹心也围之长六百里讵得数十万兵且历时能无变乎今声势大振吾岂八?由此穷寇使复蔓哉遂誓师于原申令以视吾旗鼓所向敢后者斩命欧信高端等五军取山北道古眉双髻以进自率赵辅和勇等八军径上直捣山南巢又令孙震程文昌等二军及潘铎出各要害别攻且济师贼穷已令其帑

避之穷险桂州横石寺塘诸崖而留精锐坚壁待置械守甚严士殊死奋杀伤虽众不敢却其?机以发石者先已遣死士入其中尽发之而又募百金士潜道登其颠举燧炳焉夷方鬪惊顾寨已燔遂乱乃四向攀缘上呼声动天地大破之一日间砍关夺壁空其穴自山南大信屋厦紫荆沙田诸峻阻穷绝所无不荡夷暮止其垒诘明复迹贼急蹶之颠坠及中矢刀者且尽进至横石九楼诸崖下则岩隙万重陟入霄汉隋极益又倍前贼既兽挺撓险以死敌我缁发振谷壑余势犹激而中人不可近复诡进误之竭又潜于贼所不备登焉且百道上前后不绝疾力鏖之欧信梁泰彭显英等又各攻林峒四面合贼不得左右顾路穷绝乃尽溃计所取巢隘三百余往所凭恃官军必不能入者皆覆之蛮遂破心愿服从无有贰因?疆里其地相藤峡险固广衍恐贼复滋以田之上隆州迁焉

岑铎先以事系赦出之令往莅柳之东乡为峡后户贵之龙山峡之右掖而峡上下周冲猷俘有废垒中曰碧滩有邮传及戍者皆修复之为筑治置有秩吏择能为众服者佐之守使峡为通道无敢睥睨其间藤县之五屯峡之左掖往所置屯亦废修复之令李庆临焉而益以兵贼迸逸在外及他所未至者令邹宏范信廉忠陶鲁等复分道出郁林博白北流洛容庆远之铜鼓十二砦诸山隘穷追及高凉之海淤皆命张适等以楼舡卒往攻既已尽敌乃返居无何余孽侯郑昂等复反侧又平之自是二广皆定迄数十年无大患者雍之力也人谓宋以来蛮所据险未有能造者一旦殄灭之无不震动称快而会有忌者赏不行遭父丧免后议者终谓梧当襟喉必重臣镇之无踰雍者起复莅焉辞不得命至则为经畧尤悉又与奄尹不协遽谢归卒雍豁达大度慨然有安天下意若其沉勇笃密敏智机断提桴鼓立军门使士大夫乐死出入矢刃气意自若有王佐才今观其成功固易亦由上奉成命亶固加之构会逢世得暨其材用称一时得人之盛光于前古岂不善始善终哉

赞曰予少则游湘桂道五岭间询之父老皆戴韩之功不敢名呼而户尸祝事之其威烈入人深如此然言其所杀伤犹为毛栗传有之曰有如爱之则如弗伤信夫若司马法虽三代征伐未能竟其义亦少褒矣将家者以致果杀敌为毅与儒者守文异乎哉而其后遂微岂亦杀戮过耶

○练纲

练纲者长洲人大父坝洪武中为春坊司直侍 太子宫抗言用事者不奉法有所阿 上嘉之赐绣袷绮衣改御史为文恶击治不少避众忌之出诸外竟中毒卒纲始以春秋对当己巳时上八策言安攘兵便及虏在郊遂众汹汹动纲复上言小虏豕突是将恣其狂势易我今以 国家威灵是何足言特任事臣求昔李纲辈犹若少者且所倚惟于谦石亨二三臣宜策励之以全取虏耳中外臣有意谋晓兵势者当广择焉及召大将杨洪罗通等以兵内向屯要害遮虏归分命重将门焉备其冲夫机贵速决若与道谋迁延不断此宋人所以见笑于前也至有欲与和及迁避者此正奸人当亟斩以殉疏奏上异之遂拜御史其蝮螫敢往有祖之风寻 授之治塩筴淮南纲顿首谢云有如宗藩

戚属于宪令容臣劾治臣敢不尽死不然终不敢依违伤损中正负委任者 上曰悉从尔命易敕付之时为奸利蠹贩牢盆者众闻纲来皆匿不敢出驸马都尉石璟纵其下有所扰按其罪言之 上为褫冠服尚书何文渊项文曜等推择吏不如令为有所私者率同列请黜之且举王翱年富薛瑄 上为命王代而薛等遂皆进用始者以警募卒已而多逋逸失伍或请罪之且正尺籍纲言此曹子本义奋劳之不图又因以籍焉后何以使人者乃立为罢遣出按闽隶适盗起虽平之未折其首株连逮纲皆释之而出兵根捕又追论沉命吏遂大忤于众始纲劾何项时廉察杨珏在党中珏嫌之深因是各列上而项犹在吏部得肆憾与杨偕谪 旋又移之甘州符方下纲以服免迄不复起以卒纲性讦急喜攻发人阴罪惨礲无恩同时有欧廉者文尤深故纲特以有口称耳

曰今御史持法稍与古异古谓官邪失德不奉六条检察部内者得以糾之犹时一乘传称使者今既岁遣而政之小大无不综焉其重不以甚乎汉以前命御史监郡其行事畧无所纪若练纲断击有足称者然为文刻深郡国畏之威命几如 上矣其治虽小有益殆非绥靖和义不扰之谓乎

○吴惠

吴惠者其父徭籍里中不胜惠年十七代往役令杨隆奇之使从博士弟子学遂以进士论上为行人使占城风于海几溺危甚舟虞惧不知所出惠喻以无恐力备且祷焉而风稍定迄以无败还自卫见制地者或颇夫征不获时敛辄寓其税土著而流者渐众则征亦愈困不若为 上言蠲之西戎底贡悉由陝服来者益众皆贾人窃私其利外国且饷饔不继又以起衅而匱吾边邑请令其酋入 朝而止其余境 上待遂省供亿无算迁守桂林义宁蛮不靖荐乱我边鄙部使者议发兵殪之惠谓裔土之人未有知实蠢动无亦惟是训定之而何遽以兵既抚纳之矣武冈有证者复声言义宁相与首尾杨文伯等遂自列言所以蒙宥恩甚深胡敢通叛人势遂解在象郡凡十年所威爱并洽迁守参政广右柳庆夷窥我间薄城兵适尽出惟率门焉者夜砍其垒获首虏百遂惊遁洗氏女已字人闻其暴不欲行乃诡言造妖恶语主者为重劾惠得其情立释之亡何致其仕归雅好书有所论著子鸣翰亦名能文

赞曰光禄尝语余海之利害也不谓经途远迤即王者无外镇抚四夷岂有所拒不臣哉然銜命而使良不易惠履险如夷即其胆决不可量乃非使旨有所陈守便宜不肯让事焉所为巽蠕者迨守封疆提桴鼓战陈能勇顾岂儒生坐谈者哉或言其纵恣任数无恚愿意在官少洁廉之称岂具区故善货耶诚有之亦乌害其为济治才也

○盛昶

盛昶者长洲人一曰宋盛度之后 景皇帝时任御史出按山东匡乘马数时谷比不大登马为耗昶曰昔管氏筴守高下岁三分使民不失本事而沃壤守之若干闲壤守之若干轻重与天下相准今岂不能哉故自昶之视牧也马为繁滋又按岭外值黄萧养乱后所在凋敝披荆榛立制度所下令宽简不专以恶用而人畏之甚泷水贼又起即策

马至其所谕以德意语颇厉贼齟舌不敢动遂降之使还言抚臣揭稽事颇过失用事者意会 内苑以翠被饬舡张水嬉昶率谏官争之其语尽 上赫怒召之入将皆与杖昶伏陛呼云 陛下闻古有杀谏臣者未闻有杖杀臣可耳无与诸人 上益怒久之竟叱出明日尽逐遣之昶为古田史天顺初稍迁知龙江旱蕴隆祷而雨曰县素无污池不为备天时可徒恃哉教民渫治若干所遂殫其利无穷盗赵铎等弄兵掠历郡邑昶佐击贼战甚力迄平之进守叙州戎夷荐作叙在山藪间屡不靖昶战数胜又与督将期共攻之前已遇而败昶在后突之申孙之矢着于两耳益奋击不肯退贼忽惊众乱复进乘之遂大克使者方列上功状昶以创甚遽谢归后 玺书劳昶金绮即家拜命

赞曰昶为吏近苛然持法不贷能举操弹至犯颜色蒙捽詈摧辱犹抗言矫矫其气不少暴也乎乃县道佐宣犹为尽其力崎岖谷壑山泽之间与士伍同劳佚亲介胄面夷不避奉职可谓无负若其冯气而骄荷已重而行上不休见笑于倅溺可谓苦矣而不自知其失见畏于贪得而权竭于多取居复获讥于时庸亦才之过也乎

○刘昌

刘昌者生有异资读书数行下一过不遗成童时与诸老先生试通诸老先生人人目之即奏上都试者谓为诸老先生言已而知为昌大惊由是名遂倾以进士论上以告还益事学诵博通诸家书 景泰初授主事虞衡与张节之同被选以史事复有沮者改都水迁按察河南视掌故文学即诸掌故复荐昌宜侍帷幄蒙亲近必能有所启沃不当与外者不报进参政广东归卒昌矜抗自憙无所推与微为寡恩弘农氏即其甥遇之不甚异所著文深厚犹未离其质在豫索遗逸金石作中州文表名其书为台者五又为杂说叙论所见闻为郡志并仿萧俨载明以来文未成

赞曰吴为文者代变昌乃授之季迪而弘农复授之昌皆好学不倦至废其仕专攻之意良苦而非以为名随所肆各极其力质未开浑厚有余虽尚沿近代不至乎盛亦斐然可观迹乃至以谒请事王公大人初未窥门阙而已志在名高若为树赤帜焉皆欺世而罔之取虚誉矣可胜罪哉余为校饰厥文亦颇有传者故昌之业不坠

○刘珏

刘珏者长洲人况守时辟为掾辞愿就博士弟子学况嘉焉俾诵业遂得仕守主刑曹事丞董坐重劾谳之潜以货入珏曰吾嫌欲辨之今比自实矣即论当迁按察山西晋壤爨无蓄聚教之垦田人稍知务力穡已亡何乞归他县受赇见法以珏与使者习请焉珏曰为长吏不以民为事至以贿闻尚可使污吾耳亟去家故狭小耳姊嫠而有婴孺迎养之并为置田宅母痾亲吮之孝友孚于闾族其持已洁严与人也惠而不可干以私好学不倦工为诗书迹绘素皆善故时者俗犹质惇无游扬为声誉者士亦无出疆谒请若今纵横于衢而为文学者反借以轻重 若珏抗以清贞遇意所至尚羊自放林壑当途者敬焉过门常十余车有所咨询辄不敢对盖其笃慎云

赞曰珏以才着而行已尤无愧其尚德也哉艺诚有绝人者然所以重夫岂徒与珏

既仕不竟所为家居者久之学士大夫闻其名若不得见焉设令藉曹丘辈为唇舌不为辱此宁能令至今慕其流风也

○吴凯

吴凯者昆山人幼失父养母以孝闻尝以役征邑有贤令芮翀凯自陈欲学令立免之遣从博士游始仕主事刑部易上盗二一已毙一病所连六人凯恐并死无从质谨疗之后乃得真盗释所妄指者未几以母老乞归凯公方介立有行义乡闾化之御史大夫李秉荐之谓凯不宜弃置不用者叶盛尤重其人可作式后进家居者四十年履操既敦远近所望卒私谥为贞孝子愈亦矜廉强毅继为士曹刑名比详善于爰书具狱上视其文辞无不惊司寇遂倚书狱且荐其才行乃出守叙叙在蛮夷中不知有汉官威仪愈声实甚竦得民夷心蛮獠以马湖叛方征发讨之愈遣卒侦其动静用计取之卒不烦兵而服后复以抚之失道致乱再命愈往踰之即自归迁参政卒

赞曰凯父子为吏皆善理人虽至二千石而家不益富由凯垂风蚤自引退不以仕为急远矣夫与彼满心戚醮求益者异矣

○孙琼 张和

孙琼者本长洲陆氏子后赘昆山孙氏遂从其姓仕刑曹时尉门达方幸纵其下株逮人以飞耳目几察非常事下琼者多得平反阉牛玉养子坐奸利事琼持之不少贷或劝之数与权贵忤不虞为患耶琼谢曰知且憾深然欲尽节官下宁顾哉已而竟以事有连谪遣成化初复起遽谢归家故贫无所营恬然而已居甚隘绝甘苦体约养矜以立名方罢时年尚强利荣在前能自远所著书十卷子裕亦举进士

张和者昆山人幼以能淹诵名亦善着文举进士遂予告辟都试豫章为曹郎复以着记召出按察淞以卒节之抗直有操立不汲汲于进权幸门迹未尝及才见推一时无所交纳弟穆与同被推择至参政

赞曰仕者善依和承迎非必自其意见荣爵利势恐失之故于人虽已内心不欲必阳浮慕之不敢几微见于色而况敢显然忤权贵乎即琼治狱所争必大体不游意法之外有所宽假向背和内行修恬于欲岂有所感而兴耶大抵执已立于独无所阿彼巧宦不能甄志动惧异矣夫

○祝顥

祝顥者长洲人正统初举进士时 诏奄尹察举四人备法从召入试不肯就而出乃选授给事刑科素通达国体朝章多所纠正而未尝索细碎事务苛察 上尝令按行所立寺稍毁除之奄或庇浮屠以请顥即先令撤去不为夺土木之役适居忧 景皇帝以都御史召不奉诏除服迁参议山西晋壤瘠加以兵后益空竭徙迁者众而征输故繁顥鸠缮安集绥辑固和阜财求厚给贍为法详公私赖之济久之不他授进秩参政又以比边郡少文民不知义为博延儒生教导临汾阳曲故有更老象犹左衽立为更之皋陶里于洪洞为表其墓且饰其里名士师又祠裴晋公赵忠简闻喜程先生熙泽州择子弟

教之随其才习法律诗书不强所不能曰异时者可措之用遂各有所成才大小佚兴矣人德颢善诱咸父母师保之颢既明习法令多作轻劾遇有冤辄为平反汾州人窃为妖僭称号乃檄县道察之而自驰贼所擒十六人余以胁从弗问其所攀引且千余人部使者议弗以逆闻是为沉命闻则获止数人其所当名捕者众奈何乎颢力请作奏但言此十六人者应坐彼虽连染未动何以入之竟报当如所上山为亨县囚七人御史讯已服二人叹息颢鞠得实以语御史御史不听因谢颢襄陵人子赘偁既复生子而死偁育之长而争分讼累年不决颢按之曰偁字孤义也而专财久虽贾益饶而业由妇翁于法不当舍若何偁乃伏罪孤亦泣谓所为争者不平彼既已引咎复何较哉遂相与推让颢慰遣之皆感泣去絳之侠睚眦有独死者廉而诋之罪每驻车劳问民夹道拥观不能行又七年谢归任之久亦他时未有也与徐武功刘珏杜琼日相与游而最后卒孙允明别见曾孙续仕给事官至布政所至有声性仁厚即之温温而操尚存焉

赞曰士生以时其成也亦异若 英皇帝时羣才出焉皆浑厚不佻以诚长者处官非独政俗尚淳质贵实效自其性习所见无非敦已植行忠恕为务若颢者予闻知长老言其养孤嫂继绝存亡抚接教诱义恩兼有焉在方岳则有功德于民平居好学不厌退与二三君游又皆弘道厚伦成礼化一时之盛远乎哉

○陆昶 顾昌

陆昶者太仓人天顺间?郎刑部以系者既桎梏之鼠囓焉为置狸后乃蒙其利尤善造请不间寒暑客相过无问所从与饮食结欢而去其倜傥类陈孟公家故无余货而问遗交际不缺送往迎来既不暇而曹事亦无废迁参政以谗

顾昌正统间以掌故为 淮王长史已而迁都尉思恩昌性刚峻务在修洁与人造次无所通久益不见其懈有所过虽远必徒返未尝就人食时有论著亦要归于节介

赞曰昔赵禹谢绝知交而郑当时请诸公皆徧其行意不同而皆以名孟昭在剧曹而所游乃无择日酣饮然不至通轻侠昌狷介于取予无所苟可谓孤立即二者则昌?寡失?孟昭者有人矣哉而蹈轻薄事游媚谁阶之也

○徐瑄

徐瑄者嘉定人正统间为御史出按蜀不以风厉杀人又按岭外迁都御史守边延绥治兵毕日不戮一人而众无敢哗平居远斥候广间谍虏谋动悉皆知尝入寇孛罗池沟迎战克之又入金鸡峪双海子诸屯预设伏要遮击败之捷上 玺书加劳亡何乞归子口??少则谨约不敢有所藉成化间主事刑部即善书狱如老吏务尽隐幽然不以深文诋人罪司寇太原周公特深许之除参议楚主馈饷为正事典稽慎新旧出纳自其手实不重烦而不可?伪尝述职曹令吏对簿遂自免归居平友悌日与宾客饮无所治家生

赞曰瑄举宪不倚法而削在边有威惠未竟其用口??善负荷克承先业着绩于外仍父子俱退优游以终斯亦海濒壤裔能自奋者矣

○顾目?? 夏玘

顾目??字敬顾于吴为着姓父巽永乐中进士以疾不就吏目??正统间为庶吉士久之授行人满一考乃用荐为御史治盐筴山东已又复使值岁饥为停其法有所施舍而人亦不敢犯议狱缓死以佐荒政时太保王文为御史大夫数称之满当代民乞八?田从之迁按察闽免又为守贛洞穴氓犷时出剽郡多匿不以闻目??以为是不一惩而云抚愈骄之荐蚕食我何计之有乃倡言用兵事迄平之 诏赐以金绮目??才长于?理人不能欺子余庆既亦以进士起家故蚤自谢免居久之卒自入官几六十年从容进退有可称矣时又有崇明顾谧者仕刑部郎亦以不说众蚤自免

夏玘者昆山人为应城令有治剧名调大庾入为御史按军实浙其所藉为士必简无滥亡何谢归以孝养称于世少善饮毋戒之即止绝及丧之尤如礼四十年不造公府谒兄弟三人友爱甚至勤身薄奉已绝甘分少有无是同终其世不异居也

赞曰书所谓三揖而进一辞而退信哉君子之节慎于出处也若目??盘桓久之不调与夫出入三肃锐于进取者多乎哉而玘又蚤谢谒苟无忠谋便计补民益主何徒干禄为也士于利荣稍能自抑非内量已殆亦时哉其用晦乎

○陆容

陆容字文量少治掌故业而诵学诸经兼通之人谓何多学?取青紫顾在此耶容笑谓吾自求通经非有他慕与张亨父汪鼎仪善叶与中尤器之成化间为主事验封又历职方武库当虏急我封事日三四上筹划方畧累数千言皆其手出而动中事宜西域贡异兽至嘉峪乞遣使以兵迎之容言兽非其土性不畜且 上方罢献而何以迎?庸不取远夷侮也交人廸屡未静议声兵讨之容言不当穷远畧且久臣服未敢显叛我而遽加之兵险远岂谋于万全者哉时以为然锦衣今之肘掖韦映者凶狡方幸用言者不得已罢之又谋以告反者复几幸容言于尚书疏上竟论死而被诬污者皆得释往告变者赏重故妄诋以妖恶言辄坐容请分别之无滋滥自后告者乃衰有倚中贵人求将者执不下乃言之 上召面谕旨容对以西南夷重地将非其人启衅生患怨结于夷异时者臣不敢任其咎事竟止容以小臣抗言在廷?聳已而复有所欲用二人都督者容益持不与言都督今之大将必有功后授彼何者遽敢请乱法擅命以私市此而不惩何以杜幸门正威罚 上从之遂着为令他所论国马与谷籍轻重设版法致民田牧又陈事四及选卫卒益实之皆经国大者迁参政浙部其所发奸如神又列便宜十余事上之悉见从以计入论漕渠利害语侵时贵益取忤遂罢免容素有当世志其所守官无不竭尽有可益国便计即未能行必疏计之事亲孝疾则累月不解衣夜尝醉归毋不乐遂终身节之持服不离所庐踣步居凝然无喜愠色若不可亲而与人则深相恤嗜书多所博综亦时有所著若式齐菽园州志兵录诸书有传者

赞曰文量侃侃谋国竭忠其论将也必才武而功多者乃授寄请依附痛裁之法除道穴左右一以正格之 上亦数听明矣哉适时之盛乃能以小官数尽言容下守法岂易得也虽未竟其用然所论议错施有可观哉若今妮妮小谨视当时激直如彼愧夫

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之四

刘凤

吴宽

孔鏞

程宗

徐恪

李应祯

章恪 陆鉉

姜昂

杨升 朱棣

枚伦 吴綝

瞿俊 陈琦

刘纓

刘杲

陆完

都穆

杨循吉

赵宽

○吴宽

吴宽字原博长洲人未弱冠从博士游虽名一经喜博涉兼通之日览记诸家书数千言时着文雄郁独高之屡试诵通辄不在异等久之乃升国学时张弼卞华皆负气一见不觉折下徐有贞重其器量曰必当起佐王?贞臣顾以数上不就欲谢罢使者陈贤敦劝乃往遂举进士第一授修撰侍 孝皇帝东宫其所匡益日新辅翼 圣德实有赖以修 宪宗书成进学士至少宰掌纶诰仍侍 武皇帝幼学以会典成进位宗伯既再居审喻德行之任以礼乐交修内外弼成 元良当世荣之遇讲学少间疏 上曰东朝于学自风雨之不时寒暑休暇岁不过一二月日又不过数刻况又有间之者古八岁始就外传欲其近师保朝夕习业众庶且然而况奉神灵之统者乎借令诵习于内何若御讲席延见儒臣访咨弘益也 太皇太后方议升祔礼未有定?引闕宫诗姜嫄祭于别庙春秋考仲子之宫明惠公不得私其母未尝祔也宋虽有并祔者作而不经岂足法哉从之

又议元吴澄祀于学云礼所谓命有司行事祭先师先圣者以有功于经者称师焉故别言先圣谓不责其全也若杨雄马融皆于经有功得祀焉则澄何可废也宽之学无不考而能折衷以意于经制损益辨而加之敏性恬于荣进人或谓之淹而每拜命深执谦让自其心非矫为名众望宽为政久而竟未及用虽在表署暇治圃日游焉宾客过命之赋咏益厌厌洽也年甫及数引疾乞罢 上不许亡何卒重为悯伤所以饬终礼有加等宽为德也崇天下重其人至今思之然莫录其行起居状略尝询故老言其于平生交为能死生之贺恩与同乡赋止所寓卒遂丧之何耕者尝与游弟坐逋税耕罢乐会令归使者牟俸方为虐即捕捶楚之宽倾橐装且贷请为之偿下士不问贤不肖及幼少皆为折节若沈周辈与伸布衣交士因宽得名者众人以志铭请未尝却故因获附以传所著书皆行于时

赞曰吴公当熙洽时以醇德居辅佐赞翊朝夕谟明弼直公显百世其度固有异哉方其困?时人谓公戚何以彼其才而令久悒悒乃不以约有所诘及侍累朝次当迁人或先之公不以为濡滞也当进对每辞避此其诚让有师师风古之人乎不可得而见之矣若其学尤邃于经术议必奉以从无所阿曲其格正为多而一时礼乐制度彬彬质有文武焉可谓盛极固多君子哉咸以纯质敦厚济穆穆之治休哉 国家文明之会也

○孔镛

孔镛者长洲人家本阙里父友谅永乐间庶吉士为令双流人陋不知学谅教之诗书选秀儒亲为讲授自是始有籍于朝仕至通显者邻有寇逸境上自行掩之悉得计上对簿功最 上复策之对又善令入侍未久卒镛以景泰间进士初为连山令故越在榛莽寓治他所?剪荆棘立邑屋招怀绥集使治耕稼务以靖之境因渐辟道路无壅迁守高州高亦数中夷寇镛至即发其子弟率厉之躬自行奋击摧锋所向辄奔斩捕首虏五百余并得所掠民四百五十人降其众万余剧贼邓公长复合众据茅城距高不十里所猝无兵度已亟乃单骑往喻贼骇挺?夹道欲恐胁之镛故徐行抵其所下马据中坐极言利害令解散即为良民何阻兵劳苦为酋长尚恣睢未有降意镛徧历其垒晓以无为惑误不得安田里从容归夜漏已深城中疑以没贼望见公来大惊及晨自归者万酋长知众散乃亦请命余寇在雷游鱼博白相继破降之使者上其功迁按察广东仍守其地以忧归州人祠之

复以御史大夫抚贵州贵尤在鬼方有曰溪刺者刺勇而溪善?兵?江甚且以贿交诸祸恶吏时■〈言同〉我动静?持其构镛欲询诸将知不可乃之清平择所部可用者王通优假之且问以所急通以他语对乃屏人诘以与溪通状通猝愕引伏谢曰死罪有之然言之恐不能济则齟齬首事者坟墓矣虽公庸不伤威重哉镛曰何至是遂悉言所以且曰若通无能为必得曾瑞乃可此两人者溪所信可刼之伏镛秘之他日者曰吾欲使行徼谁可者乃以命曾曾入谢谓之曰尔何得通贼曾惧不敢对曰无恐第为我谋曾引瑞瑞对亦略言溪刺不易制者镛曰徒为我使其出吾自取之瑞乃往见溪溪迎问以

新将若何审计策瑞曰易与耳不足患今者来见道旁犍穹然巨试以牛往鬪溪喜欲得之瑞即邀与行又言梦恐非祥使卜卜又不吉颇惧瑞诡言梦恶得吉且刺以勇闻今不行岂怯耶刺乃奋励行遇曾以众警道上瑞言曾新被命宜谒之且请去佩刀为礼溪刺见曾曾佯曰你素谨事我今我行部尔何不亲扫除见供张而敢易视者溪刺以狎不虞有他曾遽麾兵擒之犹手格伤数人以献磔之境上蛮惕息不敢动召为少司空卒富阳镛重厚少文其功在西南夷为多忠诚体国知无不为而未尝自列行事具在所报牒每载以从即所为爰书皆吏议称平者亦以是无传焉

赞曰韶文质谨以忠信明察之长称至所建立乃赫赫有武烈焉故时者吏必尽其职不敢饰情妄有希慕即镛始终于外从事蛮貊忠诚不欺其志而有谋策倚神灵奉威命故能制其死使辑宁无患可谓封疆之臣公笃之虑然不置之内者亦因所长用之不者庸令久为军有司掌诰禁达险易死行间耶

○程宗

程宗者常熟人成化间仕主事至御史大夫时相安贿于猛密欲使刘职方往辞宗方有服遂举之视师云南喻以意宗至咨之抚监使者吴诚宗言其不可状宗怒曰内嫌此久正谓若不能任尚敢尔诚宗忧愤卒遂招罕弄弄轻之顾邀宗来抚不得已而往弄益傲睨辞不逊随啖之货故时夷谒使者至廷伏不敢起兵左右夹之至是宗乃延之坐遂为请画分地世其官相安喜擢宗至司空猛密故属木邦叛之自立西南夷不平以兵相攻久不靖 敬皇帝时斥宗

赞曰宗以庸庸致位显荣无足言者特已命使出疆得专断不俟报而西南事乃从中制贪者兆衅数年所残伤不胜计且使轻中国恣其桀傲决夷夏防慎哉后所以馭荒服其无以浚利之臣也

○徐恪

徐恪字公肃成化时以叶盛荐为给事所上言简质可循而行出参议楚岁荒行流民荆襄举刺郡邑吏二千石劳来有意九年始移河南 徽王自辟署恪谓不应令阻之

王怒上言恪 上更直之 诏谓恪守文吏何害王其勉自爱者河徙汴有议徙封社城许事下恪恪言不可者五乃止就拜都御史抚豫司农以民所负输不入遣使督之急恪言湮浸后尚未苏请俟其息许之汉上与郾蜀之夔皆相去远故盗作屡不能治请别为省下诸使者议恪独持不可遂罢而特命使者作监于郾恪在豫每以义格正不为用事者所善有求又不应潜之 上知恪忠复使莅楚河南为之罢市有司以帑金余几所治行恪愧谓吾植行未耶何不能使人无薄已者楚闻恪当至欢若更生适始建藩封使旁午于道坏盐筴私其利恪捕其下致之法贵幸愈不便恪共沮毁之 上益知其诚直进少司空不由外论上众惊焉恪遂力辞云初未尝敢以调要 上又谢绝知交孤立任一意欲有挤口拂违何自而蒙拔擢似有阿附者 上为喻所以用之意乃受命其任共工慎惜财费诸所缮治勾计详密百工饰力比材不使失秩裁抑不急权势有所干峻拒

之滋不悦恪累以年及请不得满六载考上疾作 赐安车归言者犹数言恪敦重守正可属大事欲起之会卒自以受 上非常眷不有靡躬竭节何以称塞已负无可言戒其家慎勿以追恤请者生平慕魏公骥简素浑厚无几微间故功名畧与相比其介廉自性植善为奏每疏白事皆曲而致纤细具如相对语在外度力所及无不为遇裁异必力陈所以消弥指切时弊未尝有所畏不尽

赞曰恪仪观甚美伟丈夫哉其所守乃不可夺不以文学议论长而遇事是非蠡起以一言立断推诚体国公谅之有焉虽数忤时遇 明主知谗不行得以肆所为固亦以见 宪 孝间得人盛无不侃侃闾闾谋议可否中外相应越有成迹岂偶然哉

○李应祯

李应祯者长洲人一名牲又名维熊与弟应祥孪生少好学尤警绝多通景泰间选于乡中贵人牛玉欲使教诸阉要祭酒必致之避不往已而授中书中书故待 诏殿廷有所供方牍或非其人雅不乐乞为掌故不许适命为浮屠书疏言为天下有九经未有以浮屠者大忤幸 上明仁薄其责乞省毋归竟罢中书迁南曹郎未上久之始拜职方迁尚玺满一考进太仆亡何遽谢免当其为中书时郊祀礼成宴群臣奏以中书载笔有所纪旧班给事御史前宜复虽不能从众黷之襄楚流民所在满议方逐之又言民有居久长子孙者因为土断立郡邑抚之耳此前代事不遵不虑将复为罗尚耶卒如其画使至湘中念吴云尚书死殉节葬江夏为访其后述扬显之祯体貌严峻衣冠甚伟而煦煦仁爱推毂后进成就之惟恐不至尝与交虽甚疏必恤其匱危阽始终之季弟早卒养其孤又厚分与亲戚贫者家故狭小卒之日殆无以葬其书学柳公权人多购之所著有范庵集

赞曰应祯嗃嗃矜严有威人望而敬之贤乎哉其为中书也与诸待诏者杂处诸待诏即默不敢出气独能有所献替争事体格正之义后得藉以为口实谓官无以卑既备肘掖而忘所事徒请大官粟为其出在外与居里中远近慕之行义犹有足称者矣

○章恪 陆鉞

章恪字韶凤章珪子也恪为郎刑部诸以讼自言者推至诚待之人无敢匿其情称善为狱迁按察岭南行海徼有琉球使人市易他国风于境上海有司执焉欲以为戮上其功恪不可疏言夷素服从不能恤其患而因可助天为虐卒资遣之再领云南符缅甸反复绥之诚信遂皆归心已乃入为光禄南京又移大理无何乞归恪陟扬中外更五十年再至九卿其功名亚于吴讷而长者似之

陆鉞者昆山人以进士第二人官编修预史事侍 孝皇帝东宫以经义日陈之善开导其所启沃功多论说皆见听纳甚欢相得及 嗣位进太常日侍帷幄益亲忽被疾乞归遂卒所以追恤良厚鉞性沉严寡言笑嗜学亦工为文自矜高人无能当其意故或目之隘所著书长于春秋当时有传者

赞曰章恪之始由治狱史遭时执已不失法理用以宽平得称其为士越在徼外将

我王度夷裔往来轸其行李后乃益崇久于官寺惟是忠诚迄无咎耻鉞兴自儒窃微以名抗已甚骄谓人不能辅养弼匡方藉经术未及有所发明得谢为幸获福已盈

○姜昂

姜昂字恒俯太仓人成化间为枣强令清静不扰庭中常寂无哗雀俯而窥人称为仁令召为御史论方士李孜省被杖已而迁守河南一月县令自解去者三四人吏民传相敕厉无敢犯鞭捶悬而不用暇则喜读书终日宴然俄乞近地就养得移宁波人素闻其风不劳而治秩满不迁遂不上考径归卧久之进参政福建辞不赴疏请养数年卒昂廉厉于去就尤慎平居惟蔬食粝粱之饭家人不堪至子弟学书削方不得用县官物宾客过从未尝为设虽算器馈亦不轻也其有请寄一切无所假故时称介焉子龙举进士俶傥宏谅济以宽衍官按察所至流连山泽诱接后进亦好读书称博稽杨慎尝与交有文学名

赞曰侈纵之愿其弊所害伤于何不及约厉之过径而寡失若昂者足已自恃矜奋绝俗无侵然诺虽不能合于时取尊显然视藉位势招致喜游子弟张陈党援而卒被轻媿名亦旋踵败昂不外交矜谢绝专一意乃后蒙其福远哉可谓贞一矣

○杨升 朱栻

杨升字起同吴县人弘治间以进士为庶吉士除给事慨以论议弼违为任会上方诏海内直言无隐升随事有所规益奉使辽碣素羸以劳悴得疾值奔母丧卒妇孕且未产已而得子伊志能续父业累官御史大夫志初为刑部郎视狱闽流矜慈恩闽隶多所全及为方岳煦煦称慈仁尝为予言仕无失长者家儿意为难即使介廉才用白黑竟何辨又云尝授之君谦语云?恬退谁相推引者此可观世也

朱栻者昆山人成化间令萧山其赋于民也平人人自谓得其所使者遂下其法以为县道式寻召拜御史所上章疏皆救匡阙违敦重持大体不为峭刻然风裁特着于时亡何卒

赞曰语云事以蚤知功以夙败所出实为名高而未暇为他计一不得逞则俚赖无复之而悲愁以死其遂得志肆所为而又以内热攻之不久而死等死耳而二者之得失何以辨乎若升称奉职死官下可耳未为遽而后乃食其报栻亦奋不顾身欲有所効之而未竟其业要之皆自喜不媿媿欲速好进虽趣奚憾焉

○枚伦 吴綌

枚伦字彦常正统间主事刑部天顺季年乞归养久为郎官雍容而已无躁竞心时贤之故疏上其名荐达之屡不已至成化中始复起南刑曹持以宽仁多所全舍俄拜参议湖广主守祠祠事故简益务清静数引方士治道术者与修习导引辟谷长年方遂无意仕进投版归

吴綌者成化间为郎刑部静嘿无外交书狱辞务在宽全之未尝作重劾按人且畏慎言不出口为法吏十八年始迁参议贵州贵又绝远未尝以为淹也弘治中入 贺至

燕卒旅次

赞曰仕者之希慕贵荣急进取自非其情亦势不得不然其有度不任则让能而处其下耳至无所谓而优游卒岁久之不调此非恬然有廉静无求之操乌能尔耶若伦者宽和有恒奉已约清于通塞之间无所系吝称可与立岂虚乎哉緤之静退不矜含垢?量两人行已有相类者而卒之落落于时固亦其效与虽质谨无文与彼佞令者异矣

○瞿俊 陈琦

瞿俊者常熟人令崇仁廉爱不受请寄召入为御史出按岭口及滇持法不贷错直清而閤以惠不辜滇与交夷壤接数不靖以柱后惠文弹压之遂皆率以听又奉 诏虑囚所宽宥甚众持服归复起掌谳狱尤以敬慎称 上又敕令视徼上按军实搜乘简士大称 旨迁按察岭南故珍货所出抗以介严一无染见有渎污者面谄让之人益不堪当上计遂径归使者数荐于 朝促上道不行性方而毅寡所合卒之日至无以葬亦有所著书

陈琦字粹之本以医占籍成化间为士师属善书狱不游意法之外迁按察豫章务禁绝谒请其行部惟饮水齧干米?葡萄苦人不堪遂以严见弹世家子占陂泽田者无所下水琦知之即日至其下决疏之还陂于官风裁倾一时迁莅贵州寇乱方作琦乘城为备且素无可恃徒作厉士气死生之忧劳尤剧里有儒生格过人被杀官执所过者坐之琦曰安有杀人自置于门不避耶讯果诬使者按尺籍引平民伍之又为力争令自首实而出者更众值当上计大弊羣吏与考鞫水者适在位乃罢琦归而萧然一室无以朝夕部使者知其贫月廩于公三石南州人过者犹望其闾拜焉

赞曰士尽节所守岂暇自为谋哉故苦体清身厉志不侵污而后能莅官行法人不得干以私俊与琦皆起诸生为法吏至方岳而家故益贫岂非自其衷有执不以富贵易其趣然乎近乃仕未久而富遂倾闾里专以恶治所谓吏以赃败后思其功当复起无以不任职耶然所取舍抑又不逮是矣何足论为

○刘纓

刘纓者本清江人宋学士敞之后隶籍吴成化间为武陵令其按事即如老吏有以赋籍于里而亡粟者罪抵死为书其牒守视不谨非侵也传轻劾使者深以为无害起复为滕县益明习法令妇以罌至?所者有挑之不得诬以盗令以罌与为俾告者负负一?辄堕乃伏罪召为御史出按闽讯狱所平反者甚众民有刲股于母所嫁者父有司上其孝书下出母恩已杀而况为所嫁者伤遗体得不罪幸矣关市挟轻重以私泄其利外国以为亏国体禁楚之尉有阴養士恣横畜他计者掩以从戮得无变其发奸如此往奄孺多取闽隶乃市良家子累数百?驰往阅遣之人尤感其惠任御史满三考值权贵方擅命有所损伤在 廷无敢出气独持论依于正时出于从容规讽以逆折其萌谳狱以冤侵成之者即?覆出之亦不至大忤也已而擢太仆进都御史抚蜀蜀故险远外与夷壤相错衅易构往未尝徧至也即叱驭驱之在所?宣 上恩逮之当奉职贡无从逸也俄与告归

又以荐者言其治蜀状不宜久使闲者遂再往莅诸番方溃横出为盗虐境上乃亲偃以兵威服之为方畧捕首虏千余且安辑其逋逃捷闻有 诏旌功焉横梁道满江废关皆要害为设隘守边鄙始安会逆瑾召诸抚监以例罢至秋复奉 命临楚又以在蜀开夔抵荆道避峡险不先白也怒瑾逮使置对一时争为之言得释 荆王有所诬守臣遣法吏即讯又为辨得轻论进南京大理卿召为侍郎兵部民有应募为兵者欲廩食之议谓廩则籍于公不得释彼以义奋一时而遂谪戍之耶乃罢给进司寇及一考遂力请归所以加 恩良厚居久之年已耄少年为尹者侮之甚人颇愤不以介也故尤以度称亡何卒孙城进士第二人为编修

赞曰士能弘功业济时变权不可槩卒成遂之所匡益政俗底宁邦域为利无穷岂与夫坐谈者高议三代而不亲事徒以空文见乎纓当正德间诸贵用事贞不绝俗和而能立久于其位践常伯尊用于朝阴行善使从之不觉为惠利多矣其后能无被之哉

○刘杲

刘杲字世熙文恭公再从孙以进士为郎刑部其详献能稽慎之故事诸曹所决狱必过廷尉又听之乃制刑其所书辞以所上多寡为考任久之书下者不十一故得迁大理丞中法调外历按察典藩方其在豫章也选士得广信夏言迄为相力请休 诏进都御史赐归实异数也归而抗其法宗人故合族以食极于盛公为郎时尝病亟自以为未也后且当受其福故卒自愈所取夏相亦数致问子炯举进士至太守汀州而炯子璧亦进士仲子琛之子倬举进士今为御史

赞曰自昔保姓受氏守其宗祊数十世无失坠其先必乘神灵有功烈笃不忘故能受宠禄屡有发闻富贵福泽燕及子孙岂虚乎哉御史大夫公立于朝风节矫矫虽其事不槩见即其后乃炽昌非能廸为世禄之家率先惠绥之然乎故曰祸福无常归于有德者也夫

○陆完

陆完者长洲人自为博士弟子以羣击为妖惑者方士抚监使者王公恕奇之力为奏得免历官至司马时寇起山东诸郡遂靡溃不可遏稍至畿甸纵横殆徧遣将在外者遇之辄衄乃命完讨焉建大将旗鼓从中下秣马蓐食昼夜驰至临清调集守边吏士迹射欽飞骑四出掩之屡战皆捷在河南则都御史彭泽在准则张縉或掎之或角之贼既败窜复散逸楚晋之郊无不警虽斩捕几尽已复集俟间则突至破城邑残掠自如几成变乃广间谍远斥侯迹所向以兵随之势始大蹙奔而南有 诏完追之至杨贼于江乘舰上下诸屯皆自卫无敢出及兵大合掠无所得穷乃之通狼山谋遁入海值大风作颠覆者半遂围之贼故不便水而狼山又四面绝卒灭之计是役大战十二小战数十斩首虏万五千有奇完乃旋师加赏甚厚进位冢宰及逆濠事起追论完在司马有所陈请卫兵下其议不能力言不当与虽从中复还之而完持两端无大臣节逮下司空论减殊死谪戍故犹以功赎也竟卒泉州初完尝梦至山曰大武乃其死所也颇溺于玩好有黼簪

议亦缘其子受赇不能训也后籍于官

赞曰以儒生为将馱之前耳遂削平乱阶吴亦代有人焉已哉有贞定难于内雍盛之讨夷皆不世功完固磊落有纵横畧当贼起时跨数州地师亦屡北张皇甚而一旦承委寄决筹策指踪诸将非其谋虑有绝人者则以能任职素知郡国道理要害山川险夷将之材武可用与否故一出而所向如拉朽枯其功名亦足多矣若其傲倪不羁公忠之节庸乃病诸不然恩威之命夫岂易乎

○都穆

都穆字符敬本西濠里人善为文尝有所著抚使者于贵人所见之问为谁譔因以荐俾随计试在高等授主事礼部以奉使至秦中识其川岳灵胜古建国形势故宫遗壤为西使记迁少卿太仆亡何乞归性好游常徧及所在名山川所著书甚富然多说家者流其与游皆一时才俊杨君谦祝允明及濬王守仁皆与善故一时称籍甚

赞曰文学多倪萑不自约敕故士奚贵文哉元敬和令有美望在朝閭閻多长者游王新建以道为任独时时称道之四方贤豪争愿交而元敬故未尝藉为游扬树声誉也所著书又具在论乃不甚高之岂非以人重耶亦时者体未遒沿其故不适于变虽博敏闲贍犹未涉其涯如文何哉及徐祯卿为偶俪流之弊衰遂至于今为名者极矣然岂数君子咎哉

○杨循吉

杨循吉者元敬同里人少选于乡隶于少胥与郡人赵宽名皆擅多士已而宽先论上循吉次起家主事礼部游诸王公间益有名然尚气好竞性执而污渐不谐于时乃乞归既少年无复之惟玩弄文史自娱自云读书不善记又不能远自引日怔怔然行已颇近怪事皆类可笑所撰着亦时杂嘲谐独购书甚富既性所嗜闻某所有异本即夙夜求之亦是时有故家传藏之者今悉散佚阅其篇目索之多不得矣所著辽金小史最善曰金山曰庐阳二志尝手授余而惟手镜一书极为博综自昔类者不过繁则畧未有若是要者文学韩愈氏似之而时有恢调若所善则有明以来莫之先矣闻郑司农言其尝使子上书请复建文年不报由 孝庙明圣也

赞曰吴以文命者自汝玉后至君谦盛矣夫沈雄以浑厚未至于流越也其学盖肆于不仕嗜之自其性乃亦不以为名务攻之不已故其遂微宏邈博通多载称达学命世视今之佻易者何如哉今惟急于名且无所庸其力而遽谓能甚至以市也属士大夫不说学而好口为大声故使曹子得颠倒其间又何怪与

○赵宽

赵宽字栗夫成化间礼部上所论士第一官主事刑曹虽以文法佐吏为治而意常向学是时同为理者华亭陈一夔同郡秦廷赞天台王存敬皆能诗与相和甚欢相得也吴公宽王公鏊及君谦时相与赋每有属下笔不可了众惊谓敏其所书狱辞多缘饰以经义诸名为文法者咸服稍迁按察浙察博士弟子岁辄试第其行能差次之待推择上

名能知人明习故事意深厚善究宣礼化已乃迁廉察岭外卒

赞曰吴公宽在位时善荐进文学故一时士争自濯磨其出于苏者尤盛他所若宽与君谦皆以才为所爱而卒不私庇之栗夫在事无不若人而循次除未尝有所越卒未及登用而君谦亦以拓弛遽引退虽欲自试无由自余未尝进一人也吴公于持法亦少弘哉盖亦仅仅奉已而已不及人也

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之五

刘凤

王鏊

毛澄

吴一鹏

朱希周

盛洪

王倬

盛应期

陈察

方凤

周诏

顾日?拆臣

查应兆

杜庠 黄暉

赵承谦

朱鸿渐

○王鏊

王鏊者吴县人父朝用令光化始少时父挟游大胥辄下笔不休人惊传之倾一时叶公与中即拟之王忠肃翱奚元启受业最久深自挹折下之归试诵通遂尽屈乡之士计上咸第一故时者藉奏则士所业主者必更之至是无能易一辞及对策或嫉之抑置第三授编修以经义侍 孝庙尝幸后苑因讲周书文王不敢盘于游田 上为悚然退召奄广戒之曰儒臣进说似嫌若等耳慎之属大司马请择人谕德行东宫者咸谓鏊允遂授之既又以少宰荐复 命佐铨以清简称虜方入陈所以御之者八语微指权宰相

迁以灾异乞免荐之自代 武皇帝初立惑弊臣司徒韩文率诸大臣伏阁请黜远佞邪消遣戾维新厥服 上惊召相健迁等问何为者而其党岳亦是文等议言我曹自当简汰惟外廷所裁二相持之力而奄荣又言 上于疏无不纳独八人者未忍遽逐文对稍失次业入而事变相健与文等俱罢而璠以次入阁冢宰焦素附丽瑾得进

瑾方以威虐士大夫且嗾韩深欲中之法并及健等璠争得免又刘司马大夏以旧怨及相一清以前按边事皆将甘心焉相东阳数请告焦懦不任独力持之故得无他异日者杨竟以计划除瑾亦其善树人也尚玺璇等三人忤瑾拳之正色言古者刑不上大夫柰何折辱至此乃得释至议废后礼尤称允内既难瑾又耻与焦列也戚然见于色瑾曰王先生何削甚因力丐归瑾愈疑使几伺惟以谢客贄无所通告始听谢璠本严方当其时未可显有所出故外不示同异而内有执阴折其萌夺之?多焦等惮之势不并立也既以廉节为名绝请谢居惟嗜书尤不好玩弄初请为治第戒以务约及归见之大非其意时游放山泽遯之具区士大夫过者欲谒不得留久之去性长论著而重于夺予时且多才凡所题目即可征信赖以传者众来乞言者亦未尝不为削牍也嘉靖初遣使存问疏请讲学勤政契 上旨将就家拜未几卒其书若春秋词命等多有载者季子延陵以任为中书蕴藉能嗣其父文人谓流风不堕

赞曰今海内业博士弟子者皆诵法王先生言亦浅矣知王先生也吴自有明以来传者数家言吴文定公于经术颇究明旨向济之尤邃深于学能断大事文不离始之质典而裁庄以有体往者靡未振乃微加蹈厉尚左氏迁史沈雄之气自是一开盖渐趋于变矣诗亦温丽善发郢以才胜王新建乃独取其论性书谓于道有得者盖弘德间文学郁兴学士大夫烨烨流风声独依以为重尤善知人其推轂后进如将不及故一时向风士争奋者咸自其力哉功业虽未竟能轻富贵蚤自退不以宠荣矜虽在华要泊如也辅当世之治垂显名吴亦世有人焉至望实皆茂诗曰吉甫作颂穆如清风岂其庶几乎

○毛澄

毛澄字显清太仓人少举于乡值父丧未上既乃以进士第一人官修撰预试郡国所上士著作内庭侍帷幄与告归适大父满百岁里中贺羊酒谓不常有仍进谕德侍东宫讲?称于 上曰毛先生善开导 孝庙喜时方宴遂彻以赐后以书成进春坊庶子已已瑾奄以加秩不由已悉夺庚午选造畿内得人?盛家大人预焉寻迁学士为讲官教庶吉士又命都试礼部进侍郎吏部尝署选事称精核已而为大宗伯戊寅 武皇帝南幸累疏力争要之必从大司马彭泽以御史中丞行边有所按忤嬖臣宁主者以深文坐之澄复倡言泽忠臣无他不当罪会给事爌等亦言上遂得附轻而爌等皆斥宁憾澄欲中之伺无所得初叛藩请朝其封内澄举守府之宪力折之乃又列上其孝行请旌焉为引孝经诸侯之孝与所上不符者又得寢逆党益憾已卯赐衣及玉束带既俘叛藩 武皇帝驻蹕通州将召集群臣于外议澄正色言戎丑当献之 庙社以为大戮不宜委之草莽在列为吐舌理官竟依澄得申其论诸幸臣既窃柄且以拥兵重人自危而澄议不

少屈及奉讳迎世宗入充使往比至人有言始见礼当致隆澄谓礼遽盈焉者则将行劝进辞让之节复何施敬 世宗闻而善之大加宠賚扈蹕至践祚诚效恳款 上每加慰劳大礼议兴澄首引汉成帝立定陶共王子事谓义不得顾私亲当？ 兴献立后主祀事 上专奉大统又议 尊称皆未允 上心而几进者潜有所窥以及与继三代礼不同而不极所奉于亲何以称孝者 上意益向之而廷臣力争且以宋濮议及魏明帝诏进者虽暂格于澄等议而终未能释

是秋拟用为冢宰力辞山陵毕乞归不得 大婚礼成遂移疾不视事 命使劳问赐医药相继于道而求退益力 上留之甚恳若曰卿老臣方赖以毗共为理何遽忘社稷图澄遂称疾笃始获从道卒兴济 上闻而悯之深谥文简澄少时夜诵书毋夫人遣婢馈不肯启门兄洪自往乃出居平虽甚暑不爇露上所赐金币悉散之宗党故室无媵字独喜为诗时时讽咏成辄弃之曰聊为适庸足留者荐贤若不及而不以为恩弘德间士竞进恬然不以迁叙经意掌礼乐久 诸王有所请据典法不可夺 上素知之又以迎奉功未及用而已谢罢故独有余思焉

赞曰宗伯以礼佐王建保邦国典司神人重哉澄以道辅匡凝然有大臣度当议礼不少阿人主意执已自遂庸不知逢时就功名而固守其言无变哉且方其立于诸幸宠间论救为多不显其迹而默有以夺之非德义素能感人不至此惜时方向其有所为而未竟后诸大臣争者致恩礼不终顾又不为幸耶

○吴一鹏

吴一鹏长洲人弘治间官编修司徒周经被讒去疏请留之人咸称其忠槩再主郡国试及司徒所选士进侍讲时瑾奄贵用事见者皆膝席独长揖而已瑾怒改南刑曹郎即又明习吏事书狱词如老吏再选祠祭郎及瑾败复故官又以策郡国所上士语侵时贵出为祭酒南都进太常部所莅官未尝不尽节知无不为尝因菑异上言天人相应理甚愷切 肃皇帝立入贺又上陈天命及下民之悴急宜崇德业以答厚望进少宗伯命诣楚题献皇帝主且迎之即疏上预约束奄尹无扰者 上嘉之赐金绮给事陈洸欲假大礼希进论罢之已乃命入东阁进宗伯亡何请告归以途所见水旱民艰食请减其赋贷之粟漕渠湮请疏之或开他道便转输愈民疾困 上皆嘉纳又以灾变乞罢者再慰留良厚 上意浸向之遂为争进者嫉且出之部 宗人以过削夺求复奉藩而前议礼者以考上援新幸者萼？乞力持不可重忤之则又比而谋出之南矣以尚书满二考坚丐归次子孝明经射策甲科为吉士时新贵用事既有所嫌又不能下之遂补外淹郡曹久之乃迁宰士得请养焉所以娱慰甚至称能孝后起复丞光禄故主大官给饗与中贵人共事雅不乐之退朝读书斋阁不造请复见忤用事者出之参议楚主岳祠乃愈得优游嗜书不馱而相嵩子犹衔之不置竟免归初南夫继显清为礼官建议时能少徇贵宠矣卒不为动官乃再徙实疏之知奉节未尝快快纯叔尤爽激明经术善方畧自以世受恩分明善恶少所容故数蹶工为诗有传者

赞曰皇始作制礼由是兴折衷羣儒显定义经将非秩宗是赖絺色阐弘者乎中兴之始业由兹抗而诸臣折折 【音提】 咸未允所称终断自 睿明以克承 神灵执已者澄后先惟鹏岂张桂作议不能依和传会藉以宠荣而顾拂违矫正有所自矜哉适有所合持不敢变虽折而从之曾莫之惩进退必由其道以无亏股肱大臣之义其斯以为有恒乎纯叔克绍前猷光烈盖益绳绳矣

○朱希周

朱希周昆山人父文以御史按山东迁副使其治效以长厚廉恕名希周年二十五举进士第一为史官修撰在禁近小心翼翼人无敢以少年视之敦重不妄言笑动止皆有恒度俨有容观数侍讲席屡承顾问所对必传以经义规献为益不可胜庚午选造南国所举士称得人当 世宗时大礼议作虽不敢显有所出然不能与新贵调遂不得进用雍容礼曹不为同异后为尚书吏部南都五年大弊羣吏辩论官材有所简黜旌其行上下之以核精鉴无敢私予夺顾又为当权者欲因逐台臣尝论已者大忤之得谢归以重德表式州间所居吴趋里中庭隘不容车室无爽垲阶无重城躬履贞素执谦敦慎自始之操未之有易接遇人谆谆不以造次废礼虽毫及之其介愈厉人望而敬焉卒谥恭靖子景固任为参军亦诚谨有父风

曰古大夫既得谢教于乡必可以为楷若太宰其人乎其度休休焉含覆无不偏慈仁逮物恭惠之有焉至取舍进退义形于色自昔之论谓使居官任职无以踰人临利害有所执不可夺系安危为时轻重则舍若人将安归哉故总五经之渺论辨文质同异论礼于多寡之际廷争面折诚不能如然言不出口而众雍焉以之端委恭已而在邦家无间然有大臣体虽不尽用适国称老焉亦弘于时矣

○盛洪

盛洪字思禹昆山人主刑部事明习文法三被 旨按狱其所当无问贵势适有连诸阉窘请命不能得居久之迁按察岭南故与夷贸易贾阑出物私其利外国因以为市洪严禁遏绝之乃潜以黄金百斤馈拒不纳又上章论夷嗜利今监以所欲啖之而又浚刻之深召衅启侮非便蒙嘉纳既罢后以其功复召按察山东道卒洪介廉自其性为理甚乎若无所纵含而论事常依仁恕

赞曰法吏多懦不举其职又或好繁碎不知大体苛以取名其所刻辄至深切二者皆失而苛为甚若洪治若卢狱不少贷乃其为按察又不尚严督远利违害去犹思其功居室罄然无所营经术文雅身兼数器不谓贤乎哉

○王倬

王倬者家本昆山割隶太仓州为令山阴又令兰溪其在山阴有所废置皆称便民讼田久不决亲行视指渠树为界遂定发隐伏如神狱?虐贖盗杀信豐令符下讨之贼攫险夜纵羣羊鼓之罄贼矢石乃殪之畧尽兰溪多逋赋系治满狱?準差立释之以 诏令宽其罪遂致盗贼??大匿居者户不闭使者屡上最召为御史首劾选曹贡钦罢之又劾

罢尚书五人及方岳甚众奄怙宠捶辱人于朝势张甚又论斥之时名刚直迁按察贵州承夷方溃靡所止为治城垒抚定之夷伟尤黠不受令竟羁致焉移莅琼在海中黎素为梗以兵往击多所俘令还系掳者而纵之又讨崖寇故缓之使不戒猝入大破之因析置其众势遂分不敢为非又辄自匿功状不以上再迁至方伯讨灭临贺贼抚其余寇逼成都众议燔焉以断贼倬谓何先示之弱也阵于前开门待贼惧而退时列郡馈运若操掠疾疫且作乃皆罢之独以钱币余随远近给之无乏军兴而民不疲使者令具马三万无后期乃使有马在郊者皆入保无为贼得遂如期备又猝令运四千石

明日至军则命市啬夫先至者与考上乃未午足矣使者大奇其才进都御史抚畿内值大饥议请赈恐待报缓以军兴预发遂皆获全虏邀射我裨将死出师讨焉曰虏侦我西且东入设伏待之果大获监军御史劾退者当斩乃以为未受令得不加罪其赏罚悉以司马法不可挠故能有功既进少司马乞归卒子忬嘉靖间以行人拜御史即疏皇太子出就外传当抗以古教世子者三事又论不得任奄宋兴以讥察使自擅者皆蒙开纳其所上皆先大体既按楚还又按畿内值虏犯我急入保通州当其冲使东鄙得缮完上嘉之进都御史委以东畧时议搜乘补其阙独上言请益汰之以其食可募选士数万又请为外郭置四镇为犄角示天下以形势已而拜鸾为大将使忬主饷鸾所要刍粟无不具欲危中之无由属召还出抚山东以东夷扰浙急也复命之视浙请得专诛赏守便宜行从之时寇已逼以夜纵兵袭击之海上鹵获众又邀之洋中皆克贼显犯淞江来告急遣别将击之得其首溃入浙者徼杀无余贼梁倚利徒兵是役实跳驱歼之因行部视寇所道皆命所由城焉慈溪谢不能及后竟中之始悔不蚤奉令海于故主逋逃为贼■〈言冏〉悉藉之自是无导者寝用衰止则又以虏急我大同也上亲以命忬遂乘两传驰而北比至以岁之不易请大农金钱十万赈之虏人合他将兵徼其得剧首虏百他所鹵称是捷闻进少司马

明年蓟督博入为司马上又隩度用忬既则酋台吉等数万骑犯古北诸隘拒走之上八事报可即勒诸将以马步十余万分戍而间以奇兵往来与督宣大者约视险所在相为守九月虏悉众数道入乃各起而纵击却之捷上进右都御史奏裁诸郡践更者马曰守利步一马费可供二战士矣虏先后入辽碣败之得首虏数百招徕者千五百上欲召为司马不果时大讨倭又发五千人以往九月虏犯喜峰诸缘边地击郅之明年阑入滦河颇有失亡复疾力战拒之诏切责夺一官既而虏把都等各以十余万分道窥我诸鄙侦我有备不敢入乃复所夺官明年虏再至再奔岁三捷始议练士时兵渐强可减调发六七及省县官军兴费又以屯戍多虚糜而募士亦未简诸将不足任力疏十三事请期以三岁举之明年虏又来犯遣杨照破之斩首虏至八百获资畜无算故事半是即以捷上而相嵩故抑之功不录既乃以减戍省兴发虏窥间入请济师不报遂犯我鄙有所掠忬以轻骑蹶之杀伤畧相当上始信请非缪薄录诸将无意罪忬而相嵩故承风旨鄢懋卿构陷之中以法穆皇帝诏雪之复其官二子皆负当世重名

赞曰倬始为吏即在行间兵便机势既所习之而能自戢不为杀戮以冒功名其所全完者多故垂期毫食其报逮忬尤仁心为质余尝获事焉其方畧智计纵横无穷在军之日寝不安席食不甘味忧劳为国忠诚竭矣而卒不免岂道家所忌处其太盛而世为将以功名终亦自古难之矣

○盛应期

盛应期本宋文肃公度之后弘治中对策甲科为郎都水治河渠济上令行者觐相衙进无得争先吴公宽以少宰召犹?宿留终不以权贵有所挠吴甚贤之中贵人往来者挟货贿辄藉入之时奄尹广兴辈信用羣慝之固已怒会其家人私市盐数十艘闻其无所舍恐见法悉投之水乃益忿共譖于 孝皇帝曰是轻嫡吏宜与治 上不应谕以河漕不易若等知之乎既不获逞因荐时物者诬以阙 宗庙礼 大不敬 上犹不肯诸大阉环泣慝不已乃逮置秘狱令对吏侵之急终不易辞 上仁明知无他谪主邮驿浹三岁所使者荐之数十上皆报罢已竟迁浹之禄丰令禄丰故夷陋?设科条约束之薮盗匿且不可捕示以威化遂革心自缚献邑为清又迁蜀郡曹主赋民则又以能赋称又移郡都尉楚主尺藉则尺藉为清摄守即作奏言凿矿召隙为国不利孙司徒交得其奏叹息久之奄裕镇其地肆贪虐酿至八百石请之使者张王?业禁遏张慨然从之迁副使未上而裕已诬奏连张目?兆复系治秘狱张竟杖死羣臣共请宥会灾肆肆得释迁按察河南奄尹清侵吏夺之治面数其失清喝不得对遂察其属名祸者榜治清忿将肆害使者伯温好谕之云盛君贤者忍之不愧于心乎得止进领藩山东其所厘革无弗当人心为公帑惜不妄一毫费也大阉鸾倚瑾势张甚弟等怙恃作威至方岳争谒之初不为意特发其奸作重劾廖怒以供织罽檄取直尝之乃计其侵已数万明日请之方作色徐出其数问所费如此计罽皆安在愿以闻 上廖猝不觉屈膝请乃罢赵林复以 中旨有所发数十万力拒之卒不获逞去 武皇帝将蹕榆林众恐阙供议别为调持不可为差次有所出具储峙待比至供亿忿涌取办俄顷晏然民不知劳扈从诸嫔幸焰熏炙抚监重臣无敢吐气独暇整不为慑请求皆裁以法

时司徒李在行叹曰承勋自谓男子乃今知不逮矣虽 上亦亟称良吏才逮还老穉夹道拥之呼使君活我恩至矣进都御史抚蜀初上五符 上度次用之方六师讨豫章所在多掊克奉权幸既独不持一钱又痛绳绝县道赂遗者平叛夷安反侧蜀遂以宁

肃皇帝初起抚江西当创残后界内盗贼纵横为设游徼昼夜巡察在污泽则以川虞守焉为贼■〈言冂〉者藉之使相监司督捕一时解散尽应赋以粟者平其价暂折入之免漕费及罢诸调择长厚吏恤其乏赖全完甚众既连稔遂充溢漕继上留都方匱得以济而储之备不时者数又盈百万大司农以能裨国计奏 上特赐羊酒劳之且以激示诸方岳进少司马移莅岭外则以政久弛蛮方未遏严督诸裨校阅军实搜乘大有简汰勒阵以待蛮始畏服遂进平剧贼李斩获千五百余思安夷酋召据险梁倚攻之召被创死获首虏千而抚其余众田州酋猛尤淫虐四出焚掠往者虑难制姑息之事闻诏下

为方畧与使者谢汝仪等议谓猛怙终不悛非剿绝之不可具以用兵便计条上而已被命移易州矣遂力丐罢初奄尹与督将多所私索部内藉稽之无所容又令诸县道非奉符不得辄调发积不得逞故共为危语中之及河决徐沛间坏漕渠起往疏治进右都御史敕不得辞

时大司空议于昭阳以东接沙河别开渠而黄绾霍韬各陈便宜俱下治河堤者乃与所司履行其地相度所开延袤百四十里图上形势又与监抚使者及诸长吏谋既协乃疏言河之为患与江所以异者田地夷衍无所汇故弘治前分为三其二由汴之南会泗水经淮入海一则由汴以北东至兗又分而二一出沛之飞云一入徐浮桥以入漕渠会淮入海正德以来乃并入北一支河全入徐沛汴得以无垫而徐独受之近又徙而北自曹单城武等诸口奔溢趋沛横流为害今之计有四曰疏者决上游杀之也浚者顺其故道也筑者筑障之也改则别为道而不与之争也奏下司空复谓为便乃诏兴役时方率郎中柯维熊等先后治旧河俾通漕而筑堤障河之冲又浚赵皮等折其势然后为开凿计分地赋任程事发功甫四月计成可八九而谗间大作柯维熊者尤狡譎动欲自恣抑不得逞东昌守某以掊克得罪共构飞语用事者遂与柯俱罢二三大臣力争不能得邹文盛胡世宁皆当世诚直臣论尤激慨应期虽得谢言者累上其才几复用而卒河可数世利功垂就而废或为惜之

赞曰应期矫矫亢烈奋难不顾身可谓贞孤绝俗刚慎有执称社稷臣矣且其才沉密切至长于应变所辨护无不笃缜淹敏可推行少长于里中家大人与共学董先生嘉谟所董先生数推重其弟子人窃笑之已而竟立功当世今虽渐久闻其风想见其人尚有生气而彼奄然取宠荣踰溢没身无患者于志节何有奚益国家哉同时有伍先生余福及金先生懋皆与家大人友而伍至守郡金少后余师焉盛公亦少所诵法也

○陈察

陈察者常熟人弟寰以对策甲科官太史察始为郡刑曹召拜御史时 武皇帝初逆瑾擅命引妖惑僧则主事子庸论之乞为养子者御史充论之皆谪去察又率同列继论之乃系治罚以粟二百石始释既乃请告几十年以荐起即陈五事一言位号所以系天下望何妄有贬损名不正则分何以定一言慎起居王者高拱清穆动止何可轻者又以皇辂方躐西北且议南狩言当深居九重以安宗社宁可驱驰道路犯雾露耶出按浚闻将亲讨叛藩入驰疏切谏浚故治银已罢复凿穴取矿奄乘势苛之甚及金腾镇护者贪虐人弗堪因言地气贵无扰矿议宜止奄玉与将崧宜斥皆从之遂以 皇嗣未广乞于 宗室中简自 圣心有所预教育时辅弼大臣不敢言而察以小官首发大议人尤异之 肃皇帝立即又首陈端大化本在笃圣志崇圣德遇事辄有所规武臣勋浸贵幸重糾其贪讟不报按蜀以功进秩复力辞既以次迁少卿大仆复举贤自代谪潮州文学博士凡二年所继有荐者稍牵复历方岳至都御史治贛平逆贼俄顷定未一考即乞归其所莅皆清身苦体粝粱之甘食未尝兼味每持一钱市少蔬多则还之迹类迂又

尝请简儒臣一二尽校天下书非掌故业者无得蓄时尤怪之幸其言不用不然腐儒何知古贤所为苦心其术不同忍使 明代有燔书议耶盖有陋其所为文者故欲释憾书胡罪哉其它亦多琐屑无大体特以时评发人私乃取名过实亦多用智计文 少缙藉惟俭足师云

赞曰察煦煦为惠而刚峻踰度廉公有威直声动天下虽谢免尤孜孜治道知无不言自以尝备位九卿不当循默若刘季陵仅同寒蝉其意乃未尝不在事而实非有私也故能使县道惮之谓之请寄得乎固亦志行严方虽有偏庸不谓难也

○方凤

方凤者昆山人兄鹏官史氏至庶子凤以正德间拜御史时宁藩反形未具即疏言胡世宁逮其惑误者欲以安 宗室请无罪之王守仁在今日可任用皆豫为逆藩计出按畿内当 乘輿南狩有所需抗言不能奉 明诏者七事尤愷激闻者齟舌一谓索妇女纳之 行宫一谓使服嫠幸服凛有直气又劾尚书燧大奄敬等且极言灾生?月宜急修德祇崇天戒危言数进未尝有所观望隐不尽至肃宗时大礼议兴即率同列言继统追孝不得顾私亲大忤 旨兄鹏时亦颇是孚敬等议移书谕之持之愈力累三疏皆言廷臣始议不可夺不报又论司农计所以纾民力者数事用事者以其论议渐广遂补外未上会卒

赞曰御史执白简杜后患无可言与言而不系大体乃方凤当其时正伏节引义力争之日也而能决奋屡有触忤亦乃谅其忠实含贷虽不尽从然所格正多矣终以直见替藉第令贵用亦无复之矣若庸庸随世自免不重失其故哉抑 肃宗时礼议所执不同遂以大哄余闻之盖以 孝皇帝恩泽深羣臣思慕故惟恐不得竭所奉者遂各奋起而争其固结于人心也如此哉

○周诏

周诏者长洲人少随父令乐会父卒有欲留娶之者曰父死之谓何而又因以为夷乎匍匐归其丧万里长益敕已厉矜被推择从 睿宗之国遂以维新受命始建邦规佐之无不用典逮 睿宗登格寄以后命伏地呜咽辅翊 世宗朝夕纳诲尤见亲信及迎入嗣历擢詹事侍读 大礼议兴诸臣不能将顺屡有论诤 上赫怒将加之罪召诏入密计对以 陛下制礼尊亲羣臣未达然不敢阿固其忠谅今亟罪之则若彼怀二三者何因顿首请老 上为之动已乃进太常少宗伯卒

赞曰诏以王国臣遭时势隆宠在日月际用旧学方显贵谋谟密勿能以正对回主上意奋罢威怒出于从容虽一时不尽从然所宽全闳矣其勤劳既久又属更始当有佑缉益光前烈而不竟至赏延累世尚亦崇德懋功也夫

○顾日?拆臣

当世宗时任弼谐者曰顾鼎臣昆山人始自弘治乙丑对策第一领著作久之尝一都士畿内嫠臣宁有所嘱不为动至 肃皇帝初继统以讲学被知遇前后 恩赉甚渥

上所著五箴皆缘其进说有契且令以洪范日交修焉几若甘盘矣进詹事赐金绮又特谕所以异于羣臣释菜文华殿俾预行礼已又召令与辅臣同见坐讲周书无逸篇赐宴而退凡 上所厘改制度正祀典行耕籍礼下议甚详一时举礼乐极旷世之隆君臣之际可谓殊绝荐进侍郎礼部历少宰两命教庶吉士 上幸山陵赐服物 召见行在所燕语从容因极言典于学及育才之方且及宋一代史文繁当删裁者 上意益向之屡 命掇祀定 九庙禘祫乐修累朝典甲奉 三后主迁于陵宠秩既益进思所以报无已上疏言东南赋所出蠹败民者四事 上皆为下所司值岁大水燕地有流殍而他所若承天尤甚又疏言所以格孚玄化加德意以惠元元辞甚悉 上尤嘉纳十七年

命都郡国所上士至秋遂爰立作辅日孜孜治道值冬至 驾诣 园丘复行 庙享大礼召对讨论经史同异因请修汉宣帝白虎观故事大集羣儒讲论五经称制临决者

上为竦听南巡命以居守 诏谕至再委寄之切及锡予繁庶亦前后所无也军国万几咸取裁两月余驾始旋自承天迎谒 上慰劳良深 上于巡幸所著诗皆以示庶几虞廷赓歌之盛既亲礼益加岁时宴赐非诸臣敢望迨疾作遣医慰问相继竟卒于位方未歿时犹疏五事一为盐荚二为水地其三皆为边计盖死不忘国家也诸从曰梦圭者累官执宪亦有文

赞曰君臣之遇合诚难矣苟诚遇岂为徼一时荣宠哉当 世宗中兴慨然欲举三代礼乐虚已畴咨审则法令动以经义从亲礼儒臣昼日三接信任无加焉鼎臣晚乃获遇其所对扬仅仅若此非有所畏不尽则其术固疏与独始终一节不?絺臣高自错而无当于名实犹贤矣乎人言其父偶傖有鲁男子者事则其昌有由哉

○查应兆

查应兆者其先婺人南唐时文徽裔也年十四试诵通郡守少之见其业惊焉既成进士为共工属命阅守藏者尚书霍公韬时在兵曹与同事诸宦者为偃已又视榷筦浙奄尹?监者方倨侮诸使者无敢出一言适与二御史同报谒奄将据上坐笑引却之曰公真耄耶何忘主客礼乃仓卒无以答卒让席时奄横甚林司寇俊及陈嘉言皆以忤逐因极言宦者奸状请戮之而召还俊等时嘉其敢言调驾部郎冢宰有所属使宰士喻意因面陈所以不可为之愧谢既而裁缙骑滥者众环诉之冢宰叱曰岂有徇私查驾部哉大司马李以论事数相忤曰人臣奉尺一宁当舍法有所侵乱之李公为之屈永嘉相以贤也重之置酒会第中称述 主上明圣应曰可谓有君如此乃大忤适复忤他贵人遂出之参议山东转粟辽左其所灌输法甚便又以余益修守械将校多贸首功腴削其下为举宪绳之且施宽惠以抚边氓迨后辽戎有据城为变者遣使抚之曰还我查公耳其按察徐土发奸若神狱有久冤者一讯得其情立释之在豫数引大体不为苛恶吏深文有所刻害尝力争之使者直上南幸楚至卫 行宫不戒于火吏多被逮大司马王廷相独荐公才俾专办护往返不乏而民不知劳 上悦有所加赐岁饥 上命尚书杲以内帑赈之杲檄下监其事所全完甚众时以课不入欲移之他乃疏言天灾流行宜同恤者得

不被横征有以左道幸者故尝为吏嫌其恩将言之 上闻之惊曰吾岂以是尽失其平生哉遽谢归卒

赞曰吏道之失若贩鬻然有由来矣应兆守职奉上持画一当利害际不少动摇难矣哉观其烈烈引分责让权贵杯酒间彼脂韦者视之宁不有腼面目虽盘桓两署不获登三事由峻谢宵人蚤自远庸不谓几乎

○杜庠 黄暉

杜庠者长洲人少游于张和人咸忽之和独许其爽爽不羣已而论于乡为攸令未久谢去益耽于游自以才气见抑一寓于酒以发舒其意任所之辄流连忘返时为诗以其愤愤者三致焉嘻笑不平甚于怒骂要之不得意于时无以见所感忿故与屠酤牧贩者相尔汝人咸疑所为不恤也

黄暉初为工曹疏渠通漕考最改刑曹治畿内狱用法平虏入边吏有所失亡司马文升举暉按之神木令请以车绒金三千贿者暉厉色拒之卒当其罪将臣有论死者忤权贵请告归性敢决不媢阿取容其后乃益着

赞曰公序之放谓有所激则诚过然无所与何乃混迹市人欲以明其不屑抑又何至是也曰升桓桓持法无所贷虽里居人犹慑其气为之心下则其取畏有由矣哉

○赵承谦

赵承谦者常熟人宋氏之裔也少业经生数射策不中至五十乃试通为理曹贛贛之俗囂讼仰机利而食间持吏民短长令赇谢破败之乃壹用文法诋严而有所分别使无复者理用为清尝??征洁轻重着为令已守令贛县新视事尉?盗得从两隶往立出之谕散其当又守令宁都方赈施御史行部毕赈而往谢御史御史曰吾行谢君君胡谢也后召入有不便之者沮焉?南铨属以考入分宜相子曰吾能留公笑曰吾乃行贿耶久之出参议岭南其治效视?理时尤得专矣和平盗起主吏请计报之曰五岭夷俗寇盗自其性然非有他利斂攘耳且盗耳目我不舍而我寄腹心焉几不为所纽而吾犹狎之谓可徼旦夕功者岂不悖哉卒舍莢平之然不能放折传人语不得则色庄必申其意乃解竟以此惮使者曰是岳岳将折人角耶论罢之性既洁廉绝请谢而好为义居故俭崇老氏嗇夫之旨卒八十余子用贤官太史亮烈视其父

赞曰士必强毅劲直始虽不易合终必信爱亲之参议五十服官政其虑事至精然不脂韦取容余识之吏部时迄老犹故而见谓长者固诚一之所致邪当其时取显名厚实者其所得浅深可知矣

○朱鸿渐

朱鸿渐者奉符按察畿内治河间狱竟之穷其根株无所避已而妄言公交车并迨赴若卢理果直得无坐人庄其敢决历藩方久之皆有声迹为方伯闽尤疆执能行其意诸使者至皆敛手无敢问职事属吏稍不如令辄令对簿故自投劾去者相踵一时称能督无及之者余入闽则已罢去吏言其操裁犹齧口也

赞曰古所谓文法吏未有不称酷烈者若赵广汉韩延寿之属其治状何如哉皆以严刻武健疆力行之故其治剧理乱锄奸穷椎埋钩致连逮纤微必得非其才有足擅不至于此吴有紈及鸿渐皆以精核能任职后来者莫之逮余亲见其行事奋不顾难慷慨专已不偷官而外交不弃事而简其业庸不谓贤乎哉

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之六

刘凤

朱紈

周广

陆粲

王庭

王守

袁袞 袁襄

张寰

顾存仁

陆师道

皇甫濂

瞿景淳

章美中

沈启

○朱紈

朱紈字子仁父昂文学掌故罢归妇所生子为逆娣施始孕紈生囿中逆者子已窜父他所又欲取紈戕之且将图施赖施以死全之父亦竟以乡先生陈琦列其冤状免紈举进士守开州为轨赋平其徭时利赖焉?郎职方南都奄横有所侵挠裁之法请着为令迁参议江西初东乡置县姦民避徭上公交车诉连岁不决立讯得其情移按察威茂番素骄时出掠官军一矢不敢发赂遗之乃去至则勒兵待番尚犷焉骤与之战大获首功惊请输平又为画所以给饷戍者境遂安无患迁参政山东时以魏滑兵及东时共戍邳之涉县紈当在行同相度形势以东兵守甘土岭畿内兵守毛岭邳兵守故关而又令东人自给馈因下议主客远近东既烦遣率费又千里飞挽非便且守涉者为隘在南设虜出不意入我不守境则何及东人且在敌后矣议遂夺卒罢屯进都御史抚贛以闽浙被

海郡数与夷市以私其利外国势家积与之通至豪夺杀掠奸不胜乃命移莅督捕纘廉得其状由奸轨召寇为之侦俟急则纵飞语力能动摇国是且一二用事者皆素庇之度不可问然义不避难即力疏请先治其内乃敢任赖 肃皇帝神明听之遂理根排治作重劾糾之旁侧目者百方沮未得卒能督以兵平闽同安寇忽即人来言贡者在浙意叵测即又驰至纳之馆以待 命持构者方导之为变造诡语镇以静使不敢发益督闽将镗由海中趋双屿等隘合浙兵进与贼遇疾力战纵火涨天斩二酋擒五十人夺其艘一器械甚伙又连战败之追贼入屿挑之不出乘夜突围逸夷其巢燔烈之并燔艘二十七又一巨艘来驻沙中纵追锋舸益前蹙之摧破焉获者溺者斩首者愈众兵势遂振铜山青山?奥南荒等岛穴贼皆望风遁纘又亲蹑其踪海中至双屿议留屯众难其险绝稍为筑塞而还闽人嫉其且将为已不利有所论时则漳失囚逸于海透入于江诸方绎骚又奉 诏改巡视益督诸将追贼下温盘诸出没所大克又处贼侵衢亦平之浙以无患而素与贼连者愈憾百端坏败其功下亦且偃蹇不受命纘誓以死图効自辨析蹇蹇不已

明年春命督将镗按察柯乔于闽皆出洋中迹贼至诏安之灵宫澳合诸军设覆山上下千舸具进贼徒兵伏败之趋舡者疾力鏖之覆溺杀者甚众擒夷王三人白番十有六黑番四十六皆狞恶异状可骇贼首贵等一百十二人妇二十九斩级三十余他资械等称是皆五澳宿贼骁黠者并歼焉及夷之贵王妻妾等漳人大恐有尽室浮海者日走往聚观诸俘偶语藉藉踰时乃定捷闻则与连者无所释憾反疏言其擅杀作威纘罢而诸出死力杀贼者皆召令对簿谴责之矣按使者杨九泽亦以奏上得罪与并谪纘竟死于家

赞曰甚哉大功之不可成将亦难乎免也雍成忬皆罹谗而新建亦遭嫉几殆况纘则尤处其难持权者从中制之为构者毁潜日至虽不邛自恤然谁谓为尽力哉而纘竟以计划求必逞能左右之用素不服习之士强驱之前遇辄摧破此其畴略胆智权谲诚有足称矣然大要激以忠愤可不谓善将哉余尝履行陈临矢刃士皆变色而不心动者然每至决策以千百人投之必死地遇鹵获即骈戮则需忍不能发何者气奋不顾一身易而以众存亡死生之则刚而无勇者有所不忍也纘诚为国无所爱故徇难不避昔司马安以文恶郅都守鴈门匈奴为引兵去非严断疆忤乌能胜其任愉快无所恨哉纘败而东南之患遂不可遏累十余年将亦数以无功被收迄于定之而能督者若宗宪亦竟不免故为兵者道家所忌惟坐谈者无害耶

○周广

周广者昆山人令吉水召为御史纔两月即抗言假子宁挠乱王度亏伤国论罪死有余得远窜宁使人遮道害之间行免复令建昌逆濠方肆力折遏之嬖宁憾犹不置再窜逐南荒资讲授以给讫宁诛乃复召补御史屡迁按察使奄在闽者横甚颇以文法裁之使戢斂以都御史抚豫章免又起为侍郎刑部以卒始诸嬖幸骄恣于内而濠复图变

廷臣无敢言广首发其奸人服其气后乃有周大礼者守莆其政平所当无不服虽似纤细而仁爱常浮久而人益思莆故多士族稍蚕食穷下户而赋法严使大小咸得人尤以为难

赞曰宁彬皆以佞幸贵周广用一小臣而气奋斥逐之谴以幸全近佞之亲在日月分然逆乱之萌乃相应往来皆蹇极于病卒之悔祸始迄于定矫矫执法无所阿初辱后宠其获即多熙贤哉礼之精疆实能负荷 【平声】 持裁得衷众庶以和熙贤哉

○陆燾

陆燾字浚明一字子余完族子也警悟故绝以春秋对策为庶吉士试辄居上忤新贵者补给事甫三日属羽书传即疏言兵要及所当乘障要遮计已又疏言壅滞之患深由上下隔也乞时延见羣臣尽所怀讲臣既得接少又间以寒燠罢何以能从容启沃究切事情且才可用者非出一途宜广采纳而远地不慎简轻付之不乃视之度外乎令考牧畿内即又劾阉洪所以耗败之罔 上未即罪条数事进皆见用及论乘马盐筴皆国之大政而任人轻彼且以轻自视焉有能举其职者适卫侯徼者所发狱付理官当其子大逆而徼故当他欧者不符 上罢都御史浹而且连逮书狱词者即又疏言卫徼以几俟胁恐人所侵冤无敢为平反都御史大臣由之罢亏损实多 上愈怒并杖之会黄河清且千里凡六日廷臣议称 贺而司徒许公赞云恐新进有立异者不果张桂方贵幸廷论之谓孚敬以议礼蒙恩宠极矣而刚狼自用窃威命市私无奉公意当退而萼则不饰簠簋以贿闻尤侈汰进其私人浊乱时政不殛责之无以警官邪语皆峻切 上即开纳立罢孚敬而褫萼职以燾等不蚤发也下之吏既而詹事韬自以有所荐同之萼辨焉

上意回留孚敬谪燾主邮驿而行人岳伦及王準等相继言者皆贬方燾夜草奏鬼为之泣谢曰既以出身为国不能顾矣逮谴所如平时以经义教授已而迁令奉新有异政惠足及人俗善诋谰狱为乱乃咸取伏法人尤快之久之念其母乞归惟以养为事罢不为书谢所尝游贵人而诸贵人重之道出吴必过焉为停累日所居以娱亲周饰之颇奢斲事寡姊抚遗甥施及宗党尤称有恩礼丧其亲哀不胜疾遂革凡使者荐其贤三十余牍竟不复用也灿外王父参议胡琮以刚直名及副使姜龙有文学极推重燾皆不得其行事故无述焉后燾论孚敬者有给事昆山秦鏊言亦慨激

赞曰浚明学术至深其所解义儒者多不逮不独一经能究明旨向皆为疏前之滞疑释之授受远有绪于文辞尤恢肆劲严极其力要之不诡于正而屡抗疏公交车则尤烈烈引义遂动鬼神历诋用事者不少选蠕虽流窜戮辱气未尝折下也方举朝难其异议不敢为谏赫赫若此可不谓骨梗臣消患未萌哉虽汲黯寝逆者谋未或过矣

○王庭

王庭者吴县人少则言经义里中养其父博士君家甚贫故赖诸弟子食既当与计偕念其亲老不至而复博士君果亡何卒时咸谓能孝后第进士守许州可二岁乞为大乐正属得以为母养者不许寻为郎刑曹迁按察瓯闽瓯故在山海间多珍货廉毅无所

侵盗恒作都尉逐之为所戕■〈言冏〉得其首恶令自取以献而赦其余境遂以安其在僻幽素患苦县道者声威皆被之争出就吏已而进参议豫章示之礼化尤为下所戴遽谢归街居衢处四方走集大贾拥高货邀嬉驰逐而泊然闭门无所通往弦诵时时不輒或与弟子习礼容揖让俎豆冀以感动之故闾里为之倾诱善家子修行立名誉无令放纵荡傲为持议上下之旦夕异虽渫恶民能改厉即与为善故能楷模一乡人有过惟恐闻有仲弓风使者按部必加礼数造其庐有所请或政与俗易一言立为之更子敬臣恂孝谨尤以道高见推于世

赞曰直夫言不出口而化于乡翕然归之躬行君子哉世以学道者多伪则放警任情无所检反为贤耶近者一二少年喜?名惟以造请贵势横里中虽名文学而行乖义阙故制行严方洁已自措与谈说之士又可少哉

○王守

王守者其先吴江人自其父?后于王以明经为郡理鄞召拜给事性畏谨容貌敦重动止皆有幅尺委蛇可观当永嘉相时台臣争有所言故相与?水火甚而独能得其意众亦不以为嫌也从容省闕时谓中庸久之迁卿寺往来两都间进都御史抚郧又莅济上及在台事皆无可见而宽简有令望其治务以清静致之未尝喜事有所变更好洁修论议无所假故时者客游诸公所犹未若今盛具待之峻诸以好来者必察其人慎于接对不沾沾为名藉人辞色使为游扬故亦以毅直称

赞曰风之隩也非士能以计才辨智惑乱之也亦在位者不能自持故无所磨厉而使渐靡日以溃坏将谁咎哉今其流涣涣踵相接于道假以诗请寄者不可胜也昔闻守之言云但谨谢客孤立直行已意保无过咎何以多游从在所尝满问遗遍存之使宾客纵横乱天下国家为

○袁袞 袁襄

袁袞及襄从兄弟也襄先以明经对策甲科为郎以寺燔焉谪斥之久乃用荐起按察广西视文学诸弟子所诵通多寡亡何乞归好读书多所论著其言时可推行者曰世纬袞后襄仕为令庐陵庐陵俗善衙多所诋欺而能恤其情不任刑特譬晓之使无复者人?之格心故廩在卑下所贮积但耗败之时已被召当试补?宿留请更之及作繇赋法不使若前得淆者皆为邑永利有父老送之者曰使君何论迁秩多寡即为邑可以不朽矣袞为动容谢已乃迁为礼曹郎未久遽乞归与袞先后卒前有卢雍及弟襄皆以明经高等雍为御史迁按察胶序副使襄为郎更三曹司兵刑礼乐皆预主守尝以凡事有所争下都船对词益直乃即出之又命试郡国士豫章贵要有所请拒不应出参议陝以服归兄弟皆有文学而蚤卒不竟其业

赞曰二袁少以雋爽名倾一时与浚明履约俱起诸生而卒乃异袞于书多所通袞之理人有遗思惠在数世即齟齬之叟能知之矣若两卢名行足相比其居官为长皆有功名足自表见特以世之不延故业未融与时之持禄养交窃富贵者不侔矣

○张寰

张寰者昆山人世为吏父甫明经高第守祁遽自免归寰亦以明经三州有治剧才所守辄以政最闻剽寇横河朔名捕弗得为募少年入其党计取之使者前后累上其状召为郎拜纳言以灾异策免遂湛于游以箬舫自载极五湖之间恣所往未尝问交亦不择人凡以好至者即相与流连故为任达人多贤之在所逢迎尝满宽然乐也初不以家人作业为意尤善诱接后来虽无可取必曲为称誉疑若有不得已者然亦为不撻累于俗矣

赞曰纳言伟矣魁岸爽爽和而不流周旋山泽将必使杖屨迹交焉盖衽席江海而旦暮行路矣犹贤乎造请问遗通经侠为名者哉尝见其诩诩谢益自恭谨则又与彼傲睨纵诞者远乎哉

○顾存仁

顾存仁者太仓州人令余姚能举其职召拜给事当肃皇帝初疏上言事多愷切且直指上身请典学修政者谓不当言逢赫怒徙边者久之赦归穆皇帝召起累迁至太仆自以尝蒙谴无以藉又遇拔擢宠贵不有奇谋便计利国家终何以报上哉乃思止足力请归遂卒

赞曰太仆淳厚穆如其风即之使人亲爱无已时然不脂韦取容言议英慨诲人以德义遇有阨难赈施无所惜方抗言于廷顾自致节竭诚岂虞其复用尊宠哉内自惟知无可效不能与少年逐逐风励以恬让虽优游无为其所弘益多矣

○陆师道

陆师道初以明经对策时相爱其书欲寘之第一不果为尚礼郎令入侍以笔札从内雅不欲因人进亡何请告归遂卧不起时高其志操有贤誉其处也尤敦行义曲躬卑谢温然长者又不治生业介廉无所苟故能迹晦而名在士大夫前至穆皇帝时召拜尚玺时已被病强起及奉使还朝仪不肃又应对误落赖上宽仁怜其病与告归卒同时有章焕官宰士至御史中丞抚淮徐数上言事有所兴功业盖赫烈矣当权者疑其论建渐广将不利已潜之谪死

赞曰师道宴宴无大过人者其为洁廉亦自其性非欲为名高自憊而称之者多失其实本和令持慎初恐濡迹幸门有所悔吝故引疾亦未敢显有所出也论著非所长而以得名崇饮不节顾以壮盛时不为利禄劝则安得若人哉晚之颠蹶道路因病失其守焕诚健吏好作事功论说无统欲而不厌宜其及也夫

○皇甫濂

皇甫濂字子约父录守重庆子冲濂录初为郎礼部明习国家故事若功令勋臣世家前代制度损益守府之宪无所不载故一时典礼措施中外文词相应颇为雍容及所折中恩泽请求亦良有意秩宗倚为重其守夔方鄢蓝寇起蔓延蜀郡皆坐甲不敢出冀招之独躬率吏士具糒粮疾力穷讨既平使者方上其功属已报罢其处也和良不

为忤而尤善著书若列藩所奉令甲及所传闻与所见当世行事皆存之冲尤嗜学者犹不馱故其所诵独多举明经罢不对策为诗辄立就多作元嘉以来语高自持不妄与人狎文亦几类齐梁间兄弟自相师友与二黄为中表又皆应明经其论议与相上下仲濬对策高第为郎尤为昆季所推贵溪相任宗伯时所上章奏皆草之或有故使他郎代即无以当其意改 太子司直坐法谪又移按察浙卒其在粤诗曰东览最盛濂亦以对策主都水事监所用薪而司空隶者入之少欲丐益不从谗焉适出使郢代归未至而补外稍迁郡都尉兴化行守事兴人故纤啬而法令亦稍阔视簿书期会恒多暇余时为理与共相羊山泽间意颇得俄以奉计上数要之不复肯来濂既玩心神明习吐纳延化术冀神仙可学而复游思典故多所撰述闲居散斋辄不通谒又昼喜睡谨谢客不令前余每欲从之学不肯云非师所授外皆已润色之故亦不可传也当谓能却老返少乃一用之房中又不得交接益遽以之卒兄按察访名方贵于时重庆公四子皆才盛矣而冲于文丰缙近丽濬以五言名文甚少濂视二仲益清绮皆有集传

赞曰皇甫氏父子五公皆名能文动海内然前则李何后乃王李与并时而作抑或少不逮之学士大夫向背亦时有不同而皆能倾视听争耳目之则非其才有足擅者乌能尔哉濬与周生书深相励以学诵贵淹业就必无虚者惜未践其言今观冲雅好书独意稍下之乃不遒然长于诸弟矣夫未暇潜思而务于名至与实易此固今之疾在膏肓耶且以濂之秀美濬之通解要之无爽厥声使能夙夜不已沉浸之古所载书则安知其所至哉

○瞿景淳

瞿景淳者少则淹警所诵多试博士弟子即能屈诸博士弟子故亦以诗时时讲说学者多往听已使者衡水杨先生差治习业者独异之遂与计上主者藉奏第一对策复高第授编修至侍读取急还谒相严严曰南中夷且平何劳之不图口语藉藉将乃不足来者所何也遽应曰诚有之若所闻者夫将不夙夜厉士以死而玩使蔓焉人日以瘁不能朝夕而安得不望之切也严色矜乃佯谢云夷且未式侵败王略若之何旁?齟舌贵臣有嬖其最后妻请恩泽当为诰辞持不下夜馈焉挥之不顾已自学士迁祭酒南辟雍居久之即进南少宰适大弊羣吏有所黜罢乃佐以宽明要归之长厚其都试且数所得士为多若淮南相李其所进也当 穆宗时尊宠用事与书劝重惜人才于贤不肖进退无宁过于慎稽之勿轻用嫌似微过涉于党并弃之且县官方急可无备缓急者李公深纳其言引疾归以少宗伯召上疾复作力请罢淳少时道巢湖夜中若有千炬遮前后淳叱之遽隐又尝湖中覩虞山影水中沉沉繁蔚异他时见者故颇自负言貌不踰中人而气盖一时与人虽泛爱而有过辄不相为容伉矜时发之和惠中其所执固不可夺也

赞曰始景淳自诸生时语余今士喜矜且人亦未易量胡必能而自沾沾足也余谓淳固诚谨哉其不崇已好侈大也及遇时浸浸贵又三见之虞之山论议盖宽然长者其度胜耶然以被病语及 上所欲用之犹气奋思竭焉者不敢恤躬之瘁末乃眷眷居室

谓无可复者非其意哉

○章美中

章美中字道华举进士评事大理评佗不污迂按察豫章时袁州相贵权赫赫独无所折下守文专已谒请不得通相亲戚故人无敢纵横邑中者浸不说之移参议苍梧故多瘴毒欲重困之又适安州役兴亲出行徼夷拥戈戟若林按辔徐驱之不为动晓以祸福遂帖然服在岭桥积久罹毒淫几殆又移按察松番病未能往属已免家居久之有荐上者且欲召用亡何卒所为七言有体裁时见感愤欲用所长既不能乃郁郁不忘犹得一当俯仰慷慨故其辞激越致壮使人摧伤哉

赞曰美中矜厉似峭直不容然实和谨遇人无所失余每与游哀其壮志且时称古贤有所激愤而为礼恭送往迎来皆极有意此其中岂一日忘哉至矫为名行诈者深嫉之虽卒不用以死其才气略可见矣

○沈启

沈启吴江人状貌不踰中人而有气干为吏喜兴作功业不自便安而已为司空属典作能节财费及法比亭轻重得刑之衷不肯徇权贵意有所出入大司寇倚以听守绍兴尤以信义得民赋旧胥穴焉故乱其藉无以稽斥山泽準量沃衍哀次高下定其征无得淆又令役力视田繇惟画一故更赋遂为经法至今赖之进楚宪无几罢归其强力心计足以大毗治惜未竟予尝见其治田赋书及吴江沟洫志言水道甚详吴以水为国其利害皆系焉即连年潦民皆鼃曳之与同阨故吴应未有急焉者也若其言支流皆言所从出亦有所汇为泽往往为势家因其沮洳壅为田夺水道使蓄泄靡有所故湮浸为患由各自为不虞天灾自非严明之长深督厉之无以为吴也

赞曰吏理多虚伪以苟一切固习性然乎其恳款为事必致于理可经远为后来者利非强干实心在事者不能若启所为必克终非文法吏幸一时者比而彼务便安妄附和取名者反破坏之见谓俗吏事田谷琐碎呜呼使从容文雅善结纳宾客遍海内其为交乱可胜言哉

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之七

刘凤

节义

刘政

黄钺

王永和
张益
钱泮
金道玄
瞿嗣兴
钱廸 徐植
颜琇
枚应发
戴君用
王洵 王淳
莫辕
都文信
沈伯刚
吴淳
朱良吉 俞敬
陆安
梁昱
支琮
○刘政

刘公讳政字仲理其先汴人父以礼则余从高祖也生有至性好学问其行义尤厉一介不为轻论于乡第一方孝孺先生都试见其文目之犹孤凤在鸟中当为虚左既感其知思奋欲有所出之日久矣会靖难师起慨愤不食死无嗣

○黄钺

黄钺者常熟人洪武初以奉常弟子为尉已而举进士给事中常言燕事遣将误宜速代之计当以时决需之生肘掖忧后以持服归兵八投琴川桥死时俞贞木亦劝姚守举勤王兵为卫尉执送死之

赞曰士守经义儒衣冠道先王语其雍容酝藉可也及事变起能奋难不忘死亦良难哉仲理未食其食徒以受国士知于孝孺遂以身殉叔扬有限无二为臣之节是其庶乎方国家始建威德遂盛海内忠义之臣接踵而死湮灭无所复志者多矣故其事皆不得而详焉至匿山泽易姓名隐约以终身此其人岂有所要于后哉名不名无预也而明教化以着统风励来者是以贵君子表微乎死事

○王永和

王永和字用节昆山人永乐中为文学博士适饶之孔子庙庭坏请修之守不时应和责之以太守行风俗不知重教化何以率先吏民兴礼乐哉入为给事中劾侯尉马顺

怙宠而骄妄厉私威使持节为 韩世子又劾中官偃蹇无人臣礼寻迁侍郎工部抚监淮右治水徐州凿吕梁??云水为河流正统己巳从征没于土木之师赠恤良厚进尚书并官其子贤评事仲子敬以明经举季霖进士复为给事伉直不堕其父风

○张益

张益者吴县人少长于燕举进士选为庶吉士预修史迁修撰进学士召入阁典机政正统间北征益与曹鼐并从尝劝 上持重及师溃与鼐俱死益慷慨有志畧师出深忧之竟为中官振覆焉振亦死于师而人未知盖非天败振振实自败也益为文立就军中书符皆其草初与夏昶嗣初孟端同善艺事益为赋独工昶遂罢不复晋意昶图竹称绝益亦绝不为也己巳之事诚猝不谋然兵久不用渐骄令少不能戢矣征伐未?非计而将帅之臣不无罪焉逮正统间有许铭者思温孙也初为司马属后以都御史按边驭兵以严将被罪者因嗾其下乱作死焉

○钱泮

钱泮者常熟人以参政家居嘉靖乙卯夏五月倭夷入侵我郊保残焉斲泮父棺泮忿之尹王鈇者工骑射以功名自喜常手射二酋毙之遂有轻敌心值寇自漕湖将与在福山者合侦有船十余可六七百人耳谓其弱易与欲徼取之泮亦奋欲报其私率其子弟前焉鈇继发至三丈铺寇伏不动以二百人诱我泮大呼进为所乘四起猝突众遂乱泮不能整卒歼焉鈇亦为众所拥矢不得发旋入泞止焉解剑命隶者谢其母隶犹翼之走鈇叱令去寇执之不屈死

赞曰大吴之风与燕齐异轻心易于去就守死不变奉其職无论利害是难能矣哉未和封疆之役亲执鞶鼓提马而介于阵虽覆师徒亦足赏焉者益帷幄亲臣不能画计今全遭狂竖擅命进退不可周旋不能言者谓使固垒无动岂有患哉然益之没或欲援之出不从志可尚也泮诚内激于忿夫寇入而士大夫无固心不以死悍其若死绥之义何故鈇亦可谓慷慨矣夫孝友

○金道玄

金道玄者吴县人陈万户養子也方国珍起行省朵颜参政督师讨之期会战驱之补门国珍伪降陈信之懈不为备道玄諫不听已而果扬颿直上师燿焉陈溺道玄求不得从之海曰父有知不使为贼俘也若有冯焉者???水?至温之沙濞上竟得免归或荐之士诚所道玄闻复遁去子问以功名显

○瞿嗣兴

瞿嗣兴者常熟人母当暑病甚兴燂汤跪请洗亲抚摩痲夜驱蚊不休又患积气食不下兴刲股作羹母啖之愈又忽非时思芰解衣行求水滨得之人咸谓异子庄以荐得官至参政福建

○钱迪 徐植

钱迪父苏洪武间当伏法迪年十八诣曹请代父刑上其事 诏从之时又有徐植

者父达以税事当刑植亦未弱冠请代既伏锬犹从容赋诗无惧色二子俱常熟人

○颜琇

颜琇字季栗洪武初父戌凤翔以母韩行琇独留久之闻母歿即奔赴负母骨归行数千里未尝释于地寝则度置之宿其下涉则戴之泳焉父既放免奉事尤谨旦夕自洗厕踰亲劳苦之云幸不乏食又何以尔为人赅代亦竟不肯意将视父溲安否也逮卒日夜号水浆不入口者五日不胜丧死子昌亦有孝行

赞曰为人子者无以有已若他随所事则致命焉故育之之恩与所生等孝能无间然者尤未之见也道玄事陈驱驰兵间有陨无贰不自意全也迨伪吴求之逃焉以免岂始于事父以致之君者耶廸之与植少遇变而以死殉伤哉是天性然耳非可强相慕为之琇之养极其心而卒以丧死虽云过者俯而就然贤者之行宁可非与

○枚应发

枚应发市人也事母孝母疾弗疗发刲股进而愈他日又疾作发露祷于庭灼肌以代母痛愿以已之年与母夕方晦忽开见斗六星惟一星尚隐顷则云复合入视母母已拥衾坐云有六人来以水洒之霍然苏

○戴君用

戴君用者吴县人洪武中父福以主守失火当坐君用代之刑于市妻吴以节行旌

○王洵 王淳

王洵王淳者父铸辟为都督府掾属洪武初坐之当伏法洵淳号泣无日夜争请代走御史言父以洵故怀禄洵不能有所以事之免于过应戮淳复进云由淳故不当坐父兄者御史讯其执志皆坚定无二闻于 上特免焉

○莫辕

莫辕字巽仲幼慧悟从张适学适甚异之洪武初父系治当刑辕年十一诣李请代李试笞掠问谁教使辕无恐言死父岂人相导为遂上言之如其请父乃更为辕陈非辜竟死系辕已释季父侍郎礼方宠贵用事时持法严辕预恐及繆指一人戍閤左者为其属后礼见法辕竟以前被伍符免兄遗胤几殄取而育之又间行求得其父骨归辕屡触网卒全已而遇赦宥既痛其家祸深自刻责常茹粝饭蔬邻失火势迫跃入火抱其母出毛发为焦若其阴行善惠利人多矣里有贼祸少年葛尝痕伤辕众执焉且陈其杀人状于郡辕曰葛所杀三人者死溺耳欲逸之不得深为惋姻沈生坐之有遗孤女字刘刘又他适辕乃长而归之邻有举室死疫者遗子人无敢视恐厉延又收养之素与乡先生张子宜易九成游故亦长于学问

○都文信

都文信父贤与徐右善贤且死妻唐娠信泣不已右日使人存之且约若生子当女之已而信生唐遂行右养信长而归之女洪武初右坐之抵死信请代右义不可曰而父以息托我柰何令不祀事亦良解后复以他见逮信曰今幸已有子可以报矣右复不许

信潜冒其名往死狱右感之竟亦不予

○沈伯刚

沈伯刚者本孟氏为母之姊沈胜五所养沈且老坐法请代固不许刚疆谓吏愿见刑吏怪其少上之得宥时又有朱昱父被左符摄老不堪兄亦先事逸昱请行所司少之加楚掠谓隐壮者昱终无言俱长洲人

○吴淳

吴淳字伯善少与兄学兄中遭疾废不良于行者二十年元衅作人不自保淳负兄趋避之遇强暴刺以刃淳以身翼蔽中三十余创昏仆于地兄竟死淳复苏得入余杭山蜚遁以终

○朱良吉 俞敬

朱良吉者常熟人母钱病尝剧吉自洁斋祷剔胷出心割以啖母良愈吉创甚不能兴邑人俞往视见其胷开五寸所气涌出为纳其心缝合之顷乃苏又有俞敬者太仓人亦尝刳腹剖其肝愈母疾永乐间旌其孝官之尚玺朱灝庐父墓每攀陇树号树皆为枯有乌驯狎不复畏人与参政卢雍皆以孝蒙旌异

○陆安

陆安父德甫好客竟以客坐法时以用重典刑乱无贷安急即与兄诀昼夜走至都伏阙请代许之驱诣市中颜色无变时年三十一妻鍾亦以节闻

○梁昱

梁昱字文辉少从诸父学为游娶三日遭父丧庐于墓者三年蔬食水饮如一日免丧随计上冢宰萧山魏骥重其孝亲候之为咨嗟而去部使者孙鼎表其孝将列上不果仕为平定州有惠政民怀之

○支琮

支琮少为博士弟子贫甚遇寒母衾单不能寐尽解衣覆之已危坐至旦客候之良久不出呼敬将何在乃短衣见云方以所服覆母睡恐觉之故迟耳客叹息悯之周公忱抚吴恤之仅获济后仕为从事

赞曰孝友之根于性岂有异哉而悖傲者乃时有焉非教之衰则俗之易人湛溺之不复觉也吴礼义之国其君子闇闇焉温温焉可略观矣其小人竭股肱之力诚所奉抑乃其常及至临利害驱之白刃而天性之发甘之无苦又皆穉幼闾巷之人非有保傅之教诗书之泽也固习之善渐靡者深至德之风尚有遗乎至非所自出而恩无与二又加于人一等矣

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之八

刘凤

儒林

文学一

◆儒林◆

陈继

徐达左

钱更生

吕昭

殷奎

秦约

周南老

顾巽

陈颀

陶振

卢应坊

○陈继

陈继嗣初祖征本湓城人从妇父江承相来吴父惟允伪吴时客潘元明所矜伉专已王行辈皆望尘走事之良谨骑而呼止仲随吾来何自喜也后允死家破母吴操节育长之遗书尚出万卷遂从止仲学又游于俞贞木时经术颇废乃独櫛说先王有所论说不敢立异而于笺疏畧皆通究释其滞人櫛陈五经他书亦多淹诵为文有思致杨文贞见而善之荐于仁庙召见授博士适开弘文阁详延文学访咨治道俾学士溥侍讲璉及继领焉宣德初预撰 两朝史进官力辞又踰年乃得归乞言者多诣之既老已厌苦后王学士淮来与登城望因见其二子请焉虽疆应之思不属甚病之遂戒不为故所交复从之乞谢不能忿曰彼学士贵耶当为之何穷交之与有乃不得已操觚病遂不支盖其文洁严固当需缓然蹇蹶由才不逮耶其天性笃淳履道间方蔚有儒行闻之故老云初有司上其节孝事使御史廉之则方随母抱瓮行灌伛偻甚恭色若?树艺娱亲者顷母入以壶浆来继趋而前奉以进母嚼之乃拜而饮御史亟以闻 上尤嗟异以为有礼所著集曰怡庵子五人宽完皆有文

○徐达左

徐达左良夫元季时家故饶财好读书鄱阳邵弘道善为易从受之又受书于董仲仁喜与诸儒论难益求其说时兵革方息学者尚寡达左教授于乡多所开诱洪武初守臣得辟署东毆守仁辟为文学博士凡六年■〈衣上十下〉尝着颜孟四子书同时有

林大同亦力学博通经传时尚未专用朱熹氏学故疏义存者家有之被荐为博士大梁以病予告永乐间再征不就所著有易义奥

○钱更生

钱更生者常熟人少戇治经术笃信之洪武中应辟至中书见宰相不拜问之对以未见 天子故不敢先礼焉守事久之不得召会有 诏祭元幼主各为之辞进更生所撰大契 上旨即召对欲官之谢病免归■〈衣上十下〉初名沂以事见法子迪代故易焉其所为经亦不专宋儒也至曾孙昕官布政楚有廉名

○吕昭

吕昭克明昆山人以经明荐授掌故徐长于学问敦行不苟慨然有当世意尝上书言事 旨改尉浦城故山溪间少耕植昭躬劝课遂以丰穰迁守沁州不能治装有老父持金赆者峻郟之然行未半道资费竭尽质衣犹不能赁舟车路出徐故所受经弟子怜其寒共进一裘买驴载之官子旦既从进士遗书厉之廉乃亦有父性按河南以不合去后起为郡理迄罢无所侵居尝环堵不蔽不以窆为念歿不能丧魏公骥凋之始得殓

○殷奎

殷奎孝章其先自华亭徙昆授春秋义杨维禎所洪武初以秀才异等闻太常籍奏试通一义遂请诸能称者官文学掌故因乞近地见忤调咸阳即尽节所守教诸弟子文义甚美独念其母不置竟齟齬死诸弟子私谥文懿先生奎为文尔雅深厚不为浮夸学亦颇究通天人分际所著书甚众若咸阳志关中名胜集陝西图经支离藁等二弟璧孝连箕孝扬俱经明荐奎卒璧徒步千里以其丧归箕举秀才试守金事

○秦约

秦约文仲本淮安人宋直龙图阁观之后再徙之昆文王学为儒有高行约至正间官博士洪武初召对拜侍郎礼部以母老辞归后复以束帛征上封事乞重儒术广教化之意又令守相考上各为书上之省以访咨治民术授文学溧阳吴沉荐约旧儒宜置之侧得尽启沃在溧阳久之乞归卒约为文原本经义贡师泰极重之所著樵海集及他书有传者

○周南老

周南老正道在元季以荐文学掌故当涂又檄为吴县功曹按狱能得其隐诣阙上书陈六事进省掾国初征赴太常议礼放还尝集易传说礼举要子敏亦以明经荐

○顾巽

顾巽顺中长洲人永乐间以易教授于乡自巽始时方统一经传崇道德成就教化除去异议辄以非圣罪之靡然向风其弟子贺廉孔友谅顾询以易在文学高等而巽子目??目??子余庆皆能传其学起家?郎

○陈颀

陈颀永之长洲人言春秋于景泰间受业者甚众荐授武阳文学掌故适故人守豫

与一马乘以出入已乃还之欲使遂受固不可未几谢归顾虽以经教授文亦清绮不作老生语在当时甚见推与性介特不肯苟容俨然终日矜严见于色故尤以操履称焉不徒文也所持论长于刺非而■〈衣上十下〉归之正要以经义从有适楚及游梁录又有纪所传闻书学者多有焉

○陶振

陶振者授学杨维禎所洪武初以三经义举言诗则熹书则沉春秋则安国故诸生乐其近皆名陶生学为掌故吴江久之坐法传诣锺官奏赋三篇多俚语俳调得释复为掌故安化振才易辞近卑俚?时格本无足称而为经生者本之

○卢应坊

卢应坊者襄子也少失父事母以孝闻力学甚苦以易简于乡与国之俊士习业其所为未尝不由礼言恂恂不出口退让如将不胜而操谅履贞见不善义形于色乡人子矫妄为名造作语言而行污市人尝深嫉之所著书皆以劝喻德义不为谀言

赞曰儒之为益于世岂空言无施之谓耶自昔王者无不详延相与博议于劬攘未集之日首风示天下知所遵尚故太史公所称功令务以教化成俗盖谓王者之首务三代以下未始有易焉者然诗书礼乐之泽荐更坏乱及整齐于散佚之余师异教人异说益远益疏故分裂为诸家人自为疏固训微笺解道为天下丧也久矣宋人者岂能不藉前闻独追古始出汉以来儒者外耶且昔儒其所为说皆拾之掌故弟子口相授受及坑燔之后所记忆十纔一二而已若孔甲矫疵申培公辕固生韩太傅高堂生田生胡毋生复中翁之属皆传自?瞿子夏子张氏之儒而湮微烬灭存焉者盖寡亦各守其师所授尚亦存孔氏之旧乎而宋人必尽以为驳而不纯简斥窜削屏绝之甚于坑燔之烈然每窃取其义剿说入之而遂皆谓自己出是何忍焉矣哉孔子曰是可忍也孰不可忍也则虽先古所传师氏所守稍不愜已掊击不暇顾是犹有可言者即朱氏为易义皆显窃王弼之余而云王何罪深桀纣则盗儒者不乃无罪耶使古之遗几乎熄矣其曰经解而倍经者往往着于篇僻陋污滞何以服往贤之心且使后来者杜口不敢谈则其狠愎自用不肯虚受千载为恨可胜言也

晦食?蜀至于元不复以经义为事惟许衡氏吴澄氏稍潜心大义有所考质惜其论说亦多守所闻不敢显有同异若吴氏之于礼及他儒于诗书易各有传焉亦未尝尽废古也特未自名其说信从者鲜故大吴虽以文学称而经术未得其传 明兴风示海内以专经业儒始有所统一然未尝令之必尽以宋儒为至永乐间诸臣籍奏乃有所专而学者皆嗜于谷学且不敦而徒标取近义櫟括传注口耳末学声音占??毕犹之未暇而况能淹该彻解心通诵贯徧识多闻于服郑马戴稍窥 门户一染指于鼎知其旨哉甚非上所以重经术明教化之意也然颇载前数君子者亦其志行笃谨持已公亮仕不希宠隐不违俗皆近儒行与彼溺于文辞轻薄无检者异科故特列之云文学

◆文学一◆

王彝

谢徽

王行

申屠衡

钱逵

金文征

顾仲英

○王彝

王彝常宗先蜀人父教授昆山遂家焉彝羁而贫好读书入天台山师事孟长文长文故事元儒金履祥既博瞻广肆于古无不窥其所为文雄沉以暇严加有典则时杨维禎自名能文而多怪迂且不遁彝心独轻之数诋訾其失 国初征撰元书后母老乞归与高启同坐魏观事

○谢徽

谢徽元懿长洲人在元以言诗被选洪武初召上预修元史授编修兼令教胄子迁郎中吏部辞归已而再征为大胥属徽学长于训诂而淹诵多于他学者以博闻称文辞颇畅朗与高季迪齐名弟恭亦能诗皆有集传

○王行

王行止仲家本微父为人行货于都市以仲操挈从时药或详贵仲能别其上下品轻重之主姬欲闻诸小史稗官仲辄诵数家时时为陈说主异焉与书一秩洽日以诵得遂俾之学乃无不通其家所藏书且多尽发篋陈之既已习即辞为游诸生间为言济南生诗伏生书孔安国礼洒洒不穷皆大异之然视其居徒壁立故未尝有书也问其所授则从药肆翁为文宕逸而譎气陵一时在张士诚所以止仲故贱下客畜之不甚奇也洪武初辟本郡文学诸生心易之杂叩以经义应如响且各有意更进与论难皆自以非所及始大服守魏观王观前后荐上不报将入都或止之仲自负奇材欲有所见不顾往客蓝玉玉武人不喜儒仲以巾鞬谒立谈大爱之引与谋议未久玉以事忤诛与其客皆死焉王生有纵横才当羣雄间慨欲立功名既无所就卒乃死党人几若蒯通虽其言不外闻然玉之威强振主性又暴戾岂足与者无生平旧而一旦遂为石交生既无以劝之抑损而又甚之坐取夷灭非不幸也

○申屠衡

申屠衡者长洲人言春秋于杨粤间与杨维禎游推其博瞻尝客潘元明所客赋诗衡每困及命笔为文则亹亹有思致洪武初征使草檄喻蜀大称 旨授修撰亡何病免疑不肯仕谪徙濠又有陶琛彦珩攻文有志行篆籀久微绝琛考质精称得古法与传着皆以游士徊翔兵间虽不暇纳亦礼重之洪武初并召为文学掌故琛子伯承以书学世其家

○钱逵

钱逵伯行自其父良佐以文学名书迹亦遒劲传于今元文宗时召对命为农业书又命书古贤大夫事放归复有荐者授吴县文学掾满一考罢去逵攻文甚苦方其命思循壁行且哦时触而踣或默坐沉想客入不起年四十余犹无意出也属至正间分行省于苏始就辟寻又迁淮南修法令举文书能无失秩洪武初征诣太常议时方制作礼乐为百世宪诸文学多胶所闻议不合者皆放归后复以事被逮坐之逵虽以儒吏然终嫌前元官其学长于稽古而于六书尤所擅人谓过其父若子山伯玠等雅推重之有所为书曰櫓巢

○金文征

金文征德孺洪武初为文学掌故已乃举进士同知鄞州时用法严征所守与蜀连蜀尚未通称被边地坐法免又起为国子与从兄玟皆以文辞相命诗虽不多亦清绮

○顾仲英

顾仲英者昆山人少为轻侠通宾客豪于郡邑三十始折节读书家故饶财益购古图籍彝器既吴人嗜好多以贖往英自谓能辨瑜瑕风起然不能不寄耳目谈者鉴益精则益工?伪习遂坚不可破流至今英筑馆茜泾西日夜与客取酒其所交若张翥杨维禎柯九思李孝先张雨于彦成琦王?业咸擅一时名囿沼台观藻以丹绿供张华侈声乐尽妙选长袂利屣招摇若狂诗歌间作才艺相若人皆慕之尝辟召不就张士诚欲举吏辄避去既而用子恩?尉爵钱唐县男晚丧母甚哀毁慕佛遂髡焉盖见时变恐不免故将易服而逃然洪武初诛锄豪杰英既不蚤识去就加有轻薄名与倪元镇皆以大家为张氏客故竟见法

赞曰吴称古奥区才所产不乏然至于元之未造方事戎马于时以力举梁倚者为贤黠滑成奸利至饶赢者为贵又乌事文学哉而诸君崎岖奔走傲睨羣雄间艰难其身而倪偶其志相与歌笑如平时若无足顾者而彼亦谓无心焉非有能为蜚蠊者遂示优容故皆得全及天下既一方网罗逸遗悉致于用而犹敢偃蹇次且虽起就征遽自引退既疑构隙开嫌间猜怒相因而发其将免乎哉若常宗仲权既束帛及门礼命方尔而自负天施罪何所逭止仲反仄虑不可知伯英昔仕终■〈衣上十下〉以罹德儒循循而见谓不携若仲英则由承籍之厚虚名薄技非敢玩法犯奸成富也又非敢立然诺睚眦若向时横州里也而竟坐之惜矣

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之九

刘凤
文学二
郭翼
袁华
偶桓
张适
张仲简
叶颙
周砥
朱应辰
○郭翼

郭翼羲仲昆山人少尝学问与卫培游亦通经义言王氏易摘辞必范之古有奇气杨廉夫极重之谓可几太史左氏诗亦质有骨体与顾瑛孝彦伯璣等相和皆服其气调见羣雄方逐鹿东南欲一有所用之尝献策张氏云明公仗马榼下?地及越数十城望风请服者人皆苦元政守吏贪残自恣不恤其下非能极虑安危者也故民离散而莫与之守今诚能反其政休劳之率以乘时进取则霸业可成若遽自宴安湛于逸乐不惟精锐坐消且四方豪杰并起相攻壤进地益虽欲闭境自守势将日蹙且吴又所必争也其能保乎哉言颇切忤士诚几欲杀之其妻劝之云郭生策未?非纵不能用当善接之使无望我翼遂得逸去洪武间征受掌故自以遭时不能建立功业怏怏■〈衣上十下〉独所为书有传者时又有马驥元乱僻居海滨营田谷自晦苑囿杂畜众禽为娱乐州郡豪杰多造之常引避不见时尤重之

○袁华

袁华子英少好读书与诸生学诵即他授皆能诵诸生乃不能忆时时叩之尤工为诗杨廉夫为乐府有所风刺前代别为格惟引华与同顾英家多名画及法书日与共阅题目之赏好风流一时为美既元政益襄朝不逮夕而华辈夸浮犹宴然如燕雀不知堂皇燔烈际 国家平乱辟郡文学又以子为吏被罪株连逮而顾英客若易恒亦以游谈能诵古文重复与俱征诣鍾官

○偶桓

偶桓武孟太仓人初以年少侠游客诸公所倪瓚爱之劝令学遂日诵数千言试令为诗语警绝若素工声律者因为延誉尝所往来名一日起洪武中大搜故为游者至则命为吏武恐及辄尽力所守主自从事闽之崇安更桂林又徙荆衡所著有江雨轩诸集又有邹奕者美姿容善谈笑元官也洪武初征起复命守贑州坐法传诣刺奸徙置安肃二十年蹇义言其才用征还奕所为文与武相若

○张适

张适父仕于元适少悟绝为诗立成母贱其嫡妬之名曰狗子为诸公嬖爱怜其慧比相如也值乱流离道路洪武初以秀才举为郎工部病免复以明经被选择为吏桂林周旋浚池主估餽鲍税金钱二十之一衣食其间或不给竟抱案死为诗若文与高启杨基齐名而辛楚寒薄困阨之意溢于辞尝论浚所创开云自楚庄蹻畧定之遂留自王也至汉建元间王恢唐蒙司马相如王然于等所招徕降下之者种以十数置益州郡而云自靡莫之属浚?大今之县?昆明者也北至牂牁古曰牂州及所谓牂牁者今之大理也临安者本句町王地所谓邛人僰人也汉为牂牁郡而蒙化者汉之永昌曲靖者旧为东西爨者也自牂以东北则徙 【音斯】 为汉嘉而牂在雅州则皆蜀之徼也且汉初畧夜郎置犍为郡即今之戎州乃发■〈衣上十下〉治道自僰道指■〈牛羊〉犸此又汉疆理之次也又云自滇以西求身毒国往往闭昆明则牂之南昆县也此又自滇畧通徼外之迹也且滇在禹贡为梁州界并鬼所属分则固非九州岛之外穷荒矣地又沃穰千里名为富饶水土之美生物之盛十倍他所虽绝远其为要剧可知矣

今道所从入贵州古之鬼方也道隘且要假令一夫 狂则悬车束马之涂不知所出矣且以今兵威因秦时犍畧通五尺道黔中者大索之诸夷间广?岐涂何不可哉夫制御者先之形便则威无不迄久安者据其要领则无偏废不举之患所谓搯吭抚背建輶之势在我则虽有邪谋变计何能为乎且与其缘险塞径悬度临不测道一孔之所出孰与交衢四注分裂其支郡而关梁出入动悉由我有事若从天而下岂足道哉又按汉所谓关沫若梁孙水者若水出蜀旄牛徼外南道越牂印都以至??夷?朱提入于江所谓朱提银者也是水之所出自其界也而??夷?故役属西南夷又岂假他道哉此其言之可推行者故删取其要归之正而载之他所著有江馆湖濱昆明诸集有传者孙祝起家进士?尉士上言几事被斥已而迁守保定

○张仲简

张仲简在元师事张伯雨?黄冠张氏之乱反服養母颇闲诗赋书法亦婉媚饶介?游闲公子尝延诸客授简使赋季廸孟载方缙思简已就篇众推第一介赠黄金一饼王伟尝序其诗

○叶颙

叶颙者洞庭人自其父从游说之士多交海内豪杰然向文学故时者方幸无事相与恬笔和为坐而吟颙知乱且起慨然有安时意论议事形尽得其槩掌故博士李祈宇文公谅之属皆父客器重颙知其志相谓当不碌碌至元间选于乡署吏不乐罢去北之燕中欲以策于用事者值势已倾流落濠亳间久之无所归及耿长兴炳文闻其名召之欲荐上自谓方事之殷不能有所佐助今已定何复为吾且放意自娱耳宁能为吏守文法取戮辱耶竟死长兴所同时有许烺亦以处士名能文 国初应 诏至陈诗三章请缓刑宽赋蒙 赐以布衣遣归故山中有许处士亭存焉

○周砥

周砥履道少龊龊自好博学工文词薄游无所诣故与义兴马治善治曰周生久宦游无成而来过我于是砥往舍金溪山中孝常日往见之周生多谢病不见诸富人以孝常贵之也相谓曰马君有重客时独造为具召之并召孝常孝常既至候周生日过中不往孝常自往迎乃?疆往诸客尽倾饮酒半孝常起为寿客皆避席周生持酒不肯饮曰吾无德及诸君而虚饮食我我不及鲍生明矣然使何以复者我明日辞矣竟夜半去归吴复与季廸仲裁相和歌书迹尤工亦善图画已而又去之会稽歿于兵其所贻孝常书余见之魏先生所云砥之谓自好之士未可谓一节者也夫时之方溃士尽欲効其尺寸思有所建故伏轼结鞅西驰者咸欲辅既危之势于将颠坠者也伏轼结鞅东驰者皆睥睨羣雄间欲以口舌说而中之以所欲者也砥遑遑无所之游尝困而归矣生以为其中岂有所不得已者然哉昔孔子大圣犹七十余说而不用况砥之驽钝谋策无所可采论议不能出于成功故以为无关于成败得失间而弃之尚安所望乎哉且令庸庸随世回面污行以谄曲取容乎固非砥之所能也出于万分之一苟得当以効其所庶几者岂患无尺寸哉则又非可冀于行所抵也委而去之自绝于清水隅曲幽官稿枯穷饿没世不见知而不悔乎则又未尝有系拘重捐所不能释而忍之斯亦未足为负气矜高者劝也嗟乎马生视砥何者而可夫以砥不肖之身既不能致之名实功利之际又不出于介清僻奇贞厉之士谓游谈无实穷年谒请守事羈困而已矣嗟乎马生事未可以一二言也古之人岂独贤智可仗哉蔡泽嚙吟夺鬻于途季子困于易水之上而自信其画必可显于当世亦胶焉而为此其自喻如此然大抵拓弛无能为也

○朱应辰

朱应辰少为陈氏礼业举子当元季数与计对复弃去为古文辞亦与杨维禎游洪武初辟为郡掌故应辰为文繁而不猥诗亦工为长短句篆籀颇类古洪武初尝命书符印有集传

赞曰方士擐甲胄争旦夕之命岂不思投戈讲艺兴于文学得休息哉彼其出入训定劳于役亦因休暇时有访延故诸君当剧乱迄我造邦以樽俎谈宴从容雅游故复贵耶及事已定乃犹以异时者轻重论惟庸庸者得免非以论议为尤则才气有足忌者耶然既竭其力覃精综述有所垂于后冀久而不衰庸讵知湮微殫尽与化消灭若是速欤观于羲仲以下诸君咸有所著声倾一时今求之其乡发故篋鲜有存者则士所以穷年■〈衣上十下〉岁研探绎思紬列者曷益哉岂向时侈盈之以而能者蓋寡亦既以渐削平则运与之易今而作者益众故无复称焉文质损益何若后之视今乎及观张适周砥所论议裁而着之篇亦非一时所敢望矣

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之十

刘凤

文学三

虞堪

吴文泰

萧规

邹亮

张宸

滕用亨

赵友同

梁时

钱绅

郑文康

沈愚

张淮

陈体方

沈贞吉 沈恒吉

陈孟贤

周原已

陈绍先

奚昌

张习

陈震

顾珣

桑悦

○虞堪

虞堪者宋宰相允文后也徙家长洲家富其所藏书多雍公遗又行重购校讎日夜不休自称僻焉为诗颇清润兼好吮朱设色图画树石盘礴睥睨故?赏好所移尽费其产从祖伯生尝爱重之其书乃亦赖之传

○吴文泰

吴文泰者贫而湛于诗尝从事幕府文书无所省与丁敏游无日夕吟不休二人者尝闭户共为诗人见其终日突无烟往视之则方瞠目相对亦忘其饥也语皆厉苦若孟郊益僻蹇矣文泰洪武间同知涿州坐累谪徙云中而敏流落江淮间有怜而馆之然故

狂生不能久悒悒遂谢去■〈衣上十下〉饥寒道路以死

○萧规

萧规者其先自楚来徙学通二经尤长于训诂然不求仕贩鬻自晦为文亦鬱茂有体裁人或从索之多谢不能二子曰潭湖皆能世其家以学文潭举进士湖以茂才选永乐中

○邹亮

邹亮克明者长洲人少喜名善为文援毫无停思然轻侠无行尝薄游为人所击侍郎周公忱见其文爱之诲之学遂刻厉称博绝况守锺荐之授从事吏部已而迁御史既酷嗜书时虽散佚然颇有存者所得故宋时本皆完全与汤胤绩诸人共集汤气豪见亮不觉自折下之诗与刘溥相若亦相服也有漱芳诸集二十余卷他所撰未成者众弟顺仕至辰州守亦有能诗名

○张宸

张宸与弟粹中并有雅才文辞清绮而宸善六体书又有阮维则林大同俱为诗沿元季习虽靡亦称工矣大同尤学问言礼为容者宗焉又言诗及书皆有源委洪武中辟为掌故开封病免永乐初再召不起又尝着易义及他文皆传

○滕用亨

滕用亨者德懋从子也少从懋游既又之四方交其英俊与昼夜讲诵弟子从之者颇众于时以经义名者不过宋儒亨学通传疏不专一家言文辞亦辨博工篆籀永乐初以善书征则已老上见其容止衰怜之又献诗三篇大称旨令待诏翰林预修甲典时同被召者长乐陈登登所书婉弱而亨用笔遒劲近古至其精识妙解尤绝人尝被旨鉴别图画用思眇微见即知谁作故尤以尝蒙赏

○赵友同

赵友同彦如宋氏之裔也自其父工医同亦诵黄帝书遂博通诸家言为文温丽宋濂与游数称赵生得吾意洪武间辟掌故华亭后姚广孝以善医荐遂得召对又有言其知水者令从夏原吉洒水道利漕渠工毕乃以文学参侍从撰定功令及笺疏经义勒成为制学其弟泰子季敷至孙皆为掾史人谓坠其家风

○梁时

梁时者吴县人学为文最苦其父初以博得妇生时逾岁又博而负人携之去时少则随母长乃走会稽山中读书洪武中以善书选隶王府亦预撰列有集名噫余时有楼澄者自鄞来徙与时同授书沙中翁又授易鲁人霸客都尉胡欢所夏原吉与论水道澄具言吴三江入海所由及所当疏导者原吉欲荐之辞不就有林皋诸集传子曰宏至孙皆以马医名

○钱绅

钱绅者自泰州徙父少以鼓琴为人所爱绅生其家去从陈嗣初游乃得与士人齿

学甚厉苦故其文亦颇赡时有钱腴者与同姓为兄弟交亦有文而绅毋更适人生弟钱纓仕同知靖安

○郑文康

郑文康时又性能文虽以举子义进卓犖有奇志亲歿遂投檄曰吾所为窃升斗为养耳且龊龊为宁能行吾道有所建当世耶发篋中书昼夜读间序列行事可为时益者十余卷传

○沈愚

沈愚通理世以秦越人方显少有绮思与邹亮等十人称才子诗格类之而愚长于用多刘溥长于用少有箕籟吴歆二集弟鲁才亦宏丽与其季皆有名于时鲁所著权畧五篇长于论事

赞曰吴当元氏以来文下衰矣明兴则季廸诸人倡之而未能大异于前逮宣泰以后邹亮文康通理奋为诗又一变然亦无甚相远也夫始之造制天下悬之日月畴能以情易者故谴过必闻悔辱易构亦难乎免矣人谁不重违其难而轻自炫哉异时者政稍宽则学士大夫乃靡然向风争自磨励文渐以盛矣然气之浑庞尚??亟而未发时所产才亦厚醇以恣故未离于始之质虽放极其思犹且媒啗逸足未绝骋千里自超逾也谓时变损益必隆以渐非邪

○张淮

张淮者吴县人受学博士弟子辄弃去更名他师然涉猎书传不能醇儒家徒四壁立拓弛无行而才性捷疾为诗随口出虽研思不能加也衣弊履决人皆易之淮人徐志负书游无所推让见淮毫翰若飞淹警出人意遂惊而遁富人有请赋者饷谷三十石悉行酒家无所问竟以醉死

○陈体方

陈体方者故酒徒也然沉深好书家贫落魄其所游但为酒醉之置笔札其旁惟所命数篇并奏或口授人疾书不给尝自谓酈生非狂必我也者乃为狂耳每赋必酒酣以往才始纵发盖得之天授非缘学也尝于酒所好一姬请诗百篇当就之为赋至六十余人笑为所欺将死游行田间并歌并进醉而■〈衣上十下〉人谓达生子大和亦有父性才敏利下笔不休语妙一时而嗜酒甚日与所尝游饮醉则相和歌旁若无人者晚益贫并家居无之寓浮屠舍又不恒东西惟所之辄醉卧

○沈贞吉 恒吉

沈贞吉与弟恒吉者征士孟渊子也孟渊当永乐间以才征不就吏而学二子与陈嗣初故一时士无不倾游于其父子者皆有名当世相与推重而贞吉兄弟诗亦相若自相和篇什甚众下至其家人子亦能之几若郑玄家婢又皆善绘素貌人畜工绝每图构辄踰时乃就亦不肯为人作故少存者至恒吉子周始大着然二君立行简贵所居几闾萧逸树石环之激水映轩檻陈古彝器坐卧其中或舟泳焉历诸浮屠流连赏好有烈士

风故能成其艺也

○陈孟贤

陈孟贤者嗣初子也其铸词深苦命篇甚迟而工有姬辨慧知书孟贤所为皆能诵之时谓女书记又有孙继康王孟南者皆能诗

○周原巳

周原巳名庚初学诗于舅氏闾丘宾用尤好为古文辞乃以善为方待诏非其意其诗温厚和平有余思焉与徐用礼交而礼诗好绮艳情多燕昵以诗故不事事遂贫蚤卒

○陈绍先

陈绍先为文简质仕内史有所谏诤不纳谢归书迹亦清润人购之多不与故尤以难得贵年至九十余时沈贞吉兄弟俱寿与绍先优游山泽间称遗老焉

○奚昌

奚昌元启好为诗其所赋亹亹不竭由乡校升于司徒屡试辄下其所受业弟子皆得当补吏去而昌久乃被选

赞曰余闻之郑司寇云国初言经义皆主古注疏而兼用程朱氏耳未始尽废之也何后乃亦不说学徒以宋儒为乎豫源落拓而才故超绝虽格未就捷疾不假思力则枚生何以加之然诵多不主一家言犹以不诣太常受业故耶若陈颀奚昌沉潜盖久而驰鹜于辞故不待试高第名也孟贤造体殆艰鬱而不流庸不谓蹇二沈和令绍先平贍无伤于气原巳之质并君谦所推远矣夫

○张习

张习企翱吴县人为郎礼部出按察岭外喜学问文章尔雅多取往闻佚遗者校而传之故古之余多赖以存

○陈震

陈震少则以警敏闻升于司徒被选授文学掌故济阳颇言学时东人之学者盖鲜自震为学官弟子遂盛他邑亦靡然向风矣

○顾珣

顾珣文之虽以经义试高第恒不足其所业谓士当多诵不专一家言者故不任取学亦不懈性介严居未尝请谒人以此重

○桑悦

桑悦者狂生也其学无所不窥善属书离辞用剽剥往贤从博士弟子上谒部使者高其名欲使者折下之使者惊谓何物乃诞若是因进之使诵业无不通遂礼责之士所为贵学者慎行其身使华而不敦虽文奚以为生有美好之资而灭裂弃之是之谓何特以傲长者又非所以谕德行基厚命不佻也悦竟以升于乡司徒论士见其怪迂黜之丘公浚闻而召与语大奇之令为文每奏称善被选为文学掌故浚语使者善视之悦复拓弛不肯束带廷谒长吏以下皆遭侮衒之切潜于使者所使者以浚故虚已待之且荐其

才迁掾长沙又调柳卒不能任耽悦为赋俚甚文亦卑耳特浚等才不相远而以学诵服之且异时者习相沿靡弱未有能振焉者而悦实有异资溺不自觉惜夫

赞曰文之开以渐由元氏来丰庞之气郁翳未宣故我 明肇造至 宪宗时始再变然诸人亦不胜其质桑悦缘旧习有所发愤既已诋前之失何已之综述乃不逮其言远哉才者不易得亦藉于学及所为砥悦岂不知效法左氏太史非薄李唐以降作者哉谓有所择则其趣何广崇而流弊未还谓能辨之蚤不耶将力有所屈是以虽指谪往贤不少假而不能凌厉加之亦时者滞拘望之迪造难乎哉

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之十一

刘凤

文学四

祝允明

徐祯卿

阎秀卿

黄省曾

唐寅

蔡羽

戴冠

王宠

张灵

赵同鲁

钱同爰

邢参

史明古

史经

朱存理

朱凯 王涑 李询

吴燿

刘弃

文璧

彭昉

周诗

姜玄

徐鱗

○祝允明

祝允明颢之孙也允明生五岁能书过目即诵为诗时有壮语长亦贯通百家纵横羣籍有所撰笔不停思致佚发如涌泉故其名籍甚桑悦无所推让独心仪允明书法得魏晋人髓性傥?不备畧容观褒衣博袖与众人居甚乐易至默而深思慨然有慕意不测也多儿女子情时亦惑焉不问家人生产人或馈遗之随复散去仕郡功曹而子续由给事至方岳陆灿称其精覃绮鬣振发横厉文由此彬彬盛矣而俯仰浮湛混于俗类东方生云

○徐祯卿

徐祯卿者吴县人始业博士弟子试辄不当家甚贫蓬蒿而行故未尝有书也而无不通皆从他所观其才隼上清腴初与唐寅文璧游则其诗逸丽时有焉迨举进士见李何制作遂变而益遒研极诗之变迺其初由卿云以来至西京之盛沿魏晋而下其所攻论甚严谈艺之作出钟嵘矣吴之文自昌谷始变而为六代子伯虬亦名能诗

○阎秀卿

阎秀卿者长洲人有睿资沉深好书泊如也文清绮虽未离当时体而婉丽以则逸情翩翩若其人在目尤喜推毂后进人伦之鉴赏称允焉其行事乃尽佚去之未远而一无可征

赞曰希哲佻佻而閤肆虚旷与循吉并时其志趣各异杨则奇偏自好独道寡与祝乃发舒流易狂恣昌荡虽倾一时而所著瑕瑜可覩故誉损于前昌谷奋起变诗之衰元美称其云流泉泻轻雪映月仙人下游逸尘绝轨则其靡艳飘举荡冶雄逸故为绝伦而又云浑灏之气少谢何李其未然乎夫徐诚恨短而李之诗粗厉之有焉其何以尚之若何则比肩而游又可诬哉

○黄省曾

黄省曾生少后于昌谷尤长于学于书无不览而考研钩审精思微辨于经传义疏古今事变典彝章物幽邈猥杂损益变化无不究通故其详闻奥学近古无比文亦多为俳俚引援缉缀广喻肆陈猎前之华而追琢加之故镕冶衡范操裁具严而所自放恣滔滌混??亟包洞亦可奋千载于时喜名之士咸出其下诗赋虽云我则未暇然昌谷外无论也盖有意见之行事故不徒虚文?子姬水亦有儁才虽读书不逮父而其所著五七言尤深愜作者或谓胜之然逐时趣取流易仅唐以来不能出六代上尤工书学若嗜古赏识雍容甚都谓流风未谢

兄鲁曾先省曾成名其意好惟书修人事请谢宾客乃非所长落落于时与皇甫兄

弟中外亲特相善每相和为诗才亦近似赏采吴士有闻者着为书广逸遗存旧故论多称核子河水诗极有意力采摭唐人语散遗者哀为秩与父友徐鱗游鱗与省曾同学相长晚益工于书耆耄为后进宗

赞曰气之散越也吴得其华而生才也恒锤之故我 明百余年来士乃迭兴省曾语闳深则兼数子语丰丽则擅当时而兄弟羣从皆综艺文自昌谷作而吴于诗盛海内勉之长于六代时亦出崔蔡间然尚服膺献吉开后来者遂益变而古矣君子贵始之者今之秩宣故谁力耶得之番番好奖借成就之故得其一言争自励有不善惟恐闻亦可谓能勗矣姬水好贾疑其市人之心用以为损

○唐寅

唐寅吴趋里人少轻侠有逸才诗艳冶长于讽刺为博士弟子时文林荐之守新蔡曹公凤大奇之名始籍籍洗马梁公储论士东南第一归而言之程詹事敏政云所与来唐生今无比也即太常籍奏未足尽生万分一敏政亦雅闻寅从储请其文寅立奏几万言遂大被赏寅怀梁深会其当行亦请敏政文适敏政被命都诸奏上者都穆嫉寅潜潜之谓有寄请给事论罢之且斥寅为掾寅由此废而人亦尤穆猜狠甚矣寅故缼藉游于酒人诗多凄怨方其少年好为饥穷语初欲发其愤伤于世有所慨惋既乃卒蹈之尝为书与征明自悼其穷云孔?皆因所遭垂之空文逮史迁下蚕室贾生放流厥有叙述身虽罹戮辱视吾舌存否也又尝作昭恤赋以自哀绘事尤称擅古今

○蔡羽

蔡羽者西洞庭人嗜读书文词敏给其自负颇甚讥弹往贤无全者诗诋李杜未工及其自为则尤可议元美称之汀花水鸟殆溢美乎而欲非薄昔人过矣过矣文亦无取性复鄙躬自约致厚藏家本习贾羽既籍时资陈掾其间故尤致讥云

○戴冠

戴冠者长洲人博通多识刻意为古文词负气矜伉无所推与二千石察可者亦无如生第每岁辄试不当晚乃授文学掌故三原王公恕抚吴时重之其在铨也列上十事皆剴切语为之改容降叹长沙相李亦爱其文欲荐之不及濒死叹曰天梦梦耶世汨汨耶此惟拥??盈俸奢斥矫虔肆驾夷由踣耶已乎已乎豪杰废死乎其志悲愤所著书陆灿序之太史公云倂倪非常之人意有所鬱结则退论书策以舒其愤戴先生凡是耶士有以信千载虽沟壑无恨矣

○王宠

王宠者守之弟吴书学自宋克允明逮宠皆名得魏晋法然宠之资雅驯不以诵多矜游于蔡羽所而一时名皆归之胡守纘宗尤相爱重人有请宠者千金欲得其一言适又当偿进无以藉宠竟不顾麾之父尤焉跽谢曰人所为重宠者能修耳使自污伤不乃见轻而又因利之耶尚书顾璘极推服而宠竟悒悒不得进用恣于酒以卒所为诗与征明相若而格少尚之

○张灵

张灵本婁人子力作自给而灵生乃有爽气选为博士弟子与诸俊少并游唐寅尤善之灵所为诗能速成虽使迟之亦无复加也嗜酒贫无从得寅尝晨诣之卧未起呼之灵作色曰而公正酣遽醒之若岂能醉我者寅与之适他所见羣贾有被酒吟者谓灵曰?若舞彼来奚若灵乃佯为丐和其诗贾惊饮食之已而迹知二生乃大笑人以此污之使者方志来恶为古文词者斥焉生亦善图画能不逮寅

赞曰自子畏遭谗亦坐所与富人子行已不自慎卒困于游顾专患才耶才者众所侧目已又甚之其何以免冠額額老博士耳以言忤时贵其气之死靡折使得恣所欲为不快耶今其书存乃多慨愤矣梦晋无行黜乃其宜然以彼其才而使摧折至死生栋覆宇健犍破车独不可少俟之乎蔡掾虽老无奇其言有存者亦幸不幸耶履吉实有儒生风可谓方正博闻有道术者虽详延之 诏屡下而竟不能以高第为即将由吏浅闻不能究宣也

○赵同鲁

赵同鲁与哲少伉爽不群于书靡不涉猎意存当世喜论事能深尽不随俗是非尝上书三原王公恕请宽赋及与使者书论閩左籍言皆口为岂直无馱馱与所为诗名仙华集陆灿序而传之时有贺美之都维明楼仲彝诸君子皆有文行其事盖逸

○钱同爰

钱同爰孔周性狂率无所屈下气尤激昂思致青云既不当于时乃潜志学间诵通诸家言究明其旨向无以徒训诂为然颇有所著或称其养长华实郁郁乎沉渍熟哉以其放荡不获乡曲誉

赞曰与哲其先宗系甚华既所凭厚矣而气亦激直无诡随谓倪正沈慎善持论者非耶孔周诞运矜已过甚曾何足云而沾沾自喜特以附昌谷载之

○邢参

邢参丽文湛默好书立士行讲授里中以醇和称昌谷诸君皆与游其文亦质而不华贫无以朝夕空如也竟未尝娶恒独居遇雪累日囊无粟兀坐如朽株诸君念之试叩门见其无惨凜色方苦吟共相慰劳亦不言他第诵所得句自喜又尝连日雨复往视参则屋之三角垫方怡然执书坐其一角不糝亦累夕矣昌谷论其有四懿居约而恬愉操槩履方吴士喜任侠若参者有道君子也

○史明古

史明古者吴江人状甚伟须髯磔张性善交请谢宾客不吝算器家故饶四方士归焉虽在閩左名出公卿间郡县吏皆下之有所论议亶亶不穷颇亦恺激听者为倾有纵横才若尽地利植经业贾市治生产故其习气无论好书多所通解为五言亦为数君子所称池馆宫室占水地胜供张甚盛古图籍杂器陈之西序诡衣冠与客谈笑有四方志未遂少谒于徐公有贞而吴文定公与为友王三原素好士亦以吴雅称之故礼焉然论

者犹谓其善市名或以为文定累云

赞曰士以固穷贵而穷亦良难矣参之洁亮不污独高其节岂徒文焉尔乎明古居泰不以溺丧而壺士不?已恩昔白圭遭战国以其术行之时而明古仅因以名亦由使者贤不替干旄之风 宪孝间一时推盛虽在墅亦有人矣哉

○史经

史经引之和谨有令誉即之温温而中实介严以意气重动能率礼不妄言笑独好?诗与二三君子雍容终日虽仓猝无遽色

○朱存理

朱存理性父少嗜学亦工篆籀不为章句而于书无不通故时者多长者游而性父持风素以雅道贵士亦不若今以游扬寄请任诞放恣为故所著书或佚遗虽片言存者重于尺璧以其人也

○朱凯 王涑 李询

朱凯尧民善和良承意能为弟子都养与诸生游甚款五七言亦有可观时又有王涑浚之李询好问皆好学尚友宽令敏慧可称彬彬矣而涑尤有儒资早卒未极所往

○吴燿

吴燿次明情寄恬淡穆有清誉间为文流悦可玩虽未遒亦称于篆刻仕为从事请谢宾客日夜不怠

○刘弃

刘弃封叔慕长者游质亦高挺少不婴俗沉志艺文与诸子皆允明所■〈目匿〉好也

赞曰士所以得显其名者故亦惟所遭值耶太史公所谓不附青云之士乌能垂于后世信夫尧民等虽知所向慕然才不踰中人特以与二三君子时开北房从容燕泽纵熏服之乐或置五升之飫惟恐先生不得饱是以名存至今故不谓幸耶

○文璧

文璧一名征明生少后于允明而与徐祯卿唐寅齐名友善已又与蔡羽王宠同倾一时诸人皆先卒惟征明在名亦益起后来者依以为重事之甚谨征明亦善接引随所长称之誉因以立不者以为非其类虽才无所成名相诱为俗喜事少年争奔走之贾人子冀得其题目忘失贩鬻长者家儿欲与士人齿旦夕候焉四方来者轸相接也悬衡一时轻重在口如此者数十年然征明资实沉厚学诵亦博淹诸经义及子传太史左氏皆览涉不若后生务空名文亦当时习气流易以婉怛诗在唐元祯温李间工书善图画艺皆绝人求其迹者不惜重购尤称善鉴古宗彝鬲三代器及缣素品不一吴善以贖售得其一言辄价翔故以文史玩弄声重于王公间亦一时治熙得优游驰骛于彼或患其流使人若狂颠蹶造请徒好名为非其意也初以荐得待诏阙下亡何遽乞归人尤以为贤闻之黄生云倭人尝贄谒征明服绯坐受其拜于庭示以尊中国体竟不受馈又不与

书二子彭嘉彭书类父能肆于学其人尤长者仕为文学掌故携李而士大夫过必谒之彭乃遣人持刺城门授之云掌故报谒令之前则对云实未来也人以其负当世名笑而已迁大胥属卒而嘉亦博物君子有父 风书学不坠或谓过之绘素犹擅至子及孙皆蔚有其文

赞曰征明天笃其衷淳淳其志澄之不清挠之不浊虽毫及之而意韵逾遒放道而行犹之?朴俯心循俗即之藐藐故云声者无翼而飞情者无根而固使雕卵而后淪雕擦而后燠则日之不足何以无所因而傅乃造作名誉疆有所慕党之日崇外轍以为惧魏先生曰余少则闻文先生端亮纯直惠和以训其风穆矣时之方溃则狡焉以驰骛于利行侠劫人而有名彰彻故遂以名为病夫名曷故哉且往者适厚醇多长者游而交相恤所无能死生之故三数君子有闻自昔岂徒文艺焉若征明与人无不容而终其身未尝褻近妇女此虽细行可以观其槩矣

○彭昉

彭昉寅之初有盛名选择为吏南粤粤人故易动而令乃简易无威仪举止多轻躁遂不能其官使者犹以昉文章尔雅未闲吏事优容之调他所后竟以罢归子年少游于征明而潜思大业弥岁从事洛诵遂皆究通之征明大称焉名日以着所为文若诗一时靡焉向风争相慕凡为名者出途者闻彭君无不愿交虽倾盖而语皆谓已得彭君?喜部使者衡水杨先生宜请焉不得已而起杨先生命廩 食之且令预计以其意良厚亦疆应之已而竟不行时方以经义策士年稚无富贵心陋宋儒章句不习占??毕家素贫又嗜酒不问生产独置瓮床头朝夕饮耳书迹遒劲贵于时

赞曰寅之俊少斥于外用不振亦由自凭负作不顺民叛其上乃即鹿往吝孔家称善笔札而行简易贫约以终而无悔卒自其志为名非有所觊覆出遂用为利

○周诗

周诗者常熟人少读灵兰书鲜内经深有意以医行非其初也时独玩心神明综述艺文与子安兄弟游子安规之书云观以言杂文多超朗不堕前人风而不自贵寥落无所成且生有其才矣又得所友而徒尔使后之人安所征或征之矣而仅若此如才与友何盍蚤自刻励年时迫勿妄委之予尝与子循登其陇惘然而止

赞曰诗之称于时由子安然其人旷以疏行已有耻特诞迂类可咲至不肯见人或闻其名造之多避去与彼自衒者异矣士之贵名岂其为利今乃以无行为放达寄请为通侠向之所羞居之不疑悲夫

○姜玄

姜玄者黄生尝为予言其人少则嗜酒学虽诵多未尝就博士弟子试与邢丽文游且慕好之不以贫窶为蹙足未尝轻诣人或使其子弟学焉亦时谢罢之朝起每视盎中粟稍可炊即闭户吟笑居湖濱有幽遁趣岁中所过相善者率不出百里其诗时有佳者黄生诵其数十句皆可传异时

赞曰古称慕贤之行亦由笃信好古守道不易玄之事甚微当由邢参有所感发耶
吴江为邑尚通无以贞遯名者若玄岂染于俗哉其诗得黄生传之固亦难矣

○徐鱗

徐鱗先生者少黄省曾一岁与同学相亲爱而省曾尝名之蔡羽先生其丈人行亦受其学于时名籍甚者三数君尝参预之闻之初名陵字少卿盖慕李陵之为人已乃改今名其从兄缙方贵也数射策不中以不中故业乃益肆所为诗辄警绝有奇致然时从少年戏耽昵女子流连日夕惑于倡荡致废其产不恤也每游建业壮其形胜左拥优爱右抱孺子命酒剧饮兴酣以往引声出潇漻间诵其所赏书若所为诗自豪甚欲轻世肆志焉顾无为藉何以效其尺寸者时已往不留遭摧折者屡人见谓狂生而气犹不能诘下益愤愤悲世之莫能知而道之穷也命之不可如何也前与游者其人咸逝久独遑遑无所之余时与遇于酒所虽藉其老尚馀气未肯深相服已而相与言洋洋纚纚精说靡辨才甚遂倾心焉先生读余书亦以为世未有也每奏辄称善故其交特异从之侧目者众矣属县道有所征为记上有不应事实者疑先生孰何之乃以微语讽余笑谓今何时原涉辈敢尔邪先生亦骇然处虚若无闻竟归山中

再踰岁始来在其诸从所人亦复就之然为名者云今所急为游谈广肆誉之四方贤豪长者与势之名乡引援附离耳若徐叟虽微说约多言繁称谁则闻之故佯为浮慕而意乃猜焉时时过人宿留非不欢若平生巾褐盘案栝閤间雅谑迭奏至漏下半不倦也而萧然羁旅寄浮屠舍所谓独出独入从庄生言而惠施者乃操短长说先生盖窵不欲以干意又无若彼何也有子终岁夭惟老女亦寡无子故岁中所过虽欲留不能久辄返其所閤幽寥閤寂默念所尝往还悉寓之诗其旨辛楚伤瘁而风犹劲厉愈益遁上不谓在髦期自岁旅于鹑首之次先生年八十中间去来具区之藪者不一尝憩余共陵峤甌即威灵丈人之居访禹所探书几欲乘泛泝穷汪濊未果最后从革之纪先生来余适为吴贤书谂之授所记忆至纤悉有所扬摧令余识之无避为然益怜其笃老蹶蹶虽自疆每谢良苦

迨明年冬归期复游数相问云非徒甘粥犹善啖脰炙不衰也视听未谢昔间曳杖耳戒楫者数竟止遽闻问则已即长世饴终苟而可亦古者志介之士固穷虽歿不忘哉素所为书皆散佚或为人乞去独在笥集幸及先生求傅之夫今之缝掖殆负贩者之心其始欲有所自见不能遂或妄自名高士多其算器广其谢请是安得不溷长上不悯有秩若先生以为人知之则愿也人不知吾苟自知也吾将终身守此勿勿故他时虽见宾礼犹不释然所至未有一人能造之昔杨雄谓时无知者然人乞其书称叩头死罪则今之君子何不自喜而患先生为闻其称省曾之言云北地书某所已有之尚不行胡待哉彼其自视若何而不憚下之若此也士之能倾视听则固以相应和者有所以动之亦势然乎哉

赞曰古有以少而教者亦有以少不如人而老始厉者唐睢年九十而存危国何不

及其壮而用之乎岂固有未可也绍卿先生始所与游者不甚向之既芒然来辱业乃益进使非假之年则几不中道而止与然非数君子者淬砥弹摩之则锷?且不廉剡而成风之技亦舍郢人安所效也故知所与处其可不重乎若使之自好夸于外而迁心日以驰溶若甚醉懈怠而不劝安得不简其业而功愈隳者固无论也

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之十三

刘凤

辟命

隐逸

◆辟命◆

刘德让

盛逮

顾礼

莫礼

范从文

马逵

陈则

沈芳

赵宗文

袁政

沈澄

吴简

季箴

章珪

伊恒

卫靖

陈述

○刘德让

刘公讳德让余五世祖也先自汴来徙大父顺之在元主领樵茶公生而有伟度扩如也仪观甚美于书无不读遇时变晦遯不以才能见及洪武初使者访延且以经明荐

不得已而起授文学掌故沛县学徒方辍学不讲乃大相开诱使勤于业又举张伦同事教人以经义为制文于是沛渐有以诵通次补为吏者矣归而沛人祀之于师氏子五人曰

孟公讳敏以经术教授里中里中儿皆敬事之无敢失其意弟子益盛去而仕有名当世者甚众公事亲谨视服膳纤细必躬必亲仲弟婴患忧之废寝食廛治疗积年而愈四方士闻其贤争来归乃以孝廉辟令德清为政有经奖善黜恶务以孝导满一考征入中书士大夫无所不倾者朝夕奉简以从而推诗书之意有所著论数万言孙海汉阳决曹有廉称季讳敷则予高祖也学通诸经各为之疏人称经师永乐初以兄政前死累辟召避不应

赞曰余闻之杜琼先生云刘氏自钟山先生金陵徙吴几百五十年其先则又自汴徙在宋之中叶也代有人遭乱谱牒散佚遂失其世次仅自掌故君着焉方戎马间释介胄谈诗书大兴文学虽 明诏求贤自上详延而首应辟命为之叙宣其功顾不伟欤自是胤嗣者繁其以功伐忠烈勋名贞行显于代者不胜记矣

魏先生曰刘氏之先盖有大功德于民宋之南也黄州公提一旅以从奕世以忠义奋其死封疆者数人书畧可见然中间佚忘不能着代由主领公而后乃以诗书之泽传于今夫贵荣富溢华观显称吴之巨室多矣若孝友操行忠槩诚节则孰有及者闻郡司法公世鼎淳淳长者仁能逮物平居未尝妄言笑友让刑于家施于政无间然称笃道君子若其在闽折狱无避权贵请对使者辞直得调凛有操裁岭外时身至夷所置隘谕使投兵罗拜此其义声烈烈又岂徒务循谨者哉

○盛逮

盛逮景华者吴江人自其父时以闾右徙郡中洪武初 诏求贤才得对称 旨赐官服使预论议与陈宁以事争乞归及宁来?苏衔逮未释欲甘心焉乃令衡籍于里中俾以谷入虽他所逋必登之以满其准逮?竭其力遂毕输无以负其友唐当入金二百不能偿急走逮逮又为输故谷之轨程既及宁无以加罪而弟坐盐筴方见录父怜其少逮逸之而身出就吏论徙夏州初逮游秦晋间遇异人授方为之有效年九十余子寅以医显

○顾礼

顾礼者昆山人洪武初以材征授官刑曹久之 上自拔擢为侍郎已乃以其家坐之例免十一年再征侍郎户部会计出入人以为能进尚书又改刑部方用重典刑乱司寇尤为重任礼守戢谨其所当法未尝滥卒于官

○莫礼

莫礼士敬洪武中以里籍选礼无过征为司徒属与同曹沈玠王让李鼎等十人俱疏陈辞禄入许之一考进侍郎勾较簿书精解版法时新为政轻重未有準礼所守功归于府者衡籍十三四尝云今所为吴后请宽焉不果俄以党人事起薄录之

○范从文

范从文者仲淹之十三世孙六世祖柔食邑于昆父为吏潮州卒从文幼则奔走求其哀哀感道路且失所在遇雨隕焉乃露遂启之归人以为孝致之洪武中以孝廉征奉使不辱命擢御史改综户曹事奏贷株送徒余百人其僚嫉之中以法将伏锧呼曰幸以议贤得百世宥 上问而知为淹后乃免之谪徙庄浪顷复追戍金齿永乐初复以荐召为掌故金华历金乡三为师氏归年八十余乃卒所论著甚众

○马逵

马逵者吴江人以贤良征令合水又为昌邑逵所赋政平民有讼者教谕之使听解度不可已乃受理又重自刻厉蔬食水饮妻弗能堪请去逵怒曰今法密而欲相随赴西市耶竟听之去

○陈则

陈则以秀才举治中应天俄进侍郎户部以阅实户口调同知复迁为守则与高启等齐名诗亦丰缛俱以召命行后议选士法颇可采

○沈芳

沈芳以茂才征奉使按察迁布政北平又有沈应干洪武中 诏求贤四方得召入文华说经令参议豫章又改山东应干为诗视陈则稍质有集曰东涧

○赵宗文

赵宗文者长洲人洪武中 诏举贤才征入以母老辞归永乐初复以梁时荐召上令鄱阳权幸有所请不从又嫉恶甚中法谪徙后宥归文性刚严终日俨然遇有所发无缛借故亦以好尽为累

○袁政

袁政文理少学于余贞木所永乐中召起为湘阴令民政窳惰不能力作每征调则多逋逸而令乃当坐政为教以垦田力啬治生业遂因以饶复以夏原吉荐迁守遂宁未至间止于亭梦小儿被血者盈望问知郡人贫产女不举乃严为之禁又示之礼送女无过奢俗因以革政迹闻于时

○沈澄

沈澄者长洲人洪武中以征命入将授以官见其举止迂缓曰腐儒罢之周公忱抚吴时重焉数访以时政澄长于诗又善交际士之为诗者多就之澄为饮食馔客未辨终不尝食异时者顾瑛好客为仪简澄加之敬恭金问方都系司空橐饘之馈凡十年所无怠问后得释曰微孟渊馁死矣年几九十子曰贞吉恒吉以诗世其家而履操峻高善图像学神仙方不就皆年至九十

○吴简

吴简者吴江人在元季自谓儒吏役之板筑间儒衣冠操筑人笑之洪武初征诣曹试以富民论简所奏愿疏渠通灌溉课粟多者第赏劝之授主簿昆山以疾罢所为书皆举子业

○季箴

季箴者常熟人永乐初以经明行修荐召授文学掌故昆山迁巢县箴所授业弟子多擢第仕通显而箴未尝一入其庭抗以师礼来见者不敢有其贵尝为吴书不就辞近俚人多笑之

○章珪

章珪孟端宣德中 诏求贤郡邑以珪应之授以掾史岭南已而召入为御史当谏狱预为分别轻重奏之辟所当无不符其平反者甚众畿甸蝗为奏蠲赋六十余万居亡何又廷论大臣数事班列?震以数忤谢归子仪格律皆登朝而格有名于时

○伊恒

伊恒宗有其先自沐阳来徙则宋之建炎也父又以闾左徙金陵恒少则从博士弟子游书迹甚善召侍 东宫洪熙初与修撰金问同被命待诏 阙前进符玺少卿时有宣嗣宗者永乐中亦以善书征授中书舍人进司封员外嗣宗素谨人问以 禁庭事终不对故为 宣宗所眷既卒恤礼良厚任子为县丞称殊遇焉

○卫靖

卫靖者昆山人洪熙初 诏选书博士得召入备法从执简文渊阁进主事礼部及修 宣宗朝史预书牒焉赐赉甚厚兼能诗

○陈述

陈述者嘉定人素称廉直容貌甚庄以贤良方正征为小官已而迁御史遇事能极言讯狱多所平反陟参政蜀抚使者雅重述荐上几召用述乃丐归时有周纲者数以诵多试不当御史成规程富并荐其才乃授融县丞融故夷中不能习教化纲力为喻晓之身自行阡陌劝耕见忿争者委曲解令和睦有操舟者十八人疑为盗柳守令讯之并得释后其人持金谢即厉色叱之去满三载当代王忠肃公翱抚粤荐其治状请即用为令益得专行惠苗尝乱纲出御之民自为战功居多辄以让南荒学者鲜又为作之礼义俾民子弟皆诵学时课之遂大变其俗士多举于乡者叶公盛继抚粤欲荐为守适卒后其子奎从韩公雍征柳人犹目之曰此故融令之子争为之效死遂特奏为融丞

赞曰古之举士也或咨于朝或上所自察至于公卿皆得辟士故汉三府与州郡各任人为吏版授檄署惟所假置若 国家初建一言悟意即加拔擢又来之众所谓贤与观其行能皆待以不次求之如恐不及于时乡举里选之法未用也而所任人功业章章显于世类非后所及至法已备进用之涂益慎而所得士视前之效节致忠勤事以死者何如哉且士怀能不见初未有所覬然上之求之也能无亟乎故时有周夏三原王公等在外抚循民俗察孝兴廉有所荐上其德业闻望孚于内外故能不疑而士乃得因以用不由选造而往往 玺书及门征拜官者自后虽有佐王匡国平治戡难之才亦屠钓藪泽终焉耳曷能自致青云奋于用哉

◆隐逸◆

王宾

韩奕

张介福

杜琮

龚诩

邢量

王琦

徐震

魏昌

阎丘宾用 徐讷

○王宾

王宾仲光独高其道性峭严远于俗学无不通毁形容异衣服箕踞道旁人不测也越人戴原已以医着宾叩之原以秘不肯传欲使宾痛折节宾不可因瞰其亡直往取书去故益善为方所治无不全与韩奕俱厉风轨守姚公善折节下士闻而造之宾避去他日守乃屏人直入其室始肯见之受谒纳贄为弟子礼所告皆大事系于时守欲荐之朝终不敢发言其奉母笃孝病革母呼之绝而复苏已又闻其声若在左右犹称儿不忍舍母者良久乃灭其所著书有吴名贤记古迹诗等姚公广孝既贵归见之掩面走姚守死勤王实宾为决策云

○韩奕

韩奕者宋忠献魏王琦之后其先自安阳徙幼而矜庄有威动止不妄乡里皆严惮之乃舍去游行山水间并歌并进若狂焉遇墅庐踞坐累日不言笑人叩之终无所对或兴至为诗下笔不复觉工洪武间乃与宾俱以医浮沉于俗姚守闻而造焉不得前又欲因宾致之亦竟不能一日与宾至其所亦走芦中守叹谓古称名可闻而身不可见者韩先生之谓耶

赞曰易称龙德而隐者为潜夫潜者谓时然非其人又何谓真隐也王先生行诡异人皆以为近怪然洁其身不违其亲志所之不迤于威岂忘世绝俗离群者哉特既无任于时可以免焉耳若俞贞木遂以死殉姚守而计划举事宾实发焉守之以死固宾意耶虽未食其禄而为守所礼谋及大事以正对遑为利害恤韩奕虽共隐而趣不同且求之若此而逃焉谓已必不能有益于时可尔徒以为名而苟遂其志非也

○张介福

张介福子祺自覃怀来徙家少从许衡游衡所为学以道德自命福遂操轨迪践制行有幅无或斥越自以不及養不仕以禄食家故贫寒不能具夹襦或以纻絮遗之不受虽纤介必以礼至死不移张士诚乱兵入其家危坐不为起令导之他所发其藏不应以刀斫其面伤仆地醒复取冠戴之坐自若兵怪以为昼乃见物惊走去又恐或发其墓往

庐焉士诚闻而欲致之不可使其弟往问语以无乐乱无贪天祸无忘国家者馈之力辞焉病且死犹爽然谓其友曰吾志慕古未能万一惟母污于时庶几哉

赞曰士有贞行或类于愚及临利害不易其操非自其性然谁可勉者介福固儒者时未可仕托以三釜不逮其亲宁有为耶罹兵革不知避顾亦无所往尔义动小人不敢加害诚有道之士哉

○杜琼

杜琼先生生而孤育于母俾从陈继先生游遂深综经传博稽古坟其行已醇和无矜傲色所谓枸木必待櫟括蒸矫而后直者以非其性也若其操觚削牍鬻有沉思图尽妙尽物理不徒区区规拟形似况守锺两荐之朝皆力辞不上以生未识父尝寤寐见之为征其状于母遂肖貌之母泣谓得其生平有司又欲以孝闻琼请置之而旌母节遂为表其闾以贞义所居即故朱长文囿唵笑其中客非故人不得通姊老事之甚敬母疾刲股疗之愈宣泰间屡下求贤诏所司仪得用嘉应之知不可益礼重焉余大父故与先生游先生所题素甚相推与今犹藏之先生诗则王文恪序称其沉深有隐士风卒年七十有九门人私谥孝渊子启举进士御史

赞曰国家故事守令皆得自言事故往者若姚守善况守锺其德入人深固无论而干旆之风至今咏之所荐达者亦甚众若今虽未尝禁之而不敢言上者以畏部使者欲白又恐却遂顾望用为俗杜先生虽贤遇其时故以布衣守令候其门争欲得先生至不敢发言古之人有云衣与缪与不女聊故处士得申其节名不没亦可观其世

○龚诩

龚诩大章父登洪武间给事中谪死诩少与母逋播久之肆探群籍办于天时以知百物周公忱数就之语必移刻所为发地利治粟帛多其计划两荐之为掌故松江太仓皆力辞虽不仕而明习国家典故吏所书牍若轨里籍无不载有田三十亩衣食其中未尝娶晚与一老婢居种豆植瓜所适无远近必步卒八十余

○邢量

邢量用理亦不娶独居殫瘁甚以卜自隐若季主先生每作一二卦即闭肆不复与人接败屋风雨不蔽苔生坐隅破絮自拥突尝不烟其庭可以搏鼠而犹歌自若也于学无不通壁下尽列图史枕籍其间客每就谈不为具脱粟菁菹饥则往他所食复来与共征逸事虽疏者已穷而犹列所未尽时有沈诚者亦称博极深隐自高人莫能识有欲见者必避去然诚质无文故无得而称

○王锜

王锜元禹家荻乡其从父廷礼有隐德存孤嫁故人女客有赍伪券贷者?偿之终不言锜素富躬自约粝粱之食葱渫不时设也学读书于其妇父刘博尤刻厉故所通多而于史所记事无不载与客语必由衷不为饕辞曰非礼也敢虽数忤不肯唯唯故人多不善也惟所知二三君子时就之其居水滨为室甚朗杂树嘉木环之别为台成介吴文定

公踊焉吴顾谓虽楚茹溪何以过足使人乐而忘死殆不虚然不为在谯吴亦不能若是欢也其所记事曰寓圃志传焉他书为人特去

○徐震

徐震其先自婺来从父虽贾慕儒人数与四方士游学其子以经义令不主宋人所居具区又吴地奇胜处故善为诗穉绮縟时蜀晏铎海昌苏平辈负才名震与之狎相知为诗甚多刘文恭公实序之邑屋皆敬焉达于郡行乡饮酒礼屡欲宾之坚不肯美田宅售者必过其直已而恐其无为活时复还之王公璈初与相邻矜其轨操每过辄尽日而震不以王贵屈也

○魏昌

魏昌在宋时自蜀来徙世有闻昌木讷人也章服屣屣貌朴墅无威仪居近市而堂涂甚修洁疏池置石焉垤隆然有幽邈意故徐公有贞祝公灏刘公珏皆好焉恒与游昌既率易不知有贵人诸君子亦乐其简也数相和为诗沈启南图之一时传为盛事而吴公宽为之记李公桢伯书于壁人尤艳焉继又有朱宗远者行义亦卓为时所重其处亲嫻内外皆有礼焉人以为楷四方来归者颇食之三弋五卯不为客有所轻重故舍尝满人疑其有侠行然不诡于流俗侃然正议余少则闻之先大夫云

○閻丘宾用 徐讷

閻丘宾用隐于吴市耕以養其亲尤力学好吟咏尝跨牛行且为诗人遇之不测也虽田墅悠悠有廉直不污之操时又有徐讷者以布衣抗其行无所屈王公大人居家礼范肃恭断断如也每晨朝其家人诲谕之皆诺而退又集古贤行为书可施乡闾与严志道计蒙正者俱相励以敦义俭节吴公讷极推重之其季子即御史中丞恪

赞曰往閻里优游时有敦厚不欺其志以德隐于穷巷市人而公卿大夫皆高其行惟恐不得友焉或不肯为人知而郡邑吏乃为鞠恭屏气候焉至不得前况敢凌之非礼哉时之盛如彼自后男子永传辄箠而愿恚者繇之必辨其遗风余泽又安得有存者乎必也好佼而多私请乃横于里犹盗处士名故虽有好贤尊礼遗逸之举忠信之长文雅从容博求之野冀复见往时而风之渝日以甚若异日豫章南粤使君有所宾礼而诵言犹谓交谪其负虚道而窃厚受媚谓之隐良僭谓之蔽公固自古有之矣尚何怪于今故周况之称甚烈亦时者有以成之宁非有天幸耶

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之十三

刘凤

艺事

宋克

夏■〈目永〉

黄子久

赵原

张观

史公谨

沈周

王履

盛寅

韩凝

沈以潜

刘观

钱瑛

王时勉

张养正

沈景暘

沈遇

谢晋

苏复性

陈季昭 周臣

陈淳

○宋克

宋克仲温长洲南宫里人少英慨以武力自憙击剑迹射学?兵将北走中原从豪杰驰逐会士诚据吴度其无成乃以侠立伎于俗面折人论议无所假已而谢客杜门取薄??虎临魏晋书穷昼夜不废遂精其艺为行章草皆有意称妙尽古法今所传七姬志等类锤元常允明论书谓如初筵忽见三代卤彝盖亦天授非人工能逮时又有宋昌裔者工力不减克时穉精媚

○夏■〈目永〉

夏■〈目永〉仲昭者昆山人以经义举博士弟子?庶吉士 文皇帝课书学仲昭书独被赏改中书舍人命书 宫殿榜眷赉甚至 赐第与告且 赐名从日在上已而迁考功郎出守瑞州入为少卿太常其所守官皆无失名誉居常好纵适游放无不之子钺事之亦至日为具待所善客与之相羊画竹石名擅一时远夷来者皆购其迹重贾而画乃善于书兄昺亦工于用笔昺既遇知 文皇问其所学书以昺对遂驿召入试善之

授中书舍人

赞曰书于六艺居一焉自史颀创体至于秦汉代有改作而古今之变可观矣夫礼乐制度无不由质而文而书乃独自繁而简古之篆籀其难习甚自隋以前隶特行唐以后始以楷用矣虽锺张二王兼善诸体而便于操牍无踰行草法故日趋简易耶我明肇开二宋书寔擅代及卢熊仲昭皆善题染若余宗文恭公精极楷法笔意间丽然以名德掩焉及徐武功吴文定李太仆其所源渊咸有自哉而祝允明王宠遂度前代比于中古可谓擅绝论者犹谓克实始之允明备焉征明以下其流益繁而吴书尝冠天下无不善学者莫能图何哉

○黄子久

黄子久者本陆氏受重于黄资故绝人负书而游见学士大夫伐其技能多所凌忽遂以罪辋之后逃去?黄冠往来吴越间好狡佻教授弟子无问所业谈儒墨黄老以口辨屈人其画长于山水初学董源已乃稍变之有画诀传于今

○赵原

赵原者亦师董巨然善为山林窅深穷遂意 国初征善画者集中书令图往贤着功名者原应对失旨见法

○张观

张观者嘉定人少而游四方见山川形势辄志之遂工图象师事夏圭马远及与盛昭吴仲圭辈交故尽得其法格力加遒又善鉴古其所辨三代器如探契尝徙华高洪武中还吴卒周庄

○史公谨

史公谨洪武间以伍符发赴浚已而用荐为理士应天又调丞湘阴节槩甚高善为诗而尤工绘事家大父与游所染素多为人请去今存者踰百年设色若新

○沈周

沈周者相城里人即恒吉子世隐德不曜而重于州里周有经世资专工于图画至他技亦时学之书诵之辩而特好说家故所著多本裨官杂说论所闻民间事琐屑咸载之颇言神怪不经间为诗亦如与儿女子语耕稼织衽事虽俚甚而颇切于人情其请谢宾客无论寒暑自其里入城多寓浮屠舍人请之辄为操觚无为异事亲孝母夫人歿周已八十而犹孺子慕至毁与弟友相爱抚妹孤嫠有恩汪守汴欲以孝廉荐力辞王端毅抚吴时重之数延问得失周终无所应然有闻焉必为之动色其画得之天性绵密疏纵摹临自运备尽古今之变妙绝当时至以绘售者皆假其名以行至于今尚然

赞曰世本穉史皇作图书所载山龙华虫夏之鼎象及科斗书云鸟形是图尽之始也吴故多才艺而画尤穉为焉子久赵原名载自前而史谨杜琼及周代作岂惟擅东南存典刑哉诚一代之美无复加矣至周之迹独多由其善体物随所意无不愜而亦以贗者并行故耶若其重则以延陵太原诸公卿为之折节虽欲无重得乎故技虽所自致而

有籍焉余闻之故老延陵以少宰归周疾已革不下车排藜藿入穷阎执手以诀则非古之人乎何以及此哉

○王履

王履安道者昆山人学黄帝书于朱彦修遂尽得其术谓汉张仲景之论寒疾备矣而未言其变所谓上下无常合而并至偏害阴阳推本岐素为立法考又谓诸病阳明与传少阳所病病及太阴厥阴所薄为患篇有脱简于三百九十七法有所简汰益入之极论内外所中及暑与风无以自缪也名曰??厂??洄论及他所著上参天文下极地理人事诸家所治法为书甚众履思既精手敏而视远加之博综方论道术善为诗若文图画学夏圭使腕有余力故秀劲行笔意在前故丽密尝游华山为图四十余系以诗时穉合作若医其所究通后来皆不逮

○盛寅

盛寅启东者吴江人少学于王仲光察脉所甚精永乐间有奄人以蛊斥居外久之上望见惊曰而固在耶对以寅实生之得召见拜官尚医时有黑白猿者上爱之其一忽病使寅治寅视脉谓不可为上怒与猿琅当之使偕死寅日夜泣已而猿果死竟赦之太子妃孕而疾动寅谓当与利药诸医咸骇阻之妃闻令言利药者进治立愈大被赏宣德中使应制赋诗又尝与从官奕禁中上适至见之令毕戏且令赋奕诗上亲和以赐寅虽以医进操立固殊宵梦以椒寄者私启之寤乃深自刻责家故隶尺籍请除之弟宏亦精药论传子至孙皆能为方时又有刘敏李思勉者俱传寅术

○韩凝

韩凝复阳者魏公琦之后也能论病士诚据吴时方佯延士凝隐不出子奕有高名次子夷少凝令奕子之永乐初从兄为言于朝拜官奕卒夷得请归葬永乐中扈从时巡疾上命中使视之卜史命龟歿而悼恤之深为凝弟之子亦被遇有秩禄及其世

○沈以潜

沈以潜先自汴从宋南徙世以轩黄术相授大父新父日章皆着在前代潜少孤尤精于经方药论所治十全八九宣德初征上人未知会蒋用文病上遣人问堪代者以潜对召见穉旨拜官潜质重恭谨亦能为诗其孙宗常尤善别经脉营气以知人死生按法逆顺和齐汤液有患衄出血无已医以为热宗常投以参附或惊阻之曰脉小而少衰非补之不可遂以愈孔侍郎当晨体如燔绝饮食医益以为热独谓热宁可泻以暑药佐之温以益脾愈黎守溺不下或窜以药益闼曰此结络不解痰成僻法当吐果吐而洩如故临缢人自谓无病忽觉神思有异晚歌笑不节曰此阴火乘肝晚而动直以柔剂少加利之良已吴丞妻孕而惊遂病悸医以为疾在中神越焉无可为宗常以为胆伤耳俾服抱胆丸愈庐陵人胀而喘三日食不下咽矣视脉无他问何食饮对以近食羊脂曰得之矣脂冷则凝温熨之所及也温之得利而愈所为治以意度之察五色诊病决嫌疑定可治不药论变化皆所自得晚无子其族乃多仕显矣

○刘观

刘观者长洲人父毅以医给事 燕邸坐法籍入之永乐初念旧臣召观还为尚医赐第以居贵人有所苦皆令观治之扈从北巡归卒子溥有儒资工数术以古经方散佚论病之浅深不能中博求之诸家书遂及阴阳形法五行星历靡不究该以医荐为掾史已已之后知溥者又荐之朝而徐武功素善之数引与谋溥见徐锐欲白去曹石而视徐面有异曰公旦夕且有不测果被逮时有义丈夫泰州马士权以为徐所使为疏者收下诏狱掠讯楚酷濒死终不挠曰徐有贞忠于国犹有天地鬼神可诬污也徐赖以免溥虽与厚能滑稽取容故不及且善为诗时有晏铎汤胤绩等皆豪纵好大言然皆不检汤所为示溥溥辄訾之溥所著曰草窗集

○钱瑛

钱瑛者世为小儿医宣德间召拜尚医时有婴儿生九月悸且啼而汗众医不知所为瑛见之令坐之地且以水弄之惊啼顿止或问焉曰儿在怀抱春气作衣帷拥之无以泄宣其鬱热乃甚得水则解近土以平其藏故不烦药子三人皆传父业孔周孔贞皆其孙也时又有陈公尚贤者自宋为儿医曰良炳者着于元曰道者赘于孟景昉氏孟故精于王版九宫八风论道兼通其说傅彦斌仲和以达公尚少而孤母陆抚之即自刻诵其家书治疗多全抱携至门者尝满焉以荐召念其母遽乞归孝爱自天性其论病多隐恻虽危憫必欲全育之不问所从寒暑昼夜未尝怠其仲子曰希承尤善其业徐氏子痘而泄众以为不治希承视之则加数已乃稍止居顷之又作众以为必不可疗希承曰急矣非附子不可一投少间再投而愈人谓钱氏专主寒药而陈公用热然希承实能变通故无败至今吴业疗孺子者皆本二家也

○王时勉

王时勉仲光之孙也仲光蜚遐不欲以医名敏少孤游于先友韩伯承父子间又从盛寅受方遂为人治有验精良妇有患月事不下医谓蛊者敏曰是当娠与之五分之剂果得男有佐酒女子无苦也视其色赭而青曰此火亢金也不可以夏果呕血死千夫长年近二十忽瞑眩热且咳医谓寒敏曰疹也以火齐汤发之而疮出愈抚使者邹公病诊得其僻惊谓何以知曰肝脉深下知有孔泄污然察之有死青之兹劝之旋台计五日当发至期而歿其人长者不独以艺容止甚伟而曠资固圣儒得书之要事尽其方意独能解论不可传人从学之未尝效曰吾方不为爱公所顾天解者鲜耳子谷祥遂以进士举于朝同时有刘子绍亦与敏名相若其所论应天道四时而治之以意所全十得八九不能尽识传其子至孙皆精于数为时所重

○张养正

张养正者中岁以疾废而负气峭山??其治以固护元气为主往往有奇效或未病即知其死如所克人望而畏之又有奚五者亦善论病其治效浅深能测知人所以受之故为时所倾家大人尝赖之济年八十余犹调差人病不失毫厘

赞曰医于数深矣论所谓如迎浮云不可得而穷也非圣人而能之乎黄帝生而神灵岐伯天老等岂可望耶秦越人之传自长桑君固非常人遂能解肌结筋揲荒瓜幕浣肠胃后世能若是耶吴之医自王仲光王安道韩公达公茂盛启东刘原溥宗序至沈以潜张致和钱伯常张养正刘永嘉数君子者或以德为逸民名高当世而隐不见或以学术贵以诗若文自负不肯以所授禁方妄传人或祇祇惕惕以惠爱为心故艺为国工其裨君子而深论方术百世为之精也岂徒然哉岂徒然哉后之为医心不精脉所目不能视色而况能见五脏察腠输知浅深之度乎且其意在得精望望然志于获又何论也

○沈景暘

沈景暘善以易卜小事多验宣德初交南役兴英国公董师入其阻久无耗驿召阳卜之得有夫出征获其雄狐之兆克以明日午捷当至已而使果乘遽至虏其王讫定之

赞曰古禰卜筮之用莫大于蓍龟其来尚矣然三代之占不同而后出者乃益不可知蓍虽存无复古之遗其兆辞往往载之他书何后乃遂不可复睹耶至龟策短长亦无复论自汉以来人自名家惟焦氏着若李寻京房翼奉不知其所用占何术郭氏洞林稍禰密然今用者多似郑玄所主五行十二辰贞晦相乘之数而郑法与书不传犹传其意欤夫蓍策之用诚神矣惟所为尚苟能专意致精叩之无不应者而况天之所开善败必先知之亦有不籍焉者特神而存之岂易言乎

○沈遇

沈遇者吴县人其先有名宋咸淳间能写照遇善设色亦工用为其图貌雪备尽生韵永乐中尝召见

○谢晋

谢晋孔昭尤善山水得其窅渺层深意而构体落势态各不同营一障或踰丈亦顷刻就又善诗

○苏复性

苏复性初以乡所论士守绵州师盛懋画不为人作或一幅终岁不就若晋之速性初之迟各极其致又有范暹陈复皆宣泰间陈暹成化中画皆有意

○陈季昭 周臣

陈季昭者善设色山水人物画周臣学于季昭而益工于古所谓六法殆庶几之其图象大小绵密萧散皆有意态时能者多以纵笔无所拘长于寂淡若纤秾丽冶惟臣与寅其弟子仇瑛

○陈淳

陈淳者御史大夫璠之子善画花鸟树石生动有韵名甚着又善书子枯为图亦得其父用笔意又有陆治文伯仁而治所图间远伯仁稍茂密

赞曰吴之善图闻于四方然前数君皆以名行重特游于艺以自适故足贵也陈以下虽业焉抑又因以为利非无善贾莫能逮昔何哉夫今之视古岂独一艺而画者尤易

见上焉则不及元宋间下者益以卑又况不能自运徒摹临耳乌足言乎

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之十四

刘凤

道术

时蔚

隆菩萨

溥洽

万金

大佑

赵头陀

道岳

慈舟

法华

周玄真

黄道渊

李德睿

金善信

席应珍

张皮雀

曹大初

尹蓬头

裴庆

○时蔚

时蔚乐清人姓金氏学其道者称祖焉传法于长干岩来吴玄墓聚橡栗藜藿而食之或累日不进开立宗教建寺设坛授受其徒甚盛名万峰师洪武辛酉召之蔚已预知趺坐而逝使至已无及数日肢体犹温如生

○隆菩萨

隆菩萨出家尹山寺洪武壬申疑四方避役窜为僧者众集之金陵悉使隶尺籍时亢旱隆请自焚祷雨以代戍者许之积薪雨花台下剑戟拥隆登焉口自吐火既焚取香

书四字焰中伸手授使者肉烬而体植立节节不堕雨随而降 上喜曰此真永隆雨制落魄僧诗美之

○溥洽

溥洽南郡陆氏子也洪武间住北禅寺 诏领其徒及少师姚广孝以翼戴功不受赏让之而洽以建文时用事又预知其出也坐系船官狱久之姚将■〈衣上十下〉乘輿临视问以所言独请宥洽立命释之拜姚床下发已髻髻长所著有金刚经注及诗集

○万金

万金者吴宝积寺僧也洪武中令住天界诏与宗泐等疏楞伽金刚心经其精理甚深而辞义能畅非有神解不至是也

○大佑

大佑姓吴氏幼开敏有契闻经声惕然悟一诵即得十二出家寄心庵既又为泽天泉司讖已之武陵参及公禅洪武间召预蒋山法会归住北禅永乐初召修释藏最般若义六百卷及素所著净土指归等解弥陀金刚二经天台授受二门图诸书有传者

○赵头陀

赵头陀自云终南山来不知其所证成化中游吴几十年所丐食往来啖肉能顿尽数十斤飮至斗许饮水亦一二斗或四五日不食问之无所荅夜宿北寺门按使者王浚临视之为不起扪其带笑焉死时遍谢尝施者乞水一二石洗肠胃乃化

○道昂

道昂阳山寺僧也闇诵法华七轴如注水焉不遗一字每旦入城持讽数周他经若圆觉金光明地藏慈讖等皆能口述惟华严少复检梵策人请为忏悔辄谢不往

○慈舟

慈舟本大弘寺僧后官中毁撤舟去之浮游闻北都僧讲玄觉析幽眇义徒步四千里从学之归止定慧庵与门人论禅旨戒典宗法弘阐?多当永豐聂公为守日行废浮屠令黄省曾为博士弟子以书谏言释之传自古初以来我 国家列圣具作贤辅名公卿在若其可废岂待今哉或者阴寓教化之意柔犷戾难驯之性使无畔涣恣睢神道设教其殆然乎今苟欲毁除独可私祠淫昏之属耳为非制擅有改革义固未允而诸所毁势家者必请之夺彼与此惠则有偏而起攘争之端疆驱迫之彼失所藉如逸鹿挺而走险恣其傲梁于何不至往事可鉴也可无念诸聂公览而变色即收令反之舟尝造经二藏赍之天目山送徒在道所供足给及其歿罄然无一物遗其友楚英共依止而异所为不跌为不谈义

○法华

法华者自云河南人游涉甚远来止苏开元寺状曷鼻巨肩魁然丈夫也修苦行禅立五年不卧且为亦不语已而人问所见境云魔娆有四怪险威皆易駭其以美见者惑人甚非即断遣将溺丧之时有所依众则云集或擅施稍广即舍去当岁俭时众馁有愿

施者几得华一过或劝之行中道止曰是足动吾一念耶黄鲁曾云华虽精进亦未证真谛故法不能尽通且寂观久宜有悟而徒见魔境其慧定皆未耶时有雪僧者饮酒食肉而颇能为诗率流浪语无足采至非诋王新建云其所论学误而未可知其蕴而与华异行皆为黄氏所称

赞曰嗟乎吾读庄氏书谓无不任无不废何遽迟速于其间哉且焉知吾未始生未始不生也者以为至矣及观释家言又未始不慨然自失也夫万物出于几入于几其往来犹旦暮也而儒者劳身苦体以天下为焦然肌色黧黯昏然五情爽惑其勤至矣而不过以为名实道以清静为贵未始撓情万物可谓游于方之外而未可谓能离有无也若释氏言极之恍惚穴??冥芒然不得其际天地犹之有穷而劫运终始如恒沙往来相代而吾真如湛然未尝有所变易岂与夫局趣俄顷间者可同日而语哉然其教盛于梁隋逮唐宋间至元而微今则几乎熄矣象服徒存彼所谓禁制屏绝遗外之训皆不能遵而况其杳微圆精三乘无漏嗣五宗十七世者出其间哉故非无励行精进神变应世佐命之徒然非复向时之士矣因即所睹记列之如彼

○周玄真

周玄真幼从紫虚道士李大无游太无师杜道坚有异术贞至正间来居葑之报恩院能召为立至其事母尤孝已而受灵宝法于曹谷神又因顾浩授五雷秘文于步宗浩洪武甲申旱李太师善长迎致之祈而雨 上问以鬼神事称旨又问以雷所以神对以二气运行语同儒者 上尤善之至三月不雨又祷而应乙卯又旱冬无雪命祈之皆立致遂益神之真好利物畚筑杠梁道路得 上所赐皆以施未尝畜也其同受法宗浩所杨宗立者亦能行其术若有异物之神见于前郡邑重焉

○黄道渊

黄道渊一名孤山尝授郢人卫淡丘修为术及药论方伎又南游事金华道士潘雷鉴已而憩异有严德昭者疾久不愈独斋祷于北帝道渊适见之与药遂愈故一时争神之留主坛宇其徒遂众且传其方至今亦秘之外人无从知

○李德睿

李德睿者嘉定人始为道士宁为宫习方论能精服所又遇淮人李隐授以窦太师九针法甚奇效洪武初召入辞归卖药市中独携一瓢道士张羽及王行高启皆与善为之赋人疑其仙时又有郭守源者初从张简学诗慕方外事周玄初尽得其秘洪武初召领祠事颇宠异之

○金善信

金善信少好黄老术尝畜妇有子时有道士能以符役鬼物治病从学之及闻莫洞一行雷法剧饮市中叱叱怒骂雷随之应遂倾身事焉尽得其秘益研核旨要其道以神所游泊然虚也阴尽则阳存阳无尽而与气化始终则长生之说也故以清静为宗诸有为累

○席应珍

席应珍者常熟人少为老氏学异衣冠走山泽间有所访求尽通符篆经法亦涉猎史传其事母孝至哭泣之哀有踰常度人谓太上以忘情贵何尔为者云仙道有孝行明王岂悖而可言道始主普福宫已而迁白鹤观卒洪武中

○张皮雀

张皮雀者一名道修体貌瓌异举动无常人莫测也父欲为娶不肯去事颠道士为师傳其术甚神宣德中旱常之巨室田尽暵焉重邀设为坛而祈初未知崇事也霆折大树遂焚其廩烬焉昼晦暘龙见而雨大注人咸股栗昆复旱令请之恭期以三日雨果沾澍人有疾者为嘘气治之即痢症觉有以火逐之者应时愈马氏妇或崇焉闻其将至即昏仆已而遂醒适过神祠众方鼓舞祠之敬甚见则嘻咲向之裸溺而去神为所侮下教言其道成故不敢校也尝髻而披纒絮服装奇诡而姿爽然日?夬彻数人不觉起敬 其所捕鬼物携之行声如儿所戏雀故以名无疾而逝后复有见者云其解化所谓颠道士者名胡道安吴江人始隶玄妙观晚有所遇授以青城太乙真文及斩勘术招呼风雷俄顷间景泰中旱守请之祈时已醉登坛四顾挥斥詈詈简所击云随之合雨大作时时伴狂惟所之故以颠称又有曰张宗茂者传李雷谷法奉其教谨请祈多应而不好为人祷自克其终良验若所谓解化者

○曹大初

曹大初者不知何许人尝寓止诸观中亦不知其何所师授侈口蹙亟?页深目状胡大髭髯苴布而嗜酤酒日就市中啖膾肉暍滫不辍口而时时瞋目语有所招呼或若有所对接灵圉振于怪物者人或谓颠又或闭门卧累日其徒呼起之或俨然坐不食亦不倾跼人固疑其异弟子事之久者居终不见其所为若以间叩焉则叱之适旱祈者开阳闭阴襁礫百方士或水之克以日又不应乃笑谓之曰待我乎众因谒焉则与之期旦当来诣竟令去迨明雨遂大澍连日夜不止人往窥之则方大鼾及醒而笑曰雨足乎故始谓其通于阴阳变化甚神之由是祈者遂众能阴知其诚之至与不至告之曰吾无能为当为发书易可耳故多托之筮以言而拯危殆解纷乱急人之急或有物崇焉则至其所默坐叱咤詈之若有所考核者夫既获利赖愈益向之乃语弟子曰吾不敢私其力为人者能以此几落吾事吾奉召命不可以俟矣尔辈久此吾岂不怜尔诚向语尔大道者顾尔未能契且惧彰泄为累耳吾少读内景经有悟自尔遇仙师授以至真要道惟默存修之道成后乃有戔司所守主既鬼神事不可语遇有请祈精诚法不得秘而胶胶扰扰吾恐驰焉今乃得从所愿吾欲授尔尔姑精一其心斋洁奉所禁戒无敢犯若素所营修尽诚为之不懈上为鉴尔自当有所简命吾于尔岂能忘情哉能从吾教吾为助尔请深妙奥微当尽以指悟不然无益也余得之道士曹守贞其言如此盖自元丹阳长春之后其道或显或隐不可得而知或谓皆有授受所自其世次存焉特余所接见或言能变化倏尔作黄金服食者多未验云

赞曰夫道书所称其旨博哉皆推本黄帝而源于老子然其言欲以无为治国乌有所谓变化恍惚役鬼神之事乎且庄生非十二子已亦自列为一家未尝附柱下也况可取诸神仙方伎槩以黄老目之哉至阴符杨墨邓析兵家者流俱附之道书一何猥杂不经之甚也然能传其术者莫盛宣正以前皆自元入今又何寥寥哉岂元氏固自为胡而异端者因以显其为方术为变幻为考召为羽化登仙服食黄金皆有所授之耶不然是亦人头畜鸣若秦时仓海君黄石公者固皆近于荒时一见其迹耳乃若是着又何为哉若今之为术疏也宁独道家者言学者率窳怠苟而可至不能名其说而望有究通者出其间耶

○尹蓬头

尹蓬头者不知其所自来负杖而游翩然有尘外婆其毛发稿而容更若处子举止甚轻壮者不逮人见之无不慕焉争愿请终无所言或饮食之亦多不顾或为少嚼之则深自喜其去来不恒不知其所休舍特往往行途中则人辄随之有问其年者云绍兴至是三百十有余岁矣林守世远闻而召之问其所从师授第云吾宋人也无所学偶自游行于此耳无预人已而竟去人又有见之天台中者时有吴甘泉者好数能知物抚使者余公谏以迹人来言寇且至令荣之曰寇虽必至然未及接而覆其中秋日乎已而如所克凡策人即知其生平无爽或令为尹布算则芒然不能测也究思累日始愕诒曰是先天虚一之数也不能死不能生非仙乎何以有此然吴生数人亦不知何以得之术者皆不解

○裴庆

裴道人者吴市人也忽有所遇一旦遣其妻去举其筐筥所为养者悉委之衢乃浮游无所之后坐废时累月不起亦不见其饮食人始异之叩焉辄不应既而之信之山中即为张氏道者宫止焉间有言事良验人愈益神之来者几得其一言卒秘不肯酬也亡何化去

赞曰闻古有不死方人争慕而求之者多矣然或成或不成其求者尝倾海内力从事弥年索之穷上下而不得其得者又不籍余力往往着之耳目所覩记是诚何哉尹事传之故老甚核裴则近事耳人多识之言其初无甚异也而忽若有悟此诚有不可知者不然一市人而能税化坐忘知未然谓其无以致之则不可昔太史公所穨燕齐迂怪之士争言有禁方中当世欲今幸时不好之故得优游山泽间无物色之者然可为沉溺者劝也

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订

●续吴先贤赞卷之十五

刘凤

寄寓

周伯琦

饶介

陈基

姜渐

张羽

徐贲

李干

吴福

周伯器

夏迪

郭彝

孙太初

方太古

宗伯昭

○周伯琦

周伯琦者鄱阳人以任子主簿南海迁修撰翰林后以近臣出廉察岭南陟扬中外久之复假江东参政招谕张士诚遂没士诚所羁旅无聊时与诸文士游亦客潘元明虽倥偬时饮酒赋诗与张羽卢熊等流连日夜或前而为变征之歌皆垂泪涕泣已又为羽声慷慨士尽变色投袂元以太常召士诚留之乃改行省丞在吴十余年士诚败竟得归伯琦仪貌都雅而非戡难才虚谈无实雍容自免而已博学能文章尤以善诗名

○饶介

饶介者临川人仕元亦通显累陟方岳以参政莅吴介长于学问时元政弛吏亦无能蹇蹇险危其身捍患者偷旦夕集诸客觞焉赋淫词樽俎间相命为乐诸方既溃势且及吴而介晏然未尝为计至张士诚自海济师袭齐门介无复措已入据城内纷扰乃坚闭门士诚知其无能为也亦不逼之已而造其所请焉遂为所縻乃俾领省事而实无所预束手而已介惟劝士诚犹假元号令四方岁输粟大都及 国家兵讨灭之并俘介死京师

○陈基

陈基者临海人在元从黄潛学召侍讲幄御史以时政咨于基基谓后宫于政嬖宠滋多因为草疏上大忤欲罪之遂隐避于吴为人讲授属乱作开府复引为从事已又转而之浙张士诚受元太尉又以基参府事及其谋自王也乃独谏止之谓当且需时者遂

命以内史领学士院凡军旅文符书檄悉委之士诚无大畧不知攻取势遽晏安徒好文为故时有命篇诸人与相和歌亦曾无巢幕及烬之虑从容宴笑恣其湛荒不欲闻疆场事及与同覆基既俘乃蒙宥俾预著作修元史成放还吴卒

○姜渐

姜渐者诸暨人当元时来吴张氏起罗致之官以行省从事然未尝有所于预独时在坐席杯酒从容未几遽以疾辞杜门不交宾客及 国家初平吴礼其贤才用之征为太常博士卒渐喜读书文亦质而近理

○张羽

张羽本浔阳人刺史戡后也元政已失乱方作羽避徙湖州荐授官再徙吴洪武初以儒征对不繇 旨放还又征起为太常丞坐不涓洁当刑而免移之岭南未半道复召惧自沉于江羽颇好著述文亦典雅其纪载行事详而有体工诗善画今其书有存者与高杨齐名时复有一张羽为道士亦能诗书法甚长客潘左丞亦浔阳人字伯雨名尤显

○徐贲

徐贲幼文本蜀剡人来在常州元时徙居吴齐门日事吟不暇而名遂彰彻繇张徐亦善图染有山泽间意张氏辟为从事即谢去洪武中征起使晋冀还橐惟所赋诗乃命给事殿中进退有恒不失尺寸改御史按粤又改刑曹陟参政广西有政绩进布政河南以征洮岷乏军兴为左将军论死狱所著曰北郭集存

赞曰士所遇致命于时无可言者若其覩萌渐择所处鉴于几先自遯于藪荒不见其芒颖以自异人安得以象求之哉徐贲张羽在张氏土为所羁然居卑不与谋议卒免焉而亦蒙时猜虽欲竭忠致节辅当世之治而人谓如二三其行何渐也幸保首领亦其名尚微陈基在元能正谏虽污张氏尝劝其母专窃攘故以文儒获全若介有守土之责而竟为张氏用虽云迫胁志在苟免其若封疆之义何伯琦尤为元近臣受方任失地不能死亡之又不自贬捐而日与从容宴乐不思食其食之谓何而且以文史玩弄给人之娱是焉得无罪也哉得归死首丘又何幸矣至二三君子之才皆一时选其书多有传者故备论之

○李干

李干家本睢州元时佐守许累从征役后乃与其将扩廓同抗我师兵败被执置京口已而选所俘才足用者任之方改制度议典文举礼乐干皆得预焉及列六曹以为即吏部复兼相 秦王谋议军事召还议不合黜居夏州又召入直晨趋禁内不敢挟扶已笃老匍匐行 上怜之遂得谢来吴依故人盛逮居卒年八十六无子逮为葬之干明习故事值国家初建有所创设皆综论焉不为无助

○吴福

吴福者鄞人也以给事使琉球海风荡然倾摧在俄顷众惟恐惧不知所谓福诡辞慰止之云当必无患者但谨备之使回领典著作出按察豫章复入守礼曹修诸经疏义

出参政陝历三考迁布政闽既得谢来居吴子宪完宪以孝着且以所居让诸弟杜用嘉贤之谓其可比薛包

○周伯器

周伯器者雋颜蹇髡长上短下始来寓吴以授经自给正统间闽寇作尚书金问往征厥讨乃拱立道旁自呼有嘉兴儒人周生愿效力行间尚书顾而伟之曰生既欲从可仍儒服耶遽曰诺敬易之短衣楚制介帻趋乃纳之与侑军事大见信用号令文符皆主之当以功上会金与他使者不协故抑不叙伯器好书年八十犹雋校两汉正其讹

赞曰李干元臣预谋国军败不能死以儒亮获复用遂委心焉出入尽瘁能老焉者鸟则择木其亦得所从耶福奉使绝域出万死其陟扬于外久才亦有足矜者子复着廉让节其慕大吴之风而兴者哉伯器比壤来止效行间赏不酬勩然其志慷慨矣

○夏迪

夏迪吉安人当前元寇作以万夫长守昆山 国家既定天下托以隐焉结屋海滨时咏诗自适默有所寄

○郭彝

郭彝宗常本蜀人父教授昆山遂止焉彝善为文密致而严常客张士诚所王行辈皆折下之气亢爽敢直言后亦被征竟坐之时有卢昭者闽人亦来?地其父钧华升究其教诲子里人皆化之昭博究经传涉诵诸家五诗洪武中征为博士掌故扬州又有林钟者自华亭来寓其学长于训诂因授掌故昆山迁尹楚慈利僻在夷中数相争钟身入其峒喻解之遂皆出率化擢考功吏部参政山东坐事卒

○孙太初

孙太初者秦人也有逸才尝有所避纵游江汉蹑屣数千里走齐楚踰汶泗岳麓薺壤咸跻焉于是来吴太初容观甚伟肤体莹泽人望而亲之喜谈神仙事又善为诗吴为诗者省曾诸君皆狎焉喜名者争造门进饮食服玩食酒能多而不乱终日酣畅登高望远有遗世去人间想时遇贵游或谈朝市则又款款施于名实善为经务故时贵复好之尝病属人以殓事既而愈悔其衰志人亦知太初非忘情者喻之婚宦乃益愤愤诗多悲激有不平气时倚柱而歌其音哀切少年和之皆泣下沾襟复自放袒裼号呼俛仰千载思古豪杰不得一当持此安所税驾已而人导之娶施侃妻之妹建业刘麟龙霓亦来在吴越间相与往来而献吉辈亦遥与相应卒年三十七耳刘公尝矜之云与太初对令人坐忘其为人题目之如此

○方太古

方太古者兰溪人也少则有美名能致客四方来者日益盛会葬其亲诸显者冠盖道相接士人里中父老无不毕集族之人嫉之乃谓其所视兆吉将昌大遂夜发其藏讼焉不得直其宗人或行贿顾坐之逸之吴杨君谦见而重焉与谈竟日夜不穷故遂倾一时其性迂缓好洁高自措尤负气慷慨尝与省曾诸君遇于途诵近所为诗值雨且至咸

匆遽欲疾归愈益徐徐诵不辍已而雨大濡浥明日乃谓客曰昨兴洽吾乃徐步然诸君前亦遇雨也奚择姬水以父友事之谨尝与徐绍卿先生偕造止之宿荐以新褥席衾洁之香气乃自令解所携白褚藉之寝迨明视之褚故不为动鲜若初置之无痕襞积者此其轻体善寝殆何以致之子循言其诗多有足观尝询其家则已散佚无存者惜夫

○宗伯昭

宗伯昭者宣城人父为方伯闽尝携之见于乡先生林见素时年十七许以王佐才性轻财好推分恤人之匱缓急向之无不竭焉者遂以侠闻然非其意能读书即所解出域外又不封已自多究寻义若不及有所避来吴见征明诸君遂倾焉日与游履吉兄弟皆为石交时有和歌才亦相埒闻之绍乡先生言其豪且善骂尝与省曾有所居间其父或醉语即骂坐起云乃公与若子交宁为若耶且否者我宁识里人与图议也予尝于他所遇之时已老亦卑之无甚异特颇能诵太史班氏书且言往所交游时申一慨有丈夫意

赞曰吴为古名都士之以才名者必之焉则易以闻着谓赤之迹与朱然耶又或譬之弓冶焉则角干之重醪奠体斲目与上下其齐陶旒之功其所赖故多耳太初故与海内士交然萃止吴久人尚能言之虽不能轻举税化犹疑若御风去者此其人固游于埃壚之上不可度思矣夫方生奇峭傲山??轩然自为名高亦以二三君子皆一时重翼卯之遂得与相轧或以为善谄不可测则不知其内挟何术伯昭侈盈之以故不容于乡以彼其才而遑遑道路犹且肆已焉所遇无问贵贱即凌出其上人亦不觉下之或惜其善家子一旦堕轻黠哀之故耶所谓王佐者乌在至其所著书槩未有足观而行事相类者习气然乎哉则鲁昭公之学楚言是也其能无出乎

●续吴先贤赞后序

魏学礼

余以端蒙大渊献之岁旅食 王都获交当世君子昔所愿无弗从焉者且得观于上所建立轨极创制造法顺承天地神祇辨物类之官岂不信哉岂不信哉盛德太业至矣极矣蔑以加矣若神道设教 睿明所笃制作之微虽不能窥而声容礼乐备在斯乎余小子窃欲识焉而未之??月??或责以既覩其盛无所发明叙正之义者夫斯事体大固非寡学浅闻所敢议若贤士大夫言论及见之行事者亦私欲存之请俟他日乃有来自南者以子威先生所为吴贤人有闻自昔着功烈行义于时者书示余详哉其言之也夫传不云乎不有君子其能国乎吴自泰伯以让德肇造逮延陵季子阖闾子胥以来号为多士而言游以文学穉于七十二子间则吴虽僻小必效情核其华道者明矣夫言之章章以昭识考中训定庶孚故官是以能效其職百工是以能成其嘉材民是以能有信鬼神是以能有明德使不有所载之几何不渎乱失次淆而无别已哉故善与不善才与不才之异夫既以刑赏予夺荣辱于一时而又随以是非得失褒毁刺讥于后世故君子不畏于行所值患害而为凜于众所视不能以情易者亶亶怵惕戒恐保任如不遑焉

岂非以书之存乎哉传谓有求名而不得有欲盖而弥章或微其文于此而义见于彼或指事正名考见成败无所遁于千百世者是以崇议博观备论其始卒所由虽纪列斯在而义归杨榘有以也夫且时殊变成功异人私其议执所是各自贤其行而不同务要以度衷明分奉礼成义质信于君子谨其端绪表见之为之立功立事古穉有五者故有以德建国家安宗庙社稷曰勋者则有若金问徐有贞 其人乎以言垂范曰训者则有若文定文恪文恭其人乎用力用劳曰功者则有若襄毅文庄其人乎明着其列曰阅积之以时曰阅者则自仲举以下不可更仆数也是多爵服重列畴官厚庸出入有诏于国名谥可征于往至夫树贞信操一行虽未受任不违其难若造士仲理公敬所事不有躬若季栗矫阿辟之心孤特厉方若仲光辈反才擅故艺皆幽摈薮遐僻陋无党易以湮微无为抽引暴之于后者乃咸载之策虽其文颇有不尽然本未着其明疑者阙之虽阙之故赖以见以而推之贤人君子所以行权合变审形错宜屈伸进退亦当世得失之林也援近者之迹用以裁轻重之準何必旧闻即揆量和齐祓除其过以昭明之无有解迁散佚坠失之患绍前之隆明系胄志古之道正所传之绪意在兹乎意在兹乎余往则与子威先生共差次吴人士谓吴壤隘偏惟以弊赋从上之役尝重天下至才之所生何??月??侈?饫闻务盈焉者若其笃道遵德履信祇惕朝夕犹有先王之遗教余俗故其君子秉心宣叙砥其业小人勤恁膂力焦劳覃瘁虽名街居衢处之国四方所走集尝馆穀财货之口而处脂膏者不自润其风俭僿而习纤细犹之饥匱困竭独选蠕不??月??为非若其玩巧而事末技往往绝擅仰机利而食者众亦随时而迁非必其故至迹者奸游乱法数扞文纲乃时有之闻之亦一二轻儇滑祸作为虚誉内挟诈力而外以交结郡国豪杰行其私俗之沦濡其何日之有且其气炎有以铄之而动色高议格正其间得无望于纲纪人经教诲督厉之君子乎若整齐其传以俟后得以览观固有在矣

游自燕冀归见于子威先生请业焉得奉所为书则家大人咸预绳焉者水悚然拜曰是将以信诸后谓盛德不可忘故记之虽记之故存之者也自伯叔甥舅一二兄弟实宠嘉之水也敢不再拜先生逡巡避席曰是非吾所为托也子之家有其书矣若其志则余也敢且若古所谓记于功宗及识之表旗分物督不忘善哉其为训于世乎况我州党穉礼义之国弦诵之声四彻于郊是贤士大夫之所庐也夫盛德必世嗣太史公所次宗臣世家必先之者谓有功列在王室者也若其薮荒抗之专行独节不顾世是非君子比度其衷上下仪之着之话言以类象表微志晦阐幽明有宪也几何不大泯其迹而湮替踣绝无传哉然吾闻之君子于其乡也有善学焉有能让焉虽无有循焉者不敢以其贤智加之况敢显有所论议予则予舍则舍不自退托谦让显然见于篇乎故非先生所自为载之也亦曰自古在昔先民有作吴之为记则有数君子者备之矣故述详其辞而节裁其义不有所删黜其复则有所厘改刊删其间藻润之丰蔚之美琢追之温厚之则精莹之可口为隳吮之旨弘垂之有斐之文故书而不典者其语运作而不比于顺者其语犯指事而有所诋伤者其语诬深而刻辄招人之过者其语尽直而无所涵畜者其辞皦

宽而蔓焉以乱者其辞枝是以询咨之于往闻而揆验之以图籍谋稽之先所列参观之亲所与接耳而目之輿人之讴然后侃然正色奋于笔无所避 谓善诵善诲乌有迳而谄侧犯而险陂诬而伤善尽而讪讟而不近情枝而无统纪也乎哉故君子观于是谓贞慎恕思有质要也孚格恣愿可明征也辨精博渊可永鉴也夫贞则不媚慎则不戾恕则能公思则能核故若网若纲可循而理者华瞻有体也孚故能信格故不惑恣故不忘愿故不思辩故不淆精故无隐博故淹备渊故能纪之远支繁理贯联会涵通者渐洽详严也微文以示而淑慝不爽则所以俟百世也彼孤陋寡闻不说学则以是????元心?曰奚使夫人不得肆焉且何预执简而擅有所记虽载前之文不无专以善许人乎故又疑其沃焉者则吴自张勃顾夷山谦之陆广微以下皆有所著录虽颇有缺佚然代有作者彼皆非耶且无亦废坠是为惧前之数君子者或放失焉则从而绪修之故先生亦有所藉手以成一家言水不敏窃私其义敬受简于先生请卒业焉后之探方牒求逸书征郡国故事者安知不以是往也

广信府同知邹潘校正

推官方重校正

临江府推官袁长驭校正

上饶县学教谕余学申对读

湖州府后学吴仕旦覆订